

Matyu

ndê ñawaê ñayham

Yom whê ñawaê ñayham dindec sa-nga

Matyu iñ Yisu ndê ñgacsêñomi 12 si dañ, ma iñ ndê ñaê dañ bu Liwai (Mak 2:14). Têñ ñamata-nga iñ kôm gwelenj whiñ gavman Rom-nga ma kôc mone takis-nga yêc lau Israel-nga. Ma tiñambu Yisu kêgalêm iñ sa ti ndê ñgacsêñom dañ.

Matyu iñ ñgac Israel-nga, ma iñ to ñawaê ñayham dindec gic iñ dau ndê lau Israel-nga ñawaê. Iñ to tu bu whê sa bu Mesaya nañ Anötö gic bata bu êñkinj têtñ lau Israel-nga, nañ Yisu dau. Matyu kôc yom daêsam yêc lau Israel si buku dabuñ (nañ dasam bu Yom Lêñsêm Akwa) bu puc yom nañ iñ to pi Yisu, nañ dôñ, ma bu tôc asê bu yom hoñ nañ propet akwa-kwa sêto pi Mesaya dau, nañ ñandô sa pi Yisu. Ma Matyu to yom daêsam pi yom nañ Yisu sôm ma kêdôhônj têtñ lau, ma pi gêñ nañ iñ kôm.

Ñawaê ñayham dindec gic waê lau Israel-nga tawasê dom, magoc gic waê lau nom-nga hoñ. Ñahu bu Matyu to yom daêsam pi †Anötö ndê gôlinj (kingdom), ma whê sa bu Anötö tac whiñ bu lau hoñ sêsôc iñ ndê gôlinj ñapu, ma sêti iñ ndê balêkoc. Tôm yom nañ Yisu sôm têtñ lau Israel-nga, ma Matyu to yêc 4:17, nañ yêc bocdec bu:

Anötö ndê gôlinj meñ kêpiñ su. Bocdinañ anem daôm kwi ma ahu mêtê sac siñ.

Yisu ndê apai ñadênañ

(Luk 3:22-38)

1 ¹Yisu †Kilisi ndê apai si ñadênañ dindec. Iñ sa akêñ Dawid ndê, ma Dawid sa akêñ Abraham ndê.

²Abraham ndê atu iñ Aisak. Ma Aisak ndê atu iñ Jakob. Jakob ndê atui †Juda ti iñ ndê asidôwai. ³Juda gêm Tama ma iñlu sêkwê balê lu asê, nañ Peres lu Sera. Peres ndê atu iñ Hesron, ma Hesron ndê atu iñ Ram. ⁴Ram ndê atu iñ Aminadab. Aminadab ndê atu iñ Nason, ma Nason ndê atu iñ Salmon. ⁵Salmon gêm Rahab, ma iñlu sêkwê Boas asê. Boas gêm Rut, ma iñlu sêkwê Obed asê. Ma Obed iñ Jessi damba. ⁶Ma Jessi ndê atu iñ Kij Dawid.

Dawid gêm Betsiba, naŋ muŋŋga ti Uria ndê awhê, ma Dawid lu Betsiba sêkwê Solomon asê. ⁷Solomon ndê atu iŋ Rehoboam. Ma Rehoboam ndê atu iŋ Abaisa. Abaisa ndê atu iŋ Asa. ⁸Asa ndê atu Yehosapat, ma Yehosapat ndê atu iŋ Yehoram. Yehoram ndê atu iŋ Usiah. ⁹Usiah ndê atu Yotam, ma Yotam ndê atu Ahas. Ahas ndê atu iŋ Hese kaya. ¹⁰Hese kaya ndê atu iŋ Manase, ma Manase ndê atu Amon. Amon ndê atu iŋ Josaya. ¹¹Ma Josaya ndê atui, naŋ Yekonaya ti ndê asii. Têŋ Josaya ndê têm lau Babilon-ŋga sêŋgaho lau †Israelŋga su, ma sêkôc ŋac sa si sêndöc gameŋ apa Babilon-ŋga gitôm lau gapocwalô-ŋga.

¹²Têŋ ndoc lau Israel-ŋga sêmbo gameŋ Babilon-ŋga, naŋ Yekonaya kwê Sealtial asê. Tiŋambu lau Israelŋga sêmbo akêŋ gameŋ Babilon-ŋga sêmeŋ, ma Sealtial kwê Serubabel asê. ¹³Serubabel ndê atu iŋ Abiud, ma Abiud ndê atu Eliakim. Eliakim ndê atu iŋ Aso. ¹⁴Ma Aso ndê atu Sadok. Sadok ndê atu iŋ Akim, ma Akim ndê atu iŋ Eliud. ¹⁵Eliud ndê atu iŋ Eleasa, ma Eleasa ndê atu Matan. Matan ndê atu iŋ Jakob, ¹⁶ma Jakob ndê atu iŋ Josep. Josep gêm Maria naŋ kôc Yisu, ŋac naŋ sêsam bu Kilisi.

¹⁷Bocdinaŋ, têtŋ Abraham ndê têm ma meŋ têtŋ Kiŋ Dawid ndê têm, Yisu ndê apangaci 14 sêmbo. Ma têtŋ Dawid ndê têm ma meŋ têtŋ ndoc lau Israel-ŋga sêndöc Babilon, naŋ iŋ ndê apai 14 tiyham sêmbo. Ma têtŋ ndoc lau Israel-ŋga sêndöc Babilon, e meŋ têtŋ ndoc Maria kôc Kilisi, naŋ apai 14 tiyham sêmbo.

Yisu ndê dinda kôc iŋ

¹⁸Yisu Kilisi dinda kôc iŋ ŋamiŋ dau dec. ŋac sêhê iŋ dinda Maria têtŋ Josep su, magoc iŋlu sêmbo sêwhiŋ dau dom, ma sêlic bu Maria daê. Iŋ daê akêŋ ŋalau Dabuŋ ndê. ¹⁹Josep, naŋ sêmasaŋ yom bu nem Maria, naŋ ŋgac gitêtŋ, ma bu kôm iŋ maya sa dom, dec gauc gêm bu hu iŋ siŋ gelec.

²⁰Iŋ kôc gauc dinaŋ su, goc Pômdau ndê aŋela daŋ hoc dau asê têtŋ iŋ ŋa mbê, ma sôm, “Josep, Dawid ndê apangac, töc daôm dom bu kôc Maria sa ti am nem awhê, bu ŋalau Dabuŋ dau kêtŋ balêkoc naŋ mbo iŋ ŋatac ŋalôm. ²¹Maria oc kôc balê daŋ, ma am oc sam iŋ ndê ŋaê bu †Yisu, ŋahu bu iŋ oc nem iŋ ndê lau si yêc ŋac si sac ŋagêyô.”

²²Gêtŋ hoŋ dinaŋ hóc asê ma bocdinaŋ Pômdau ndê yom naŋ propet Aisaya hoc asê muŋ su, naŋ ŋandô sa. Iŋ hoc yom dau asê bocdec bu:

²³Alic su naŋ. Awhê akiŋ daŋ oc daê e kôc balêkoc ŋgac daŋ, ma ŋac oc sêsam iŋ ndê ŋaê bu Imanuel. [Ais 7:14]

(ŋaê ‘Immanuel’ dau ŋahu bu ‘Anötö mbo whiŋ yac.’)

²⁴Têtŋ ndoc Josep tapo sa, naŋ iŋ kôm gitôm Pômdau ndê aŋela gic atu iŋ, ma kôc Maria sa meŋ mbo iŋ ndê andu ti iŋ ndê awhê. ²⁵Iŋlu sêmbo sêwhiŋ dandi, magoc Josep gic ahê Maria mbo e gitôm iŋ kôc balêkoc dau su. Ma iŋ sam iŋ ndê ŋaê bu Yisu.

Lau tigauc sêṅsalê Yisu

2 ¹Yisu dinda kôc iṅ yêc malac Betlehem yêc gameṅ Judia-ṅga, têṅ tēm Kiṅ †Herod gêm gôliṅ mbo. Tiṅambu lau apa ṅatô sêhôt asê Jerusalem. ṅac lau tigauc tu sêṅyalê tata-ṅga, ma sêmeṅ akêṅ gameṅ ac pi-ṅga. ²Sêhôt asê ma sêndac, “Balêkoc naṅ bu ti lau Israel si kiṅ, naṅ dinda kôc iṅ yêc nde? Yac alic tata wakuc daṅ pô yac mba gameṅ dec kêṅ puc yac bu iṅ hôt asê su. Ma yac amêṅ bu atoc iṅ sa ti apôṅ haṅduc têṅ iṅ.”

³ṅac si yom dinaṅ kôm Kiṅ Herod sô ma gauc gêm yom daêsam. Ma lau Jerusalem-ṅga hoṅ boc-dinaṅ. ⁴Goc Herod kêgalêm lau Israel si †dabuṅsiga atu-tu ti lau naṅ sêndôhôn yomsu, naṅ sa sêpitigeṅ, ma ndac ṅac, “Mac nem †Mesaya dinda oc kôc iṅ yêc malac bocke?” ⁵Ma sêô iṅ ndê yom ma sêsôm, “Iṅ dinda oc kôc iṅ yêc malac Betlehem yêc gameṅ Judia-ṅga. Propet akwa daṅ to yom pi iṅ muṅ su bocdec bu:

⁶O malac Betlehem yêc gameṅ naṅ †Juda ndê toṅ sêwêkaiṅ. Malac atu-tu hoṅ naṅ sêyêc Juda ndê gameṅ, naṅ ṅadaṅ hôt gêlêc am su dom, ṅahu bu gôliṅwaga naṅ oc sa yêc am, naṅ oc ti ṅgac atu tu yob aneṅ lau Israel-ṅga.” *[Mai 5:2]*

⁷Herod ṅgô yom hoṅ dinaṅ su, ma kêṅ ṅac sêsa si. Goc iṅ gic lau tigauc dinaṅ sa tiyham gelec, ma kip yom sa yêc ṅac, bu bêc bocke tata dau meṅ hôt asê ma ṅac sêlic. ṅac sic miṅ yom hoṅ têṅ iṅ su, ⁸ma iṅ kêkiṅ ṅac bu sêtêṅ malac Betlehem sêndi, ma sôm têṅ ṅac, “Andi aṅsalê balêkoc dau, ma têṅ ndoc mac atap iṅ sa, naṅ goc ambu amêṅ akêṅ ṅawaê têṅ aô bu aô dauṅ waloc, ma watoc iṅ sa.”

⁹Lau dinaṅ sêṅgô Herod ndê yom su, ma sêsa si. Ma tata naṅ sêlic su yêc ṅac si gameṅ ac pi-ṅga, naṅ wê ṅac gi e kalhac andu naṅ balêkoc yêc, naṅ ṅahô solop. ¹⁰ṅac sêlic tata dau dec kôm ṅac atac ṅayham atu. ¹¹Sêsôt andu dau si, ma sêlic balêkoc lu dinda Maria. Ma sêpôn haduc têṅ balêkoc dau ma sêtoc iṅ sa. Goc ṅac sêkac si talhi sa, ma sêkêṅ si awalaṅ naṅ ṅaôli atu-tu têṅ iṅ kaiṅ gitôm gol, ma a ṅakwi ṅamalu ti gêṅ ṅamalu ṅayham. ¹²Têṅ ndoc dinaṅ Anötô kêṅ puc ṅac ṅa mbê bu sêmbu sêtêṅ Herod sêndi dom. Bocdinaṅ sêlhô sêsa seṅ daṅ dau-ṅga daṅ, ma sêmbu sêtêṅ ṅac si gameṅ si.

Josep lu Maria ma Yisu sêsip Isip si

¹³Têṅ tēm lau tigauc dinaṅ sêhu ṅac siṅ su, Pômdau ndê aṅela daṅ suṅ mbê têṅ Josep ma sôm, “Herod kêsalê balê dau bu ndic iṅ ndu. Bocdinaṅ tisa, ma kôc balê lu dinda sa ma asip Isip andi. Ambo dinaṅ e tôm aô wakêṅ puc mac.” ¹⁴Josep ṅgô aṅela ndê yom su, goc tisa têṅ ôbwêc dinaṅ ma kôc balê lu dinda sa, ma sêsip Isip si. ¹⁵Ma ṅac sêmbu gameṅ dinaṅ, e Herod mbac ndu su. Ma ṅalêṅ dau dinaṅ dec Pômdau ndê yom naṅ propet daṅ hoc asê muṅ su, naṅ ṅandô sa. Yom dau bocdec bu:

Aö kagalêm anej atungac sa akêñ gameñ Isip-nga meñ. *[Hos 11:1]*

Herod gic balêkoc dedec ndu

¹⁶Têñ ndoc Josep kôc Maria lu Yisu sa sêsip Isip si, nañ Herod hôñ lau tigauc bu sêkêñ ñawaê têñ iñ pi balê dau. Magoc ñac sêmeñ dom, dec iñ kêyalê bu ñac sêñsau iñ, ma iñ tac ñandê atu. Goc kêkiñ iñ ndê lau siñ-nga sêtêñ Betlehem si, ma sic balêkoc ñgac dedec hoñ ndu yêc malac Betlehem, ma yêc gameñ ñamakê-nga whiñ. Iñ tap ñawaê sa su yêc lau tigauc, pi bêc nañ tata hôc asê ñac-nga, ma bocdinañ ñac sic balêkoc ñgac dedec e gi tap ñac nañ si yala tilu, nañ hoñ ndu. ¹⁷Ma tu dinañ-nga yom nañ propet Jeremaya to, nañ ñandô sa. Iñ to yom bocdec bu:

¹⁸Lau sêtañ dañgibo atu yêc malac Rama.^a Rakel ndê lau wakuc sêtañ ñac si balêkoc nañ siñga su. Ma lau dañ sêtôm bu sênem malô ñac dom. *[Jer 31:15]*

Josep kôc Yisu lu dinda sêmbu sêmeñ

¹⁹Tiñambu Herod mbac ndu, ma yêc Isip, Pômdau ndê añela hoc dau asê têñ Josep ña mbê, ²⁰ma sôm têñ iñ, “Tisa ma kôc balê lu dinda sa, ma ambu atêñ gameñ Israel-nga andi. Lau nañ sêkôm bu sêndic balê dau ndu, nañ hoñ sêmbac ndu su.” ²¹Goc Josep tisa, kôc balê lu dinda sa, ma ñac sêmbu sêtêñ Israel si. ²²Tigeñ Josep ñgô bu Akelaus gêm gôliñ gameñ Judia-nga ô damba Herod su, dec töt dau bu mbu têñ gameñ Judia-nga ndi. Ma Pômdau kêñ puc iñ ña mbê bu têñ gameñ Galili-nga ndi. ²³Goc ñac sêtêñ Galili si, ma sêndöc malac dañ ñaê Nasaret. Ma bocdinañ yom nañ propet akwa-kwa sêto muñ su, nañ ñandô sa pi Yisu. Ñac sêto yom yêc bocdec bu, “Lau oc sêsam iñ bu ñgac Nasaret-nga.”

Jon, Ñgac Kêku Lau-nga kêmasañ Yisu ndê señ

(Mak 1:2-8; Luk 3:2-17)

3 ¹Tiñambu Jon, Ñgac Kêku Lau-nga hôc asê gameñ Judia-nga, ma gêm mêtê mbo gameñ sawa. ²Iñ sôm têñ lau, “Anötö ndê gôliñ meñ kêpiñ su. Bocdinañ anem daôm kwi ma ahu mêtê sac siñ.” ³Gêñ dau kêkuc yom nañ propet Aisaya hoc asê muñ su bocdec bu:

Ñamalac dañ ta yom mbo gameñ sawa, bocdec bu, ‘Amasañ Pômdau ndê señ tisolop. Amasañ nem ñalôm bu akôc iñ sa.’ *[Ais 40:3]*

⁴Jon sôc ñakwê nañ sêmasañ ña kamel ñamliclu, ma kic piñkap yêc iñ ñampêbalê. Ma iñ gêñ gêñ bambaliñ gitôm wakô ma lêp.

⁵Lau daêsam sêsa sêtêñ Jon si. Ñac lau akêñ malac atu Jerusalem ma malac hoñ yêc gameñ Judia-nga, ma lau nañ sêndöc Bu Jordan ñamakê.

⁶Ñac sêhoc si sac asê têñ Jon, ma iñ kêku ñac yêc Bu Jordan. ⁷Ma lau

^a 2:18 Rama - malac sauj dañ nañ yêc kêpiñ Jerusalem.

†Palésai ti lau †Sadiusi daésam sêsa sêtên gameŋ naŋ Jon kêku lau mbo, naŋ si. Têŋ ndoc Jon gêlic ŋac iŋ sôm ŋac bocdec bu, “Mac mboc ŋatui mac! Tu sake-ŋga mac alhö amenŋ? Mac akôc gauc pi Anötö ndê tac ŋandê naŋ lau propet sêkênŋ puc yac bu oc meŋ sa, dec gauc gêm bu amenŋ ma aliŋ saŋgu ŋambwa, a? ⁸Aŋgô! Akôm mêtê ŋayham naŋ tôc asê bu mac am daôm kwi yomandô. ⁹Ma asôm têtŋ daôm dom bu, ‘Abraham apai yac, ma tu dinaŋ-ŋga Anötö oc kôc yac sa.’ Aô wasôm têtŋ mac bu Anötö gitôm bu nem hoc hoŋ dindéc kwi sêti Abraham ndê atui sêd mac. ¹⁰A hoŋ naŋ sem ŋandô ŋayham dom, naŋ kwahic dec Anötö kêŋ ki ŋamata têtŋ ŋawakac, ma iŋ oc lêŋ su ma tuc pi ya ndi.

¹¹“Aô wasôm têtŋ mac hoŋ bu ŋgac daŋ oc meŋ êŋkuc aô, naŋ ndê ŋaclai hôc gêlêc aneŋ su. Aô ŋgac ŋambwa, gitôm dom bu wati iŋ ndê ŋgac akiŋ tu wakeŋ iŋ ndê atapa-ŋga. Aô dec kaku mac ŋa bu ŋambwa, naŋ tôc asê bu mac am daôm kwi su. Tigeŋ iŋ ŋgac dau oc êŋku mac ŋa ŋalau Dabuŋ ti ya. ¹²Iŋ meŋ bu êŋsahê lau, gitôm ŋgac naŋ whê wit ŋandô ti ŋapa kôc, goc gic ŋandô sa sôc andu gêtŋ ŋandô-ŋga gi, ma tuc ŋapa sip ya naŋ sa ŋapaŋ, naŋ gi.”

Jon kêku Yisu

(Mak 1:9-11; Luk 3:21-22; Jon 1:32-34)

¹³Têtŋ dinaŋ Yisu meŋ akêtŋ gameŋ Galili-ŋga ma hôc asê Jon yêc Bu Jordan. Iŋ tac whiŋ bu Jon êŋku iŋ. ¹⁴Magoc Jon gic yao dau têtŋ iŋ ma sôm, “Am bu êmku aô, oc ŋayham. Bocke dec am sôm bu aô wanŋku am?” ¹⁵Tigeŋ Yisu ô Jon ndê yom ma sôm, “Am tec dom. Kwahic dec am êmku aô, bu taŋkuc lêŋ solop naŋ Anötö kêmasaŋ gwananŋ su.” Yisu sôm su ma Jon gôlôc bu êŋku iŋ. ¹⁶Yisu gêliŋ saŋgu su ma pi akêtŋ bu meŋ. Ma undambê kac sa, ma iŋ gêlic Anötö ndê ŋalau sip meŋ gitôm balusi ma sac iŋ ŋahô. ¹⁷Ma awha daŋ sa akêtŋ undambê, naŋ sôm bu, “Aô Atungac atac whiŋ-ŋga dau dindéc. Aô gatisambuc iŋ ŋandô.”

Sadaŋ kêtôm Yisu

(Mak 1:12-13; Luk 4:1-13)

4 ¹Tiŋambu ŋalau Dabuŋ wê Yisu sa gameŋ sawa gi, bu †Sadaŋ êntôm iŋ. ²Yisu gêtŋ gêtŋ daŋ dom tôm acsalô 40 ma ôbwêc 40, ma tiŋambu gêtŋ yô iŋ ŋandô. ³Ma têtŋ dinaŋ Sadaŋ hôc asê iŋ ma sôm têtŋ iŋ, “Am Anötö ndê Atu, a? Bocdinaŋ sôm têtŋ hoc dindéc bu sênem dau kwi ti gêtŋ daneŋ-ŋga.” ⁴Magoc Yisu ô yom ma sôm, “Mba! Sêto Anötö ndê yom yêc bocdec bu, ‘Gêtŋ daneŋ-ŋga ŋambwa kêŋ lau sêndôc tali dom. ŋac dangga wambu yom hoŋ naŋ Anötö sôm, dec ŋac oc sêndôc tali.’ ”

⁵Goc Sadaŋ kôc iŋ sa pi malac dabuŋ Jerusalem gi, ma kêŋ iŋ kalhac †lôm dabuŋ ŋapoc lôlôc. ⁶Ma sôm têtŋ iŋ, “Am Anötö ndê Atu, a? Bocdinaŋ pwê sip ndi. Am oc tisac dom, bu sêto yom yêc bocdec bu,

‘Pômdau oc ênkinj ndê aŋela bu sêyob am, ma sêpê am sa lôlôc bu am tinj gahim pi hoc danj dom.’ ” ⁷Magoc Yisu sôm têtj inj, “Mba! Sêto yom danj tiyham yêc bocdec bu, ‘Êmsahê Pômdau am nem Anötö dom.’ ”

⁸Goc Sadanj kôc inj sa, ma lu sêpi lôc baliŋ danj si. Ma gameŋ hoŋ nanj kinj nom-ŋga sem gôliŋ, ma kinj dau si awa ti gêtj ŋayham-ŋayham hoŋ, nanj Sadanj tôc têtj Yisu. ⁹Ma sôm, “Am bu pôŋ hamduc têtj aö ma nem akiŋ aö, goc wakêtj gêtj hoŋ dec sip am amam.” ¹⁰Magoc Yisu sôm têtj inj, “Mba, Sadanj! Am kôc daôm sa ndi! Sêto yom yêc bocdec bu, ‘Pôŋ hamduc têtj Pômdau am nem Anötö, ma nem akiŋ inj tawasê.’ ” ¹¹Têtj dinaŋ Sadanj hu inj siŋ, ma aŋela sêmeŋ ma sem akiŋ inj.

Yisu gic hu ndê gwelenj

¹²Tinjambu †Herod kêtj ndê lau siŋ-ŋga si ma sêkôc Jon dôŋ, ma sêkêtj inj ndôc gapocwalô. Ma têtj ndoc Yisu ŋgô ŋawaê, goc inj mbu têtj gameŋ Galili-ŋga gi. ¹³Inj gi ndôc malac Nasaret dom, magoc inj gi ndôc Kapenaom, malac nanj yêc kêtj Bugictôŋ Galili-ŋga. Muŋ-ŋga andô †Jakob ndê atu lu, Sebulun lu Naptali sêwêkaiŋ nom yêc gameŋ dinaŋ. ¹⁴Ŋalêtj dinaŋ yom nanj propet Aisaya to muŋ su, nanj ŋandô sa. Yom dau bocdec bu:

¹⁵⁻¹⁶Ŋawê atu danj meŋ pô lau nanj sêndôc Sebulun lu Naptali si gameŋ nanj yêc kêtj bugictôŋ, ma yêc Bu Jordan ŋamakê. Gameŋ Galili-ŋga dinaŋ sêsam bu lau apa si gameŋ, ma lau nanj sêndôc dinaŋ, nanj sêmbô tôm lau nanj ŋasec atu kôm ŋac ahuc, ma tôm lau nanj sêmpin bu sêmbac ndu. Magoc kwahic dec sêlic ŋawê atu su. [Ais 9:1-2]

¹⁷Têtj ndoc dinaŋ Yisu gic hu ndê gwelenj nem mêtê lau-ŋga, ma inj hoc yom asê têtj lau bocdec bu, “Anötö ndê gôliŋ meŋ kêtj su. Bocdinaŋ anem daôm kwi, ma ahu mêtê sac siŋ.”

Yisu mbwêc lau hale tu sêŋkuc inj-ŋga (Mak 1:16-20; Luk 5:1-11; Jon 1:35-42)

¹⁸Têtj bêc danj Yisu kêsêlêtj mbo Bugictôŋ Galili-ŋga ŋamakê. Ma inj gêlic Saimon nanj ndê ŋaê danj Pita, lu asi Andru. Inju sêkêtj wasaŋ sêmbô, bu injlu ŋgac sêkôc i-ŋga lu. ¹⁹Goc Yisu sôm têtj injlu, “Amlu amej aŋkuc aö, ma aö wakêtj amlu ahê ŋamalac sêmeŋ sêŋkuc aö, tôm nanj kwahic dec amlu ahê i.” ²⁰Ma ŋagahô injlu sêtec si wasaŋ yêc, ma sêŋkuc inj.

²¹Sêŋsêlêtj si, ma Yisu gêlic Sebedi ndê atu lu, nanj Jems lu Jon. Sêndôc waŋ sêwhiŋ damba Sebedi, ma sêpô si wasaŋ kic sêmbô. Yisu mbwêc injlu bu sêmeŋ sêŋkuc inj, ²²ma ŋagahô injlu sêhu damba ti waŋ siŋ, ma sêŋkuc Yisu.

Yisu gêm lau gêmbac sa

²³Dinaŋ su, goc Yisu kêsêlêtj golom-golom malac yêc gameŋ Galili-ŋga. Inj kêdôhôn lau mbo †lôm wê-ŋga, ma gêm mêtê ŋawaê ŋayham pi Anötö

ndê gôlinj. Ma inj kôm lau ti gëmbac tidau-tidau honj ñayham sa. ²⁴Ñawaê pi gënj dau gëm gamej Siria-nga honj ahuc, ma tu dinañ-nga lau sêkôc ñac si lau gëmbac honj sêtêj Yisu si, ma inj kôm ñac ñayham sa. Lau nañ sêhóc ñandê atu, lau ti ñalau sac, lau bôlinj, ma lau denjen ti mbolotê, lau ti ñawapac honj dinañ inj gëm ñac sa. ²⁵Ma lau daësam sêsa si ma sêñkuc inj. Ñatô sêmenj akêj gamej Galili-nga, ma ñatô akêj gamej Dekapolis-nga.^b Ma ñatô sêmenj akêj malac Jerusalem ma malac honj yêc gamej Judia-nga, ma ñatô sêmenj akêj Bu Jordan ñadañga.

Yisu gëm mêtê mbo lôc
(Luk 6:20-23)

5 ¹Têj bêc danj Yisu gêlic bu lau daësam sêñkuc inj, goc pi lôc danj gi. Inj ndôc sic, ma inj ndê ñsêñomi sêtigasuc inj. ²Ma inj gic hu kédôhônj ñac ma sôm,

³ “Anötö ndê mwasinj gic waê lau nañ sêñgwiniñ dau yêc inj añgô-nga. Inj gêlic ñayham bu kôc ñac sa sêmbo inj ndê gôlinj ñapu.

⁴ Anötö ndê mwasinj gic waê lau nañ sêndôc ti ñalôm ñawapac. Inj oc kôm ñac si ñalôm timalô.

⁵ Anötö ndê mwasinj gic waê lau ti lêj malô ma yom malô. Bu ñac oc sêwêkainj gamej nom-nga sambob.

⁶ Anötö ndê mwasinj gic waê lau nañ atac whinj ndu andô bu sêsa lêj gitêj enj. Inj oc nem ñac sa sêti lau gitêj ñandô.

⁷ Anötö ndê mwasinj gic waê lau nañ tawalô lau. Inj oc tawalô ñac.

⁸ Anötö ndê mwasinj gic waê lau ti ñalôm ñawasi. Ñac oc sêlic Anötö.

⁹ Anötö ndê mwasinj gic waê lau nañ sêñsalê lêj tu sêmbo ti yom malô-nga. Inj oc sam ñac bu inj dau atui awhê ma ñgac.

¹⁰ Anötö ndê mwasinj gic waê lau nañ sêtap kisa sa tu sêsa Anötö ndê lêj gitêj-nga. Inj gêlic ñayham bu kôc ñac sa sêmbo inj ndê gôlinj ñapu.

¹¹ “Têj ndoc lau sêkêj kisa mac ma sêpu mac ti sêñgôlinj yom sac daësam pi mac tu mac añkuc aö-nga, nañ ahêgo daôm dom. Bu Anötö oc êmwasinj mac. ¹²Atac ñayham ma atisambuc, bu Anötö oc kêj ñaôli ñayham têtj mac yêc undambê. Ma gauc nem bu ñalêj tigej, lau sêkêj kisa Anötö ndê lau propet nañ sêmbo muñ su.”

Anötö ndê lau sêtôm gwêc so ma sêtôm ñawê

¹³Ma Yisu sôm, “Dakêj gwêc so sip gënj danen-nga bu dakôm gënj dau ñayham. Ma mac ambo lau nom-nga ñalôm atôm gwêc so. Tigej gwêc so bu ñamakic niñga, oc dakôm ñamakic sa tiyham ñalêj nde? Inj tisac su, ma tambalinj siñ niñga, ma lau sêkwê dôj.

^b 4:25 Dekapolis - ñaê dinañ danem kwi bu ‘malac amanju.’ Malac amanju dinañ sêyêc Bugictonj Galili-nga ñagamej têtj ac pi-nga.

14“Ma mac ambo nom atôm ñawê bu pô gameñ. Malac dañ bu yêc lôc, oc tòm dom bu siñ dau kwi. 15Ma têtñ ndoc datuñ lam asê, oc tangatöc ña suc ahuc dom. Tañkiñ sa bu ñawê pô gameñ hoñ. 16Bocdinañ, akôm mêtê ñayham yêc lau hoñ añgô-ñga, nañ gitôm mac nem ñawê bu pô gameñ. Ma lau oc sêlic mac nem mêtê ñayham, ma sêmpinñ Damam undambê-ñga.”

Yisu sôm yom pi yomsu ma propet si yom

17“Gauc nem dom bu aö gameñ tu wasenñ Anötö ndê yom nañ Moses ti lau propet sêto yêc, nañ su-ñga. Aö gameñ tu wasenñ su-ñga dom, tigeñ tu wakôm yom dau ñandô sa-ñga. 18Yomandô, aö wasôm têtñ mac bu undambê ti nom bu niñga, magoc yom ñalhô sauñ dañ oc niñga yêc yomsu dom e aö dauñ wandic dabiñ gêtñ hoñ. 19Asa nañ kêtgili yomsu nañ hêtganônñ gêtñ sauñ andô dañ, me kêtôhônñ lau ñatô bu sêkôm bocdinañ, nañ ti ñamalac waêmbe yêc Anötö ndê gôlinñ ñapu. Magoc asa nañ dañga wambu Anötö ndê yomsu, ma kêtôhônñ lau ñatô bu sêkôm bocdinañ, nañ ti ñamalac tiwaê yêc Anötö ndê gôlinñ ñapu. 20Añgô! Lau Palêsai ti ñkêtôhônñ-waga yomsu-ñga sêtñsahê ñañga bu sêti lau gitêtñ, tigeñ aö wasôm têtñ mac, bu mac bu ati lau gitêtñ ahôc gêtêc ñac dom, dec oc tòm dom bu mac ambo Anötö ndê gôlinñ ñapu.”

Yomsu dandic ñamalac ndu-ñga ñahu

21Ma Yisu sôm têtñ ñac, “Mac añyalê yom nañ Anötö kêtñ têtñ abañi bocdec bu, *‘Ndic ñamalac ndu dom.’* Ma ‘Asa nañ bu ndic ñamalac ndu, nañ oc tap ñagêtýô sa.’ 22Tigeñ kwahic dec aö wasôm têtñ mac, bu asa nañ tac ñandê têtñ ñamalac dañ, nañ oc tap ñagêtýô sa gitôm inñ nañ gic ñamalac ndu. Ma mac nem ñagôlinñ dañ sôm bu lau atu-tu sêmatôc ñamalac nañ sam ndê asidôwa bu ñamalac gauc mbasi-ñga. Magoc aö wasôm têtñ mac, bu asa nañ sôm yom kaiñ dinañ, nañ gitôm bu tap ñagêtýô lambwam-ñga sa.

23“Bocdinañ têtñ ndoc am bu lic om ma bu kêtñ nem da têtñ Anötö, ma bu gauc nem yom dañ yêc amlu ñamalac dañ ñasawa, 24nañ goc hu nem da siñ yêc alta ñamakê ma sa ndi tap ñamalac dau sa. Gêtñ ñamata-ñga amlu amasañ yom nañ yêc amlu ñasawa, goc mbu ndi ma kêtñ nem da têtñ Anötö.

25“Ma am nem töp bu yêc ñamalac dañ, ma inñ bu wê am têtñ ñgac êmatôc yom-ñga ndi, nañ êmasañ yom têtñ inñ ñgahô, têtñ ndoc amlu añsêlêtñ ambo señ. Ma bocdinañ ñgac dau oc kêtñ am têtñ ñgac êmatôc yom-ñga dom. Bu mba, mboe ñgac êmatôc yom-ñga oc kêtñ am têtñ ñgac yob gapocwalô-ñga, ma inñ êmbalinñ am sôc gapoc-walô ndi. 26Aö wasôm yom ñandô têtñ am, am oc ndöc gapocwalô ñapañ e am ndic nem töp hoñ pacndê.”

Yomsu mockaiŋ-ŋga ŋahu

27“Ma mac aŋyalê yom naŋ Moses to bocdec bu, ‘*Kôm gêŋ mockaiŋ-ŋga dom.*’ 28Tigeŋ kwahic dec aô wasôm têŋ mac, ŋgac daŋ bu tahê awhê daŋ e ŋalôm ŋagalac, naŋ gitôm iŋ kôm mêtê mockaiŋ-ŋga têŋ iŋ su, yêc iŋ ndê ŋalôm.

29“Am tanôm daŋga bu hê am têŋ sac, goc kip tanôm dinaŋ sa ma êmbaliŋ niŋga. Am tanôm daŋ bu niŋga, naŋ hóc gêlêc am tanôm lu yêc ma hê am bu kôm sac, ma tiŋambu Anötö kêŋ am sip ya lambwam-ŋga ti ŋamlic sambuc ndi. 30Ma amam daŋga bu tim am, goc tim kic ma êmbaliŋ niŋga. Amam daŋ bu niŋga, naŋ hóc gêlêc am mbo ti amam lu-lu ma kôm sac su, ma tiŋambu sip ya lambwam-ŋga ti ŋamlic sambuc ndi.”

Awhê lu ŋgac sêhu dau siŋ dom

31“Ma Moses to yom daŋ bocdec bu, ‘*Ŋgac daŋ naŋ gauc gêm bu hu nawhê siŋ, naŋ kêŋ bapia sêhu dau siŋ-ŋga têŋ nawhê, goc hu iŋ siŋ.*’

32Tigeŋ aô wasôm têŋ mac, bu yom tigeŋ yêc bu ŋgac hu iŋ nawhê siŋ, naŋ awhê dau kôm mêtê mockaiŋ-ŋga whiŋ ŋgac daŋ. Ŋgac daŋ bu hu nawhê siŋ ŋambwa, naŋ kôm iŋ ti awhê mockaiŋ-ŋga. Ma ŋgac wakuc daŋ bu nem awhê dau, naŋ kôm mêtê mockaiŋ-ŋga^c whiŋ.”

Dasôm yom tidôŋ goc dakôm ŋandô sa

33“Mac aŋyalê yom daŋ tiyham naŋ Anötö kêŋ têŋ abanŋi bocdec bu, ‘*Yom bocke naŋ mac amatiŋ tidôŋ, naŋ akôm popoc dom,*’ ma ‘*Yom naŋ mac bu apuc dôŋ bu yomandô yêc Pômdau aŋgô-ŋga, naŋ akôm ŋandô sa.*’ 34-35Magoc aô wasôm têŋ mac, bu asôm yom daŋ tu apuc nem yom dôŋ-ŋga dom. Asôm yom pi undambê me pi nom tu bu apuc nem yom dôŋ-ŋga dom, ŋahu bu Anötö iŋ undambê ti nom ŋadau. Ma asôm yom pi Jerusalem dom, bu Anötö kêyaliŋ malac dau sa ti iŋ ndê kiŋ atu ndê malac. 36Ma asôm yom pi nem ŋagôlôŋ dom, bu mac atôm dom bu akôm nem kêclauŋ daŋ tisêp me tiyec. 37Asa bu lôc bu kôm gêŋ daŋ, naŋ sôm ‘Aêc, aô wakôm,’ ma bu kôm dom goc sôm, ‘Mba, aô wakôm dom.’ Yom ŋatô bocke naŋ mac asôm tu apuc yom dau dôŋ-ŋga, naŋ meŋ akêŋ Sadaŋ ndê.”

^c 5:32 Lau ŋatô gauc gêm bu yom dau ŋahu bocdec. Ŋgac daŋ bu hu ndê nawhê siŋ ŋambwa, ma awhê dau bu mbo tawasê, dec lau ŋatô oc gauc nem bu iŋ nakweŋ hu iŋ siŋ tu iŋ kôm mêtê mockaiŋ-ŋga whiŋ ŋgac daŋ, ma bocdinaŋ ŋac oc sêlic iŋ tôm awhê mockaiŋ-ŋga. Ma lau ŋatô gauc gêm bu yom dau ŋahu bocdec. Têŋ ndoc awhê dinaŋ nakweŋ hu iŋ siŋ, goc iŋ oc nem ŋgac wakuc. Tigeŋ Anötö gêlic bu iŋ nakweŋ hu iŋ siŋ ŋambwa, dec iŋlu si yom sênem dau-ŋga gacgeŋ yêc. Bocdinaŋ awhê dau lu nakweŋ wakuc sêkôm mêtê mockaiŋ-ŋga yêc Anötö aŋgô-ŋga.

Daô sac naŋ sêkôm têtj yac, naŋ dom

38 “Ma mac aŋyalê yom naŋ Moses to bocdec bu, ‘*Ŋamalac daŋ bu ndic am tanôm tisac, naŋ ndic ij ndê ô. Ma asa naŋ tuc nem ŋalhôm daŋ dulu, naŋ tuc ij ndê dulu ô.*’ 39 Tigeŋ aô wasôm têtj mac bu akôm mêtê sac ô mêtê sac naŋ lau sêkôm têtj mac, naŋ dom. Daŋ bu tap am sip alim andô daŋga, naŋ kêŋ daŋga bu ij ndic whiŋ. 40 Ma ŋgac daŋ bu wê am têtj lau sêmatôc yom-ŋga, ma ij tac whiŋ bu am nemlhi ij ŋa am nem gêtj sauŋ daŋ, goc kêŋ nem gêtj atu têtj ij whiŋ. 41 Ma lau †Rom-ŋga si ŋgac siŋ-ŋga daŋ bu kac yom am bu hoŋ ij ndê wapa seŋ ŋasawa apê, goc hoŋ wapa dau êmsêlêŋ seŋ ŋasawa baliŋ whiŋ ij ndi. 42 Êmgamiŋ nem gêtj têtj lau naŋ sêteŋ gêtj têtj am, naŋ dom, ma daŋ bu ndac am bu nem ij sa ŋa gêtj daŋ, naŋ puc dômwêm ij dom.”

Atac whiŋ nem ŋacyo

(Luk 6:27-36)

43 “Ma mac aŋyalê yom naŋ Moses to bocdec bu, ‘*Atac whiŋ nem lau menpaŋ am-ŋga,*’ ma yom naŋ lau sêsôm bocdec bu, ‘*Atac tec nem ŋacyo.*’ 44 Tigeŋ aô wasôm têtj mac bu atac whiŋ nem ŋacyo, ma atej mbec tu lau naŋ sêkêŋ kisa mac-ŋga. 45 Mac bu akôm boc-dinaŋ, goc Damam undambê-ŋga oc sam mac bu ij atui awhê ma ŋgac. Ij dau kêŋ ndê ac pi pô lau sac ti lau ŋayham, ma kêŋ u gic lau gitêŋ ti lau naŋ sêsa lêŋ giso. 46 Lau sac ma lau naŋ sêkôc takis-ŋga atac whiŋ lau naŋ atac whiŋ ŋac, ma sêtec lau naŋ sêtec ŋac. Mac bu aŋkuc ŋac si mêtê, dec tu sake-ŋga Anötö oc lic mac ŋayham? 47 Lau sambuc sêtoc dau si asidôwai sa, magoc sêtec lau ŋatô. Bocdinaŋ mac bu atoc nem asidôwai tawasê sa, dec tu sake-ŋga Anötö oc lic mac ŋayham hôc gêlêc lau sambuc? 48 Akôc gauc pi yom hoŋ dinaŋ, ma akôm mêtê solop eŋ, tôm Damam undambê-ŋga ndê mêtê.”

Yom pi sakiŋ gitêŋ ŋatô

6 1 Ma Yisu gic têku yom ma sôm, “Ayob daôm bu akôm nem sakiŋ anem akiŋ Anötö-ŋga tu bu lau sêlic e sêmpij mac-ŋga dom. Mac bu akôm tu bu lau sêmpij mac-ŋga, oc atap nem ŋaôli daŋ sa yêc Damam undambê-ŋga dom.”

Mêtê dakêŋ gêtj têtj lau-ŋga

2 “Bocdinaŋ têtj ndoc am bu nem lau ŋalôm sawa sa, naŋ goc sêc gêtj dau ahuc. Ndic dahuc taŋ bu kêŋ puc lau dom. †Lau sêtim yom lau-ŋga naŋ sêtoc dau sa, naŋ sêkôm bocdinaŋ yêc lôm wê-ŋga ti malac lôm, bu lau sêlic e sêmpij ŋac. Yomandô aô wasôm têtj mac bu lau si sêmpij ŋac, dinaŋ ti ŋac si ŋaôli sambuc naŋ sêkôc sa su. 3 Tigeŋ têtj ndoc am bu kêŋ

gêñ têtj lau ñalôm sawa, nañ siñ ma kêtj gelec têtj ñac, ma yob bu lau dañ sêñgô ñayom dom. ⁴Bocdinañ am nem mêtê kôm yác lau-ñga oc yêc siñ dau. Ma Damam nañ gêlic gêtj nañ yêc siñ, nañ oc kêtj ñaôli têtj am.”

Mêtê dateñ mbec-ñga

(Luk 11:2-4, 9-13)

⁵“Ma têtj ndoc am bu teñ mbec, nañ teñ tôm lau sêtim yom lau-ñga dom. ñac atac whiñ bu sêteñ mbec sêlhac lôm wê-ñga ti señ ñamakê, tu bu lau sêlic ma sêmpiñ ñac-ñga. Yomandô aô wasôm têtj mac bu lau si sêmpiñ ñac, dinañ ti ñac si ñaôli sambuc nañ sêkôc sa su. ⁶Têtj têtj am bu teñ mbec, nañ goc sôc nem andu ñalôm ma sêc gatam ahuc, ma teñ mbec têtj Damam yêc malam nañ lau dañ sêlic dom. Ma Damam nañ kêyalê gêtj nañ yêc siñ dau, nañ oc kêtj ñaôli têtj am.

⁷“Ma têtj têtj mac bu ateq mbec, nañ ateq mbec baliñ tôm lau sambuc dom. ñac gauc gêm bu mbec dau oc ñandô sa tu ñac si yom ñalhô daêsam-ñga. ⁸Añkuc ñac si gêbôm dom, bu Damam kêyalê gwanañ su, gêtj nañ mac apônda.

⁹Bocdinañ ateq mbec bocdec bu:

Damañ, am nañ mbo undambê. Am nem ñaê lau sênem dabuñ mañ.

¹⁰ Mweñ ti lau hoñ si Pômdau. Kêtj lau danğa wambu nem yom ñapep yêc nom, gitôm yêc undambê.

¹¹ Kêtj yac mba gô têtj ac dindec.

¹² Suc yac mba sac ñatôp kwi, tôm yac asuc lau nañ sêkôm sac têtj yac, nañ si sac ñatôp kwi.

¹³ Yob yac têtj lêtôm bu tap yac sa dom, ma têtj ñgac sac Sadañ bu kôm yac ñayom dom.

¹⁴Mac bu asuc lau nañ sêkôm sac têtj mac, nañ si sac kwi, goc Damam undambê-ñga oc suc mac nem kwi bocdinañ. ¹⁵Magoc mac bu asuc lau si sac kwi dom, dec Damam oc suc mac nem kwi dom bocdinañ.”

Mêtê dahu gêtj daneñ-ñga siñ tu danem akiñ Anötö-ñga

¹⁶“Ma têtj têtj mac bu ahu gêtj daneñ-ñga siñ tu anem akiñ Anötö-ñga, nañ akôm añôm andô masiñ-masiñ tôm lau sêtim yom lau-ñga sêkôm, nañ dom. Lau dinañ sêkôm añgô andô tisac, bu lau sêlic ma sêñyalê bu ñac sêhu gêtj daneñ-ñga siñ ma tu dinañ-ñga sêmpiñ ñac. Yomandô aô wasôm têtj mac bu lau si sêmpiñ ñac, dinañ ti ñac si ñaôli sambuc nañ sêkôc sa su. ¹⁷Bocdinañ têtj têtj mac ahu gêtj daneñ-ñga siñ tu anem akiñ Anötö-ñga, nañ aliñ bu ma amasañ daôm ñapep. ¹⁸Ma ñalêñ dinañ lau dañ oc sêñyalê dom bu mac ahu gêtj daneñ-ñga siñ. Tigeñ mac nem Damam nañ mbo siñ dau, nañ kêyalê gêtj hoñ nañ yêc siñ dau, ma bocdinañ oc kêtj nem ñaôli têtj mac.”

Taṅsalê awa ṅandô undambê-ṅa
(Luk 12:33-34)

¹⁹Ma Yisu sôm, “Andic nem awa ti wapa sa lhac nom dom, bu sop oc neṅ, ma u oc nôm gêṅ dau tibalê, ma lau kaṅ oc sênem kaṅ sa. ²⁰Apo gêṅ undambê-ṅa sa ti nem awa ṅandô, ma sop ti u oc seṅ su dom, ma gitôm dom bu lau kaṅ sêsôc sêndi bu sênem kaṅ. ²¹Aô gasôm yom dinaṅ, ṅahu bu gameṅ bocke naṅ mac nem awa yêc, naṅ mac nem ṅalôm ti gauc oc sap dôṅ ṅapaṅ.”

Ṇamalac si tandô gitôm ya ṅawê
(Luk 11:33-36)

²²“Ṇamalac si tandô gitôm ya ṅawê naṅ tôc seṅ têṅ ṅac. Bocdinaṅ mac nem tanôm bu wê mac asa lêṅ ṅayham, goc mac nem ṅamlic ṅagêṅ hoṅ oc yêc ṅawê ṅalôm eṅ. ²³Magoc tanôm bu wê mac asa lêṅ sac-ṅa, goc mac gacgeṅ ambo ṅasec ṅalôm. Bocdinaṅ mac bu gauc nem bu ambo ṅawê ṅalôm, magoc asa lêṅ ṅasec-ṅa, naṅ dec ṅasec gêm mac ahuc sambuc.”

Danem akiṅ ṅadau lu dom

²⁴“Ṇamalac daṅ gitôm dom bu nem akiṅ ṅadau lu, bu iṅ oc tec daṅ, ma atac whiṅ daṅ, me sap daṅ dôṅ ma pu daṅ. Ma mac bocdinaṅ, gitôm dom bu mac atoc Anötö ma awa nom-ṅa lu-lu sa ti mac nem ṅadau.”

Dahêgo dauṅ dom
(Luk 12:22-32)

²⁵“Tu dinaṅ-ṅa dec ahêgo daôm dom tu gêṅ aneṅ-ṅa ti anôm-ṅa, me tu ṅakwê asôc-ṅa. Anötö kêṅ mac ambo tamli, ma gêṅ dinaṅ iṅ gêṅ atu. Gêṅ daneṅ-ṅa iṅ gêṅ atu dom. Ma Anötö kêṅ mac nem ṅamlic ṅagêṅ hoṅ, ma gêṅ dinaṅ iṅ gêṅ atu. Ṇakwê asôc-ṅa iṅ gêṅ atu dom.

²⁶“Akôc gauc pi mbac. Ṇac sêsô gêṅ dom, sêhoṅ gêṅ ṅandô ma sic sa sôc andu gêṅ ṅandô-ṅa dom. Tigeṅ Damam undambê-ṅa gôlôm ṅac. Ma iṅ tac whiṅ mac ṅamalac hôc gêlêc mbac hoṅ su. ²⁷Ma mac nem asa bu hêgo dau, dec oc tôm bu ndic têku ndê têm mbo tali-ṅa?

²⁸“Tu sake-ṅa mac nem ṅalôm ṅawapac tu ṅakwê asôc-ṅa? Akôc gauc pi ṅaola ṅayham naṅ sêpo sêlhac kwaṅ ṅalôm, naṅ sêkôm gwelêṅ ti sêmasaṅ ṅakwê dom. ²⁹Tigeṅ aô wasôm têṅ mac bu Kiṅ Solomon iṅ sôc ṅakwê ṅayham andô, magoc iṅ ndê gôlôn ti ṅawasi hôc gêlêc ṅaola dinaṅ daṅ su dom. ³⁰O mac lau naṅ akêṅ whiṅ gwalec, aṅgô! Kwaṅ ti ṅaola nom-ṅa a sêlhac bêc daêsam dom, ma lau oc sêkêṅ ya neṅ su. Magoc Anötö kêṅ gêṅ dau ti ṅadalô ṅayham, ma yob ṅapep. Ma bocdinaṅ aṅyalê bu yom ṅandô, iṅ oc yob mac, ma kêṅ ṅakwê têṅ mac whiṅ. ³¹Bocdinaṅ

ahêgo daôm dom ma asôm bu ‘Daneŋ sake?’ me ‘Danôm sake?’ me ‘Dasôc ŋakwê bocke?’ lec dom. ³²Lau sambuc naŋ sêŋyalê Anötö dom, naŋ sêhêgo dau tu gêŋ hoŋ dinaŋ-ŋga, tigeŋ Damam undambê-ŋga kêyalê su bu mac apônda gêŋ hoŋ dinaŋ. ³³Gêŋ ŋamata-ŋga akôm ŋaŋga bu atap malam sa yêc Anötö ndê gôliŋ ŋapu, ma bu asa iŋ ndê lêŋ gitêŋ. Ma iŋ oc yob mac tu gêŋ nom-ŋga-ŋga whiŋ.

³⁴“Bocdinaŋ ambo ti nem ŋalôm ŋawapac tu gêŋ laŋsê-ŋga dom. Ahu siŋ yêc e laŋsê dau hóc asê. Ŋawapac bêc tigeŋ-ŋga naŋ gitôm bêc tigeŋ dinaŋ.”

Dapu lau ŋambwa dom

(Luk 6:37-42)

7 ¹Ma Yisu sôm, “Alic lau sac ŋambwa tu ŋac si lêŋ ti sakiŋ-ŋga dom, dec Anötö oc lic mac sac tu nem-ŋga dom. ²Bu Anötö oc êŋsahê mac tôm mac aŋsahê lau, ma nem dôhôn mac nem lêŋ ti sakiŋ tôm dôhôn naŋ mac am dôhôn lau si.

³“Tu sake-ŋga am hêgo daôm tu gêŋ golop sauŋ naŋ yêc nem asidôwa tandô, tigeŋ gêŋ golop atu naŋ yêc am daôm tanôm, naŋ gêlic apu? ⁴Ma bocke am sôm têŋ nem asidôwa, ‘Aö bu wakôc gêŋ golop naŋ yêc am tanôm, naŋ sa.’ Tigeŋ gêŋ golop atu póc daôm nem tanôm ahuc? ⁵Am ŋgac tim yom lau-ŋga! Kôc gêŋ golop atu sa yêc daôm tanôm muŋ e tanôm ŋawa sa, naŋ goc kôc gêŋ golop sauŋ dinaŋ sa yêc nem asidôwa tandô.”

Dayob Anötö ndê gêŋ dabuŋ ŋapep

⁶“Akêŋ gêŋ dabuŋ têŋ giam dom, b u oc sêkac dau kwi ma sêseŋ mac. Ma ambaliŋ nem gôlôn ŋayham têŋ bôc dom, bu oc sêkwê popoc.”

Anötö iŋ ŋadau bu kêŋ gêŋ têŋ yac-ŋga

⁷“Ateŋ gêŋ têŋ Anötö, dec oc akôc ŋandô, aŋsalê iŋ ti ndê lêŋ, ma oc atap sa, ma bu amati gatam oc lêc su têŋ mac. ⁸Bu Anötö kêŋ gêŋ têŋ lau hoŋ naŋ sêndac iŋ, ma lau hoŋ naŋ sêŋsalê iŋ ti ndê lêŋ, naŋ oc sêtap sa, ma ŋac naŋ sêmati gatam naŋ oc lêc su têŋ ŋac.

⁹“Mac dambai aŋgô! Nem balê daŋ bu teŋ gö têŋ am, dec am oc kêŋ hoc têŋ iŋ, a? ¹⁰Ma bu teŋ i oc kêŋ mboc sac têŋ iŋ, a? ¹¹Mba! Mac lau sac, tigeŋ atoc nem balêkoc sa ŋa gêŋ ŋayham. Magoc Damam naŋ mbo undambê iŋ gitêŋ eŋ, ma oc kêŋ gêŋ ŋayham-ŋayham eŋ têŋ lau naŋ sêteŋ iŋ. ¹²Akôm mêtê ŋayham têŋ lau hoŋ, gitôm mêtê ŋayham naŋ mac atac whiŋ bu sêkôm têŋ mac. Yom hoŋ naŋ Moses ti lau propet sêto, naŋ hêganônŋ yac dakôm mêtê ŋayham bocdinaŋ.”

Yom seŋ lu-ŋga

¹³“Aŋsahê ŋaŋga bu atap gameŋ andöc tamli ŋapaŋ-ŋga sa, magoc aŋyalê bu gatam gameŋ dinaŋ-ŋga iŋ gatam sauŋ. Bu gameŋ andiŋam-

nga dê yêc, ma seŋ têtŋ gameŋ dau iŋ seŋ atu, ma ŋagatam atu bocdinaŋ. Lau daêsam sêsa seŋ atu dinaŋ, ma oc sêsôc gatam atu dau. ¹⁴Magoc gameŋ dandöc taŋli ŋapaŋ-ŋ ga ŋagatam iŋ gatam sauŋ, ma seŋ têtŋ gameŋ dinaŋ iŋ seŋ atu dom, ma lau daêsam oc sêtap sa dom.”

Yom pi propet tasanj

¹⁵“Ayob daôm tu propet tasanj-ŋga. Ŋac sêtôm giam pôm naŋ sêmpanj dau ahuc ŋa domba ŋamlic, tu bu sêti gasuc domba-ŋga ma sêsej ŋac su. Ŋalêtŋ tigej propet tasanj oc sêtêtŋ mac sêloc tu sêŋsau mac-ŋga. ¹⁶Aŋsahê ŋac si lêtŋ dec tôm bu mac aŋyalê bu ŋac lau tasanj. Ŋalêtŋ tigej, yac dalic a ŋandô ma taŋyalê a dau bu ŋayham me sac. Oc tôm dom bu dahijŋ ŋandô ŋayham yêc a sac. ¹⁷Yomandô! A ŋayham sem ŋandô ŋayham, ma a sac sem ŋandô sac. ¹⁸A ŋayham daŋ gitôm dom bu nem ŋandô sac, ma a sac gitôm dom bu nem ŋandô ŋayham. ¹⁹Ma a hoŋ naŋ sem ŋandô sac, naŋ oc sêlêtŋ su ma sêtuc pi ya ndi, ma ya neŋ su. ²⁰Bocdinaŋ aŋsahê propet si lêtŋ, ma aŋyalê ŋac bu propet ŋayham me sac.”

Pômdau kêyalê iŋ ndê lau su

²¹“Lau daêsam sêsam aô bu, ‘Pômdau,’ tigej ŋac hoŋ oc sêtap gameŋ undambê-ŋga sa dom. Mba! Lau naŋ daŋga wambu Damaŋ undambê-ŋga ŋapep, ma sêkôm mêtê tôm iŋ atac whiŋ, naŋ oc sêtap undambê sa. ²²Têtŋ Anötö ndê bêc êmatôc lau-ŋga, naŋ lau tasanj daêsam oc sêsôm têtŋ aô bu, ‘Pômdau, Pômdau! Yac ahoc yom asê atôm propet, ma atijŋ ŋalau sac su ma akôm gêŋ dalô daêsam am am aŋôm. Bocdinaŋ kôc yac sa.’ ²³Tigej aô wasôm têtŋ ŋac bu, ‘Aô kayalê mac dom sambuc mac lau sac. Alhô su yêc aô!’ ”

Yom gôliŋ pi ŋgac lu naŋ sêkwê andu

(Luk 6:46-49)

²⁴“Lau naŋ sêŋgô anej yom ma sêkôm ŋandô sa, naŋ sêtôm ŋgac tiguaç naŋ kwê ndê andu kalhac nom ŋaŋga ma kêŋ hoc kêgapiŋ alhô dôŋ. ²⁵Têtŋ ndoc u gic e bu hêc, ma mbu puc ŋadinda hôc pi andu dau, naŋ andu dau ku sa dom bu hoc kêgapiŋ dôŋ. ²⁶Magoc lau naŋ sêŋgô anej yom ma sêkôm ŋandô sa dom, naŋ sêtôm ŋgac gauc mba naŋ kwê ndê andu kalhac nom babalê. ²⁷Ma u gic ti bu hêc, ma mbu puc ŋadinda hôc pi andu dau, goc ku sa ma tisac sambuc.”

²⁸Yisu gic bata ndê yom dinaŋ, ma lau hoŋ sêhêdaê tu iŋ ndê yom-ŋga. ²⁹Ŋahu bu yom naŋ iŋ kêdôhôn têtŋ ŋac naŋ yom ti ŋaclai, hôc gêlêc lau Israel-ŋga si kêdôhônwaga yomsu-ŋga si yom hoŋ su.

Yisu kôm ŋgac ti gêmbac leprasi ŋayham sa

(Mak 1:40-45; Luk 5:12-14)

8 ¹Yisu sip akêtŋ lôc meŋ, ma lau daêsam sêŋkuc iŋ. ²Ma ŋgac daŋ ti gêmbac †leprasi têtŋ iŋ gi, goc pôn haduc ma sôm, “Pômdau. Am bu

tac whiŋ dec gitôm bu am oc kôm aô ñamlic ñawasi sa.” ³Yisu kêmatoç amba sa gi ma kêmasec iŋ, ma sôm, “Aô atac whiŋ, dec wasôm têt am bu ñamlic ñawasi sa.” Ma ñagahô eŋ gêm bac hu iŋ siŋ, ma iŋ ñamlic ñayham sa. ⁴Ma Yisu sôm têt iŋ, “Am ñgô! Gêt ñaŋ kwahic dec hôc asê am, ñaŋ sôm asê têt lau daŋ dom. Tigeŋ têt ðdabuŋsiga ndi, tôc daôm têt iŋ bu lic bu am nem ñamlic ñawasi sa su. Ma kêt da tôm yom su ñaŋ Moses kêt têt yac. Ma ñalêt dinaŋ lau hoŋ oc sêtŋyalê bu am ñamlic ñayham sa.”

Ñgac bata siŋ-ŋga daŋ kêt whiŋ ñaŋga
(Luk 7:1-10)

⁵Tiŋambu Yisu sôc malac Kapenaom gi. Ma ñgac bata Rom-ŋga daŋ, ñaŋ gêm gôliŋ lau siŋ-ŋga 100, ñaŋ têt iŋ gi ma ndac iŋ bu nem iŋ sa. ⁶Iŋ sôm, “Pôm d au, aneŋ ñgac akiŋ daŋ ndôc bôliŋ. Iŋ yêc andu ñapaŋ ma kêsahê ñandê atu.” ⁷Ma Yisu sôm têt iŋ, “Aô oc waloc ma wakôm iŋ ñayham sa.” ⁸Tigeŋ ñgac bata dau ô yom ma sôm, “Pôm d au, am ñgac atu ma aô ñgac apa, dec mayaŋ dauŋ bu am sôc aneŋ andu. Tigeŋ aô kayalê su bu am ñgac ti ñaclai atu, ma bocdinaŋ dec am bu ndic atu yom, goc aneŋ ñgac akiŋ oc ñayham sa. ⁹Bu aô dauŋ daŋaŋ wambu lau ñaŋ si ñaclai hôc gêlêc aô neŋ, ma aneŋ lau siŋ-ŋga daŋa wambu aô. Aô bu wasôm têt daŋ, ‘Am ndi!’ goc iŋ oc ndi. Ma bu wasôm têt daŋ, ‘Am mweŋ,’ goc iŋ oc meŋ. Ma bu wasôm têt aneŋ ñgac akiŋ bu kôm gêt daŋ, goc iŋ oc kôm.”

¹⁰Yisu ñgô ñgac bata ndê yom ma hêdaê, ma sôm têt lau ñaŋ sêtŋkuc iŋ bu, “Yomandô wasôm têt mac, bu yêc lau Israel hoŋ aô gatap ñac si daŋ ñaŋ kêt whiŋ ñaŋga gitôm ñgac Rom-ŋga dindec, ñaŋ sa dom. ¹¹Ñgô! Lau daêsam ñaŋ lau Israel dom, ñaŋ oc sêmeŋ akêt nom ñabatŋ hoŋ, ma sêtap mwasiŋ atu sa yêc undambê sêwhiŋ Abraham, Aisak ma Jakob. ¹²Tigeŋ lau Israel daêsam ñaŋ gauc gêm bu sic waê bu sêndôc undambê, ñaŋ Anôtô oc êmasuc ñac su sêndôc gameŋ ñasec-ŋga, ma sêtaŋ ti lhô êŋsiŋ pi dau.”

¹³Yisu sôm yom dinaŋ têt lau hoŋ su, goc sôm têt ñgac bata, “Am lhô mbu ndi. Aô oc wakôm am nem ñgac akiŋ dinaŋ ñayham sa, tôm am kêt whiŋ.” Ma têt ndoc dau dinaŋ gêm bac hu ñgac akiŋ dau siŋ, ma iŋ ñayham sa.

Yisu kôm lau daêsam ñayham sa
(Mak 1:29-34; Luk 4:38-41)

¹⁴Tiŋambu Yisu têt Pita ndê andu gi ma gêlic Pita lawawê gêm bac lic ñandê atu ma yêc. ¹⁵Yisu têt iŋ gi ma kêmasec iŋ amba, goc gêm bac hu iŋ siŋ. Ma iŋ tisa, ma ndê gêt daneŋ-ŋga ma kêt têt Yisu.

¹⁶Têt telha dinaŋ ac gi sip su, g oc lau malac-ŋga sêkôc lau daêsam ñaŋ ñalau sac sêmbo ñac si ñalôm, ñaŋ sa sêtêt Yisu si. Ma iŋ gic atu

yom, goc ñalau sac sêhu lau dau siñ, ma iñ kôm lau gêmbac hoñ ñayham sa.

¹⁷ Ñalêñ dau dinañ yom nañ propet Aisaya sôm su nañ dec ñandô sa. Muñ-ña iñ to yom pi Mesaya bocdec bu:

Iñ hôc yac neñ ñawapac tu nem yac sa-ña.

[Ais 53:4]

Lêñ tañkuc Yisu-ña

(Luk 9:57-62)

¹⁸ Têñ bêc dañ Yisu gêlic lau daêsam sêñgili iñ ahuc, goc sôm têñ ndê ñngacsêñomi bu sêlom bugictoñ ma sêpi dañga sêndi. ¹⁹ S êmasañ dau sêmbo ma kêdôhôn-waga yomsu-ña dañ meñ ma sôm têñ iñ, “Kêdôhôn-waga, aô bu wañkuc am, wawhiñ am watêñ gameñ bocke nañ am oc ndi.” ²⁰ Ma Yisu ô iñ ndê yom ma sôm, “Giam pôm si hocsuñ yêc, ma mbac lôlôc-ña si ñaic yêc, tigeñ ñamalac ndê Atu dau ndê mala yêc bêc-ña mba.”

²¹ Ma sêñjom dañ sôm têñ iñ, “P ômdau, aô bu wañkuc am, magoc gêñ ñamata-ña aô wandi wambo wawhiñ aneñ lau e añsuhuñ damañ su nañ.” ²² Tigeñ Yisu sôm, “Mba! Am bu gauc nem bu êmkuc aô, nañ gêñ ñamata-ña. Tec lau batê sêñsuhuñ lau batê.”

Yisu kôm bu ñamponj timalô

(Mak 4:35-41; Luk 8:22-25)

²³ Yisu sôm yom dinañ su, goc pi wañ dañ gi. Ma iñ ndê ñgac-sêñomi sêñkuc iñ ma sêpi wañ sêwhiñ. ²⁴ Sêlac si, ma mbu puc atu ma gêli bu ñamponj sa gic sip wañ, e kêpiñ bu wañ pac. Tigeñ Yisu yêc bêc yêc wañ. ²⁵ Dec sêtêñ iñ si, sêuñ iñ sa ma sêsôm, “Pômdau, nem yac sa, bu yac oc dapac dandiñ.” ²⁶ Magoc Yisu sôm têñ ñac, “O mac lau nañ akêñ whiñ gwalec. Tu sake-ña mac atôc daôm?” Goc iñ tisa ma sôm yom ñañga têñ mbu ti bu ñamponj, ma gameñ ñañeñ sa. ²⁷ Ma ñac hoñ sêhêdaê ma sêsôm têñ dandi, “Ei! Iñ ñgac kaiñ bocke? Bu gêñ hoñ sêsôc iñ ndê yom ñapu, ma mbu ti bu sêwhiñ.”

Yisu soc ñalau sac su yêc ñgac lu

(Mak 5:1-20; Luk 8:26-39)

²⁸ Ñac sêhêc asê bugictoñ ñadañga ma sêsôc lau Gadala-ña si gameñ si. Ma yêc dindê ñgac lu sêsa akêñ ôm sêhê-ña ma sêtêñ Yisu si. Iñlu ñgac lu nañ ñalau sac sêmbo iñlu ñalôm, ma sêkôm iñlu sêti ñgac pôm. Ma bocdinañ lau hoñ sêtôc iñlu ma sêmbo ahê iñlu, ma iñlu sêndôc ôm sêhê-ña ñapañ. ²⁹ Têñ ndoc iñlu sêhêc asê Yisu, nañ ñalau sac nañ sêmbo iñlu ñalôm, nañ sêmbwêc bocdec bu, “O Anötô ndê Atu! Am bu kôm sake têñ yac? Têm bu Anötô êmatôc yac-ña yêc dôñ yêc. Ma bocke am kwahic dec mweñ bu kôm yac ñayom?”

³⁰Bôc toj atu danj seņ gêņ sêmbo ahê gameņ nanj ɲac sêlhac. ³¹Goc ɲalau sac sêteņ Yisu bu, “Am bu soc yac su, nanj kêtj yac asip bôc ɲalôm.” ³²Ma iņ sôm têtj ɲac, “Andi!” Goc sêhu ɲgac lu dinaņ siņ ma sêsôc bôc ɲalôm si. Ma bôc hoņ sênti sêsip salic sac, sêsip bugictôņ ɲalôm si, ma bu kô ɲac sêmbac ndu. ³³Lau sêyob bôc-ɲga sêlic gêtj dau, goc sêlhô sêsa malac si, ma sic miņ têtj lau malac-ɲga pi gêtj hoņ dinaņ, ma pi gêtj nanj Yisu kôm têtj ɲgac lu ti ɲalau sac. ³⁴Ma lau malac-ɲga hoņ sêsa sêtêtj Yisu si, ma têtj ndoc sêlic iņ, nanj sêteņ iņ bu hu ɲac si gameņ siņ.

Yisu kôm ɲgac bôliņ danj ɲayham sa
(*Mak 2:3-12; Luk 5:17-26*)

9 ¹Goc Yisu pi waņ gi ma gic bugictôņ kic, ma têtj iņ ndê malac Kapenaom gi. ²Ma lau gameņ dinaņ-ɲga sêmbalaņ ɲgac bôliņ danj yêc sac danj ma sêtêtj Yisu si. Iņ gêlic bu ɲac sêkêtj whiņ iņ, dec sôm têtj ɲgac bôliņ dau, “Aneņ balê, atac ɲayham sa. Kwahic dec aô oc wasuc am nem sac kwi.”

³Kêdôhônwaga yomsu-ɲga ɲatô s êņgô Yisu ndê yom dau, goc sêsôm têtj dandi, “Iņgac dê ndê yom sac sambuc! Anôtô tigeņ gitôm bu suc sac kwi.” ⁴Yisu kêyalê ɲac si gauc, goc ndac ɲac, “Tu sake-ɲga mac gauc gêm yom sac yêc nem ɲalôm? ⁵Mac akêtj whiņ dom bu aneņ ɲaclai yêc bu wasôm têtj ɲgac dau bu, ‘Aô wasuc am nem sac kwi.’ Bocdinaņ aô wasôm têtj iņ bu, ‘Tisa ma êmsêlêņ.’ ⁶Ma têtj ndoc mac alic bu aneņ yom dinaņ ɲandô sa, goc aņyalê bu Anôtô kêtj ɲaclai têtj ɲamalac ndê Atu yêc nom, bu suc ɲamalac si sac kwi whiņ.” Goc Yisu sôm têtj ɲgac bôliņ bu, “Tisa ma hóc nem mbô sa, ma lhô têtj nem andu ndi!” ⁷Goc ɲgac dau tisa ma kôlhô têtj ndê andu gi. ⁸Ma lau daêsam nanj sêlic gêtj dau sêhêdaê ɲandô, ma sêmpiņ Anôtô nanj kêtj ɲaclai bocdinaņ têtj ɲamalac.

Yisu kêgalêm Matyu bu êņkuc iņ
(*Mak 2:13-17; Luk 5:27-32*)

⁹Yisu kêsêlêņ gi ma gêlic ɲgac danj ɲaê Matyu nanj ndôc ndê mala kôc takis-ɲga. Ma iņ sôm têtj iņ, “Êmkuc aô!” Goc Matyu tisa ma kêkuc iņ.

¹⁰Tiņambu Yisu gêtj gêtj ndôc Matyu ndê andu ɲalôm, ma lau daêsam sêmeņ ma seņ gêtj sêndôc sêwhiņ Yisu ti ndê ɲgacsêņomi. ɲac lau sêkôc takis-ɲga ti lau ɲatô nanj lau Palêsai sêsam ɲac bu lau sac. ¹¹Ma lau Palêsai ɲatô sêlic gêtj dinaņ, goc sêndac iņ ndê ɲgacsêņomi bocdec bu, “Tu sake-ɲga mac nem kêdôhônwaga gêtj gêtj ndôc whiņ lau sac dindê?” ¹²Yisu ɲgô ɲac si yom dau ma sôm, “Lau nanj sêlic dau bu gêmbac mba, nanj oc sêņsalê dokta dom, magoc lau ti gêmbac oc sêņsalê dokta. ¹³Gauc nem Anôtô ndê yom nanj propet akwa danj to yêc bocdec bu, ‘Gêņ atu nanj aô atac whiņ, nanj bu mac tamwalô lau, hóc gêlêc domba hoņ nanj mac bu andic ndu ma akêtj ti da, nanj su.’ Andi ma akôc gauc pi yom dau e aņyalê

ɲahu ɲapɛp. Bu aö gamɛɲ bu wanɲgalɛm lau naɲ sêlic dau bu lau gitɛɲ, naɲ sa dom. Aö gamɛɲ bu wanɲgalɛm lau sac sa, bu sɛnem dau kwi ma sêsöc Anötö ndê göliɲ ɲapu.”

Yao gɛɲ danɛɲ-ɲga-ɲga
(*Mak 2:18-20; Luk 5:33-35*)

¹⁴Ma Jon, ɲgac Kêku Lau-ɲga ndê sɛɲomi ɲatö sêtɛɲ Yisu si ma sɛndac iɲ bu, “Bocke dec yac ti lau Palêsai akɛɲ bêc ɲatö bu anɛɲ gɛɲ dom tu gauc nem Anötö-ɲga, tigeɲ am nem ɲgacsɛɲomi seɲ gɛɲ tòm bêc hoɲ?”
¹⁵Ma Yisu sôm tɛɲ ɲac, “ɲgac nem awhê-ɲga daɲ bu ɛɲgalɛm lau sa sɛmbo sêwhiɲ iɲ tu sɛneɲ mwasiɲ nem awhê-ɲga, dec oc tòm dom bu sêhu gɛɲ danɛɲ-ɲga siɲ ma sɛndöc ti ɲalôm ɲawapac tɛɲ ndoc ɲgac dau mbo whiɲ ɲac. Mba! Ma bocdinaɲ anɛɲ ɲgacsɛɲomi sɛmbo sêwhiɲ aö ti atac ɲayham, ma sêhu gɛɲ danɛɲ-ɲga siɲ dom. Tigeɲ ndoc oc meɲ naɲ lau oc sêkôc aö su yêc ɲac, ma tɛɲ tɛm dinaɲ ɲac oc ɲalôm ɲawapac ma sɛɲkuc lɛɲ dahu gɛɲ danɛɲ-ɲga siɲ-ɲga.”

Yisu ndê yom gitôm gɛɲ wakuc
(*Mak 2:21-22; Luk 5:36-39*)

¹⁶Ma Yisu sôm, “Yac dasi po wakuc pi ɲakwê akwa naɲ kic, naɲ dom. Bu po wakuc oc hôc ɲakwê akwa kic e tisac sambuc. ¹⁷Ma tɛɲ ndoc lau sɛmasaɲ wain wakuc, naɲ sêkêc sip bôc ɲamlic wain-ɲga akwa dom. Mba! ɲac bu sêkôm, goc wain wakuc oc hôc ɲamlic akwa kôc. Ma wain oc wê ɲinga, ma ɲamlic dau oc tisac. Bocdinaɲ lau sêkêc wain wakuc sip bôc ɲamlic wakuc, ma lu-lu oc sêyêc ɲayham.”

Yisu kôm awhê lu ɲayham sa
(*Mak 5:21-43; Luk 8:40-56*)

¹⁸Yisu sôm yom dinaɲ mbo, ma ɲgac bata daɲ meɲ pôn haduc tɛɲ iɲ ma sôm, “Aneɲ atuɲwê kwahic dec mbac ndu su, magoc am bu mweɲ ma kɛɲ amam sac iɲ, dec iɲ oc mbo tali tiyham.” ¹⁹Goc Yisu tisa ma iɲ ti ndê ɲgacsɛɲomi sêwhiɲ ɲgac dau si.

²⁰Sêɲsêlɛɲ sɛmbo, ma awhê daɲ tigasuc iɲ kalhac iɲ dômbwê ma kêmasec iɲ ndê ɲakwê ɲadali. Awhê dau hôc ɲawapac gɛm dac-ɲga ɲapaɲ gitôm yala 12 su, dec ²¹gauc gɛm yêc dau bu, “Aö bu wamasec iɲ ndê ɲakwê ɲambwa, dec oc kôm aö ɲayham sa tiyham.” ²²Yisu kac dau kwi e gêlic iɲ, goc sôm, “Aneɲ bawhê, atac pa su. Am ɲayham sa tiyham tu am nem kɛɲ whiɲ aö-ɲga.” Ma tɛɲ ndoc dau dinaɲ awhê dau ɲayham sa.

²³Ma tiɲambu Yisu gi e hôc asê ɲgac bata dau ndê andu, ma gêlic bu lau toɲ atu sɛmbo. ɲatö sêyu gasuc ma ɲatö sɛtaɲ ti ɲanta atu. ²⁴Goc sôm, “Alhö su, bu bawhê dau mbac ndu dom. Iɲ yêc bêc naɲ yêc.” Magoc

ɲac sêmbwac iɲ. ²⁵Dec Yisu sôm bu sêsoc ɲac sêsa sêndi, goc sôc gi kêm bawhê sip amba, ma iɲ tisa. ²⁶Ma yom dau ɲawaê tiapa sambuc yêc gameɲ dinaɲ.

Yisu kôm ɲgac tapec lu ɲayham sa

²⁷Dinaɲ su, goc Yisu kêsêlêɲ gi. Ma ɲgac tapec lu sêɲkuc iɲ ma sêmbwêc, “O †Dawid ndê Atu, tamwalô alu!” ²⁸Magoc Yisu kêsêlêɲ gi sôc andu daɲ, dec ɲgac lu dinaɲ sêtêɲ iɲ si, ma iɲ ndac, “Amlu akêɲ whiɲ bu aneɲ ɲaclai yêc bu wakôm amlu ɲayham sa, me mba?” Ma iɲlu sêsôm, “Aêc, Pômdu!” ²⁹Goc Yisu kêmasec iɲlu tandô, ma sôm bu, “Tu amlu akêɲ whiɲ aö-ɲga, dec gêɲ naɲ amlu andac, naɲ oc ɲandô sa.” ³⁰Ma iɲlu tandô po asê. Goc Yisu gic yao iɲlu bu sêsôm gêɲ dau ɲayom asê têɲ lau daɲ dom. ³¹Magoc iɲlu sêsa si, ma sêkôm iɲ ndê waê sa e tiapa gêm gameɲ dinaɲ ahuc.

Yisu kôm ɲgac awha mba sôm yom asê

³²ɲac sêsa si ma lau ɲatô sêtêɲ Yisu sêmeɲ. ɲac sêkôc ɲgac daɲ, naɲ ɲalau sac kôm iɲ awha mba. ³³Yisu soc ɲalau sac sa awê gi su, goc awha mba dau sôm yom asê. Lau daêsam dinaɲ sêseɲ amba ma sêsôm bu, “Yac dalic gêɲ daɲ bocdec yêc Israel dom andô.” ³⁴Magoc lau Palêsai sêsôm bu, “ɲɲ kôc ɲaclai yêc ɲalau sac si ɲadau Sadaɲ, dec tiɲ ɲalau sac su.”

Yisu tawalô lau

³⁵Ma Yisu kêsêlêɲ golom-golom malac atu ti sauɲ. Iɲ kêdôhônɲ lau mbo lôm wê-ɲga, ma hoc ɲawaê ɲayham pi Anötô ndê gôliɲ asê. Ma iɲ kôm lau ti gêmbac tidau-tidau hoɲ ɲayham sa.

³⁶Magoc têɲ ndoc iɲ gêlic lau daêsam naɲ sêɲkuc iɲ, naɲ tawalô ɲac. ɲahu bu iɲ gêlic ɲac sêtôm domba naɲ si ɲgac yob ɲac-ɲga mba, dec giam pôm sêtê ɲac saliɲ-saliɲ ɲapaɲ. ³⁷Goc iɲ sôm têɲ iɲ ndê ɲgacsêɲomi, “Gêɲ ɲandô daêsam yêc ôm, magoc lau sêndic ɲandô sa-ɲga daêsam dom. ³⁸Bocdinaɲ ateq mbec têɲ ôm ɲadau bu êɲkiɲ lau gwelêɲ-ɲga sêsôc iɲ ndê ôm ma sêndic gêɲ ɲandô sa.”

Yisu kêyaliɲ †aposel 12 sa

(Mak 3:16-19; Luk 6:12-16)

10 ¹Yisu ta iɲ ndê ɲgac-sêɲomi 12 sêtêɲ iɲ si, ma kên ɲaclai têɲ ɲac bu sêsoc ɲalau sac su yêc lau, ma bu sêkôm gêmbac hoɲ ɲayham sa. ²Aposel 12 dau si ɲaê bocdec. ɲgac ɲamata-ɲga iɲ Saimon naɲ sêsam bu Pita, lu iɲ asi Andru, ma Sebedi ndê atu lu Jems lu Jon, ³P ilip ma Batolomeas, Tomas ma ɲgac kôc takis-ɲga Matyu, ma Alpayas ndê atu Jems, Tadaus, ⁴Saimon naɲ sêsam bu ‘ɲgac †Selot,’ ma Judas Iskeriot naɲ tiɲambu hoc Yisu asê.

Yisu kêkiñ aposel 12 sêsa si bu sênem mêtê lau
(Mak 6:7-11; Luk 9:1-5)

⁵Yisu kêkiñ lau 12 dinañ sêsa si bu sênem mêtê, ma gic yomsu ñac bocdec bu, “Asôc lau apa ti lau †Samaria-nga si malac dañ dom, ⁶tigen gêñ ñamata-nga atêñ domba Israel-nga nañ siñga su, nañ andi. ⁷Anem mêtê ma asôm têtñ lau bu Anötö ndê gôliñ meñ kêpiñ su. ⁸Akôm lau gêmbac ñayham sa, ma akôm lau ti gêmbac leprasi ñamlic ñawasi sa. Auñ lau batê sêtisa, ma asoc ñalau sac su yêc lau. Anötö kêñ ñaclai têtñ mac ñaôli mba, ma bocdinañ anem lau sa ñambwa. ⁹⁻¹⁰Ma têtñ ndoc mac añsêlêñ andi, nañ gauc nem wapa señ-nga dom. Añsêlêñ amam sawa, akôc mone dom, ampwic talhi dom, akôc ñakwê aô daôm-nga ti atapa dom, ma ahôc tôc dom. Ñalêñ solop bu lau sêlôm lau nañ sem gwelêñ mêtê-nga ma sêpuc ñac dôñ ña gêñ dinañ, nañ ti ñac si ñaôli ô gwelêñ.

¹¹“Malac bocke mac bu asôc andi, nañ añsalê ñamalac ñayham nañ toc Anötö sa ñapep, bu ambo awhiñ iñ e mac ahu malac dau siñ. ¹²Têtñ ndoc mac api iñ ndê andu andi, nañ anem mbec iñ ndê lau ña mbec yom malô-nga. ¹³Ma ñac lau dau bu lau gitêñ, goc yom malô oc yêc ñac. Ma ñac bu lau gitêñ dom, goc mac nem mbec yom malô-nga oc gacgeñ yêc mac-nga. ¹⁴Ma lau malac dañ bu sêkôc mac ti nem yom sa dom, goc ahu malac me andu dinañ siñ ma atoñ kop su yêc gahim. ¹⁵Aô wasôm têtñ mac bu têtñ Anötö ndê bêc êmatôc lau-nga, lau malac dinañ-nga oc sêtap ñagêyô sac sambuc sa, hóc gêlêc ñagêyô nañ iñ oc kêñ têtñ lau Sodom ti Gomora-nga têtñ têtñ ñambu-nga, nañ su.”

Yisu ndê lau oc sêtap kisa sa
(Mak 13:11-13; Luk 21:12-17)

¹⁶“A ñgô su nañ! Aô wañkiñ mac asa andi, atôm domba nañ sêsip giam pôm si gameñ. Bocdinañ akôc gauc ñapep ma akôm nem gwelêñ, ma akôm mêtê ñayham eñ e lau dañ gitôm dom bu sêpu mac. ¹⁷Ayob daôm têtñ lau nañ sêkêñ whiñ aô dom, bu ñac oc sêkêñ mac atêñ lau sêmatôc yom-nga andi, ma sêhi mac ña sô yêc ñac si lôm wê-nga. ¹⁸Tu mac añkuc aô-nga dec ñac oc sêkêñ mac alhac gôliñwaga ti kiñ si añgô-nga. Ndoc dinañ ti mac nem ndoc bu awhê aneñ yom sa têtñ lau atu-tu dinañ, ma têtñ lau akêñ gameñ hoñ, nañ whiñ. ¹⁹Ma têtñ ndoc sêkôc mac dôñ, nañ ahêgo daôm dom tu yom asôm-nga. Anötö oc nem mac sa tu asôm yom-nga. ²⁰Ma yom nañ mac bu asôm, nañ mac nem yom dom. Damam undambê-nga oc kêñ iñ ndê Ñalau puc mac dôñ, ma hóc nem awham sa.

²¹“Têtñ ndoc ñawapac-nga dinañ, lau nañ sêkêñ whiñ dom oc sêhoc si asidôwai sêkêñ whiñ aô-nga asê bu sêndic ñac ndu, ma dambai oc sêkôm têtñ atui boc-dinañ. Balêkoc oc sêli dau sa têtñ damba ti dindai, ma sêkêñ ñac sêtêñ lau bu sêndic ñac ndu. ²²Ma lau sambob oc atac tec mac tu aô-

nga. Magoc asa nan bu lhac nannga ma hu aö sinj dom, nan oc tap Anötö ndê mwasiñ nem in si-nga sa. ²³Ma lau bu sêkên kisa mac, goc ahu nac si malac sinj ma atên malac danj andi. Yom nandô aö wasôm têt mac! Mac nem gwelenj anem mêtê nawaê nayham-nga yêc malac Israel-nga hoj oc pacndê dom, e ñamalac ndê Atu meñ sa tiawê.”

Lau nan sênkuc Yisu oc sêhóc nawapac gitôm in dau

(Luk 6:40)

²⁴“Kwapuc danj oc hôc gêlêc gwalam akwa nanj kêdôhôn in, nanj dom. Ma ngac akij oc hôc gêlêc in ndê ñadau dom. ²⁵Kwapuc bu tôm ndê gwalam akwa ma ngac akij bu tôm ndê ñadau, goc tôm. Lau sêpu gôlôwac ñadau aö ma sêsam aö bu †Belsebal, ma bocdinañ nac oc sêkôm têt ñadau ndê lau mac, hôc gêlêc su.”

Atôc lau nom-nga dom

(Luk 12:2-7)

²⁶“Magoc atôc daôm tu lau nanj sêkên kisa mac-nga dom. Ñahu bu gên hoj nanj lau sem ahuc, me yêc sinj dau, nanj oc meñ sa tiawê. ²⁷Yom nanj aö gasôm têt mac têt ôbwêc, nanj asôm asê têt acsalô, ma yom nanj aö gac yom sec têt mac, nanj asôm tiatu alhac malac lôm. ²⁸Atôc lau nanj bu sêndic mac ndu-nga dom, bu nac gitôm dom bu sêseñ mac gatôm su whij. Atôc lau dom, magoc atôc Anötö ma asôc in ñapu. Bu mba, goc in gitôm bu kên mac ñamlic ti gatôm lu-lu sêsip lambwam sêndi e sêniñga gacgeñ.

²⁹“Akôc gauc pi mbac kecsoc nanj lau sêlic bu gên ñambwa. Tigen Anötö gêlic gên sauj dinañ bu gên ñambwa dom, ma in bu lôc dom, dec danj oc niñga dom. ³⁰⁻³¹Bocdinañ ahêgo daôm dom, bu Anötö tac whij mac hôc gêlêc mbac kecsoc daêsam su. In kêyalê mac e pi sa, gitôm inj sê mac nem kêclauñ hoj sa timala.”

Dasêc Yisu ahuc dom

(Luk 12:8-9)

³²“Asa nanj sôm asê yêc ñamalac anjô-nga bu inj kên whij aö, nanj aö wasôm inj ndê ñaê asê yêc Damañ undambê-nga anjô-nga. ³³Tigen asa nanj sêc inj ndê kên whij aö-nga ahuc yêc ñamalac anjô-nga, nanj wasêc inj ahuc yêc Damañ anjô-nga bocdinañ.”

Tañkuc Yisu ti dahôc nawapac

(Luk 12:49-53; 14:26-27; 9:48)

³⁴“Gauc nem bu aö gameñ bu wahê wamba lau dom. Mba! Tu aö-nga dec lau oc sêwhê dau kôc ma sêkên kisa dau. ³⁵Tu aö-nga dec damba lu atungac oc sêkên kisa dau, ma dinda lu atuwê, ma lawawê akwa lu lawawê wakuc oc sêkên kisa dau bocdinañ. ³⁶Ñgac danj oc tap inj ndê ñacyo sa yêc inj dau ndê lau.

³⁷“Asa naŋ tac whiŋ damba me dinda me atuŋgac me atuwê hôc gêlêc iŋ ndê atac whiŋ aô su, naŋ oc tôm dom bu ti aneŋ daŋ. ³⁸Ma asa naŋ tec bu hôc iŋ ndê a gicso dau^d ma êŋkuc aô, naŋ tôm dom bu ti aneŋ daŋ bocdinaŋ. ³⁹Lau naŋ takwê gêŋ nom-ŋga ŋapaŋ tu puc ŋac si ŋamlic dôŋ-ŋga, naŋ oc sêniŋga. Magoc asa naŋ bu hu gêŋ nom-ŋga siŋ tu aô-ŋga, naŋ oc mbo tali ŋapaŋ.

⁴⁰“Lau naŋ sêkôc mac sa, naŋ gitôm sêkôc aô dauŋ sa, ma ŋac naŋ sêkôc aô sa, naŋ sêkôc Anötö naŋ kêkiŋ aô gameŋ, naŋ sa. ⁴¹Asa naŋ toc aneŋ propet daŋ sa, ma kôc iŋ sa tu iŋ ti propet gêm aô aŋôŋ-ŋga, naŋ Anötö oc kêŋ ŋagêyô ŋayham têŋ iŋ gitôm iŋ kêŋ têŋ propet dau. Ma asa naŋ toc ŋamalac gitêŋ daŋ sa, ma kôc iŋ sa tu aneŋ ŋaê-ŋga, naŋ Anötö oc kêŋ ŋagêyô ŋayham têŋ iŋ gitôm iŋ kêŋ têŋ ŋgac gitêŋ dau. ⁴²Ma asa naŋ kôm gêŋ sauŋ bocke bu nem lau naŋ sêŋkuc aô, naŋ sa, tôm iŋ kêŋ bu ŋalhuc têŋ ŋac sênôm, naŋ Anötö oc êŋlhiŋ iŋ siŋ dom. Iŋ oc kêŋ ŋagêyô ŋayham têŋ iŋ yomandô.”

11 ¹Yom hoŋ dinaŋ Yisu sôm têŋ iŋ ndê ŋgacsêŋomi 12 tu êndôhônŋ ŋac-ŋga. Iŋ gic bata yom dau, goc kêsêlêŋ golom-golom malac naŋ sêyêc gameŋ Galili-ŋga dinaŋ, ma gêm mêtê ti kêdôhônŋ lau.

Yisu sôm yom pi Jon, ŋgac Kêku Lau-ŋga

(Luk 7:18-35)

²Têŋ ndoc dinaŋ Jon, ŋgac Kêku Lau-ŋga ndöc gapocwalô, ma iŋ ŋgô ŋawaê pi gêŋ hoŋ naŋ Kilisi kôm. Bocdinaŋ iŋ kêkiŋ iŋ ndê sêŋomi ŋatô sêtêŋ Yisu si, ³ma sêndac iŋ bocdec bu, “Anötö gic bata têŋ yac bu oc êŋkiŋ Mesaya. Am daôm dinaŋ, me yac oc akêŋ batanaŋ ŋgac daŋ tiyham?” ⁴Yisu ô yom ma sôm, “Ambu andi ma asôm yom têŋ Jon pi mêtê naŋ mac aŋgô aô gahoc asê, ma pi gêŋ naŋ mac alic aô gakôm. ⁵Lau tapec sêlic gameŋ tiyham, lau bôliŋ sêŋsêlêŋ tiyham, lau ti gêmbac leprasi ŋamlic ŋawasi sa, lau danŋgasuŋ bic sêŋgô yom, lau batê sêtisa, ma lau ŋalôm sawa sêŋgô ŋawaê ŋayham. ⁶A ŋgô! Lau naŋ atac lu-lu tu aô-ŋga dom, naŋ oc sêtap Anötö ndê mwasinaŋ sa.”

⁷Jon ndê sêŋomi sêsa si, ma Yisu sôm yom pi Jon têŋ lau toŋ atu naŋ sêmbo sêwhiŋ iŋ. Iŋ ndac ŋac bocdec bu, “Têŋ ndoc mac asa atêŋ Jon yêc gameŋ sawa a, dec gauc gêm bu atap ŋamalac kaiŋ bocke sa? Mac bu alic ŋgac gauc babalê gitôm gakoc naŋ mbu kêwic, a? ⁸Mac asa a bu alic ŋgac daŋ naŋ sôc ŋakwê ŋayham, a? Mba! Lau naŋ sêsôc ŋakwê ŋayham, naŋ sêmbo gameŋ ŋayham gitôm kiŋ si andu. ⁹Bocdinaŋ aô wandac mac, mac asa a bu alic sake? Bu alic propet daŋ? Yomandô! Iŋ propet daŋ, ma iŋ hôc gêlêc propet hoŋ su. ¹⁰Propet akwa daŋ to yom naŋ Anötö sôm têŋ

^d **10:38** Yisu ndê yom pi a gicso dau, naŋ ŋahu bu tamasanaŋ dauŋ tôm bêc hoŋ bu dahôc ŋandê ti ŋawapac tu iŋ-ŋga e tôm dambac ndu tôm iŋ dau mbac ndu.

Mesaya bocdec bu, ‘Aö wan^{ki} ane^{ng} ngac ahe^{ng}-nga mu^{ng} am, bu êmasa^{ng} am nem se^{ng}.’ Y om pi ngac ahe^{ng}-nga dau hêganô^{ng} Jon solop. ¹¹Yêc ñamalac nom-nga, da^{ng} hôc gêlêc Jon, ñgac Kêku Lau-nga su dom. Tige^{ng} aö wasôm yom ñandô tê^{ng} mac, bu lau ho^{ng} na^{ng} sêmbo Anötö ndê gôli^{ng} ñapu, lau tiwaê, ma lau waêm^{ba} boc-dina^{ng}, na^{ng} ho^{ng} sêhóc gêlêc Jon su yêc Anötö a^{ng}gô-nga.

¹²⁻¹³“Mu^{ng}-nga, Moses ti propet akwa-kwa sêhoc yom asê gwana^{ng} pi Anötö ndê gôli^{ng}. Ma ñac si yom ñandô sa dom, e Jon me^{ng} ma gêm mêtê bu Anötö ndê gôli^{ng} me^{ng} kêpi^{ng}. Tê^{ng} ndoc Jon gic hu yom dau e me^{ng} tê^{ng} kwahic dec, Anötö ndê gôli^{ng} kêsôwec gi tiatu, ma lau daêsam sêkôm mwasac bu sêsôc Anötö ndê gôli^{ng} ñapu. ¹⁴Anötö gic bata bu ê^{ng}ki^{ng} propet da^{ng} mu^{ng} Mesaya, na^{ng} gitôm propet Elaija. Ma aö wasôm tê^{ng} mac bu yomandô, Jon i^{ng} propet dau dina^{ng}. Mac akê^{ng} whi^{ng} yom dina^{ng}, me mba? ¹⁵Mac bu da^{ng}sam^{ng} yêc, na^{ng} a^{ng}gô ane^{ng} yom!

¹⁶“Lau têm dindec-nga ñac lau kai^{ng} bocke? ñac sêtôm balêkoc na^{ng} sêkôc whê sêmbo malac lôm, na^{ng} sêtucdi^{ng} ñac si silip ñatô ma sêsôm, ¹⁷“Tê^{ng} ndoc na^{ng} yac ac o^{ng} bu datê wê, na^{ng} mac atec. Ma tê^{ng} ndoc yac am wê da^{ng}gibo-nga, na^{ng} mac atec bu ata^{ng} awhi^{ng}.’ ¹⁸Ma lau têm dindec-nga bocdina^{ng}. Jon me^{ng} ma gê^{ng} gê^{ng} ti nô^m gê^{ng} ñayham dom, ma sêsôm bu ñalau sac mbo i^{ng} ndê ñalôm. ¹⁹Ma ñamalac ndê Atu me^{ng} nô^m ti gê^{ng} gê^{ng} ñayham, tige^{ng} sêsôm bu i^{ng} ngac gê^{ng} gê^{ng} ti nô^m wain ñawahô-nga, ma bu i^{ng} hê silip tê^{ng} lau sac ti lau sêkôc takis-^{ng} ga. Bocdina^{ng}, mac lau têm dindec-nga atôm balêkoc na^{ng} sêkôm tô a^{ng}i^{ng} ñapa^{ng}. Tige^{ng} Anötö ndê gauc hôc gêlêc gê^{ng} ho^{ng}, ma i^{ng} ndê lau sê^{ng}yalê bu i^{ng} ndê lê^{ng} i^{ng} lê^{ng} solop.”

Yisu sôm yom pi lau na^{ng} sem dau kwi dom
(Luk 10:13-15)

²⁰Tê^{ng} dina^{ng} Yisu gic hu pu lau na^{ng} sêndôc malac ñatô. ñahu bu i^{ng} kôm gê^{ng} dalô daêsam yêc ñac a^{ng}gô-nga, tige^{ng} ñac sem si ñalôm kwi dom. ²¹Ï sôm, “Oyaê mac lau Korasin ti lau Betsaida-nga. Mac ac waê bu ata^{ng} Anötö ndê atac ñandê sa. Lau apa na^{ng} sêndôc Taya ma Saidon, na^{ng} bu sêlic gê^{ng} dalô na^{ng} aö gakôm yêc mac a^{ng}ôm-nga, dec oc tôm sênem dau kwi wandêc su, ma sêndôc ti sêta^{ng} si sac. ²²Tige^{ng} mac akôm dom, dec wasôm tê^{ng} mac bu tê^{ng} ndoc Anötö êmatôc lau-nga, na^{ng} i^{ng} oc kê^{ng} ñagêyô sac sambuc tê^{ng} mac, hôc gêlêc ñagêyô na^{ng} i^{ng} oc kê^{ng} tê^{ng} lau Taya ti Saidon-nga, na^{ng} su.

²³“Ma mac lau Kapenaom-nga. Mac gauc gêm bu Anötö oc kôc mac sa andôc undambê, a? Aö wasôm mba! Ï oc êmasuc mac su asip lambwam andi. Lau Sodom bu sêlic gê^{ng} dalô gitôm mac alic su, dec oc tôm sêhu si sac si^{ng} ma sêndôc ñayham e kwahic dec. ²⁴Aö wasôm tê^{ng} mac bu Anötö oc kê^{ng} ñagêyô sac tê^{ng} mac, hôc gêlêc ñagêyô na^{ng} i^{ng} oc kê^{ng} tê^{ng} lau Sodom-nga.”

Yisu kêpiŋ Damba

(Luk 10:21-22)

²⁵T êŋ ndoc dinaŋ Yisu teŋ mbec ma sôm, “O Damaŋ, undambê ti nom ŋadau. Aô wampinŋ am bu am tôc nem yom ŋa-ŋandô asê têtŋ lau naŋ sêŋgwiniŋ dau, ma siŋ kwi têtŋ lau naŋ gauc gêm bu ŋac lau tiguauc ma sêŋyalê gêtŋ hoŋ. ²⁶Aêc, Damaŋ, am kôm bocdinaŋ kêkuc am daôm nem atac whiŋ.”

²⁷Goc Yisu sôm, “Damaŋ kêŋ gêtŋ hoŋ sip aô amaŋ. Lau daŋ sêŋyalê Atu dom, Damba tawasê kêyalê iŋ. Ma lau daŋ sêŋyalê Damba dom, tigenŋ iŋ ndê Atu kêyalê iŋ, ma lau naŋ Atu dau atac whiŋ bu tôc iŋ asê têtŋ ŋac, naŋ sêŋyalê Damba.”

Yisu gêm malô lau kwapac

²⁸“Mac lau hoŋ naŋ ahôc ŋawapac ma kwapac, naŋ atêtŋ aô ameiŋ, ma aô wakêtŋ mac asê awham su. ²⁹Ameŋ ma akôm aô neŋ gwelenŋ awhiŋ aô, ma aô oc wandôhônŋ mac. Aô ŋgac malô ma gatoc dauŋ sa dom, ma mac oc atap malam aŋwhaŋ daôm-ŋga sa yêc aô. ³⁰Ŋahu bu gwelenŋ naŋ mac akôm awhiŋ aô, naŋ ŋadehe dom, ma aô wakêtŋ mac ahôc ŋawapac atu dom.”

Yisu iŋ Pômdau bêc Sabat-ŋga

(Mak 2:23–3:6; Luk 6:1-11)

12 ¹Têtŋ têtŋ dinaŋ ŋabêc †Sabat-ŋga daŋ, naŋ Yisu ti ndê ŋgacsêŋomi sêŋsêlêŋ sêmbo lôcwaha naŋ gic ôm wit-ŋga daŋ kic. Ma gêtŋ yô ŋgacsêŋomi, dec sêkôc wit ŋandô ma seŋ. ²Lau Palêsai ŋatô sêlic, goc sêsôm têtŋ iŋ, “Lic su naŋ. Am nem ŋgacsêŋomi sêkôc wit ŋandô ma yomsu gic yao bu dakôm gwelenŋ kaiŋ dinaŋ têtŋ bêc Sabat-ŋga dom.” ³Goc Yisu ô ŋac si yom ma sôm, “Gauc nem yom naŋ sêto yêc, pi gêtŋ naŋ Kiŋ Dawid ti ndê lau sêkôm têtŋ ndoc gêtŋ yô ŋac. Mac asam su, me? ⁴Dawid sôc Anötô ndê andu gi, ma kôc bolom dabuŋ naŋ lau sêkêtŋ ti da, naŋ Moses kêŋ yao bu dabuŋsiga tawasê sêneŋ, ma lau bambaliŋ sêneŋ dom. Ma Dawid ti ndê lau seŋ, magoc lau daŋ sêŋgôliŋ yom pi Dawid ma sêsôm bu iŋ kêgîlî yomsu lec dom.

⁵“Ma gêtŋ daŋ tiyham, naŋ mac asam su yêc Moses ndê yomsu. Têtŋ bêc Sabat-ŋga hoŋ dabuŋsiga sêkôm gwelenŋ yêc lôm dabuŋ, ma gwelenŋ dinaŋ kêgîlî yomsu Sabat-ŋga. Magoc lau sêŋgôliŋ yom pi ŋac dom.

⁶“A ô wasôm têtŋ mac, bu gwelenŋ naŋ aô gameŋ tu wakôm-ŋga, naŋ hôt gêlêc sakiŋ lôm dabuŋ-ŋga hoŋ su. ⁷Sêto Anötô ndê yom yêc bocdec, ‘Gêtŋ atu naŋ aô atac whiŋ, naŋ hôt gêlêc mac nem da hoŋ su, naŋ bu mac tamwalô lau.’ Mac aŋyalê yom dau ŋahu dom. Mac bu aŋyalê, dec gitôm dom bu mac aŋgôliŋ yom pi lau naŋ sêkôm gêtŋ so daŋ dom. ⁸Bu Ŋamalac ndê Atu iŋ gêtŋ hoŋ ŋadau, ma iŋ Pômdau bêc Sabat-ŋga whiŋ.”

Yisu kôm ñgac amba balê ñayham sa têtj bêc Sabat-ña
(*Mak 3:1-6; Luk 6:6-11*)

⁹Yisu kêsêlêñ gi, ma sôc ñac si lôm wê-ña gi. ¹⁰Ma yêc dinañ, ñgac amba tibalê dañ ndôc. Lau Palêsai sêñsalê yom tu sêñgôlin pi Yisu-ña, goc sêndac iñ, “Yac bu dakôm ñamalac dañ ñamlic ñayham sa têtj bêc Sabat-ña, oc tañgili yomsu Sabat-ña, me mba?” ¹¹Ma Yisu sôm têtj ñac, “Mac nem domba dañ, bu peñ sip sê ñalôm têtj bêc Sabat-ña, nañ mac oc akôm sake? Mac oc akôc sa. ¹²Aêc! Ma ñamalac sêhôt gêlêc domba su! Bocdinañ yac bu dakôm ñayham ma danem lau sa têtj bêc Sabat-ña, oc daso yomsu Sabat-ña dom.” ¹³Goc Yisu sôm têtj ñgac dau, “Êmatôt amam!” Ma iñ kêmatôt amba, ma amba dau ñayham sa tiyham, gitôm iñ amba dañga. ¹⁴Tigeñ lau Palêsai sêsa si ma sem yomgalôm pi lêtj sêndic Yisu ndu-ña.

Yisu iñ Anötö ndê ñgac Akiñ

¹⁵Yisu kêyalê lau Palêsai si gauc, goc hu gameñ dinañ siñ. Lau daêsam sêñkuc iñ, ma iñ kôm ñac si gêmbac hoñ ñayham sa. ¹⁶Tigeñ iñ gic yao bu sêsôm iñ ñahu asê dom. ¹⁷Ñalêñ dinañ yom nañ propet Aisaya sôm pi Mesaya muñ su, nañ ñandô sa. Yom dau sêto yêc bocdec bu:

¹⁸Alic aneñ ñgac akiñ dindec, nañ aô kayaliñ iñ sa. Aô atac whiñ iñ kêlêc, ma aneñ ñalôm tisambuc iñ. Wakêñ aneñ ñalau nem iñ ahuc, ma iñ oc hoc yom gitêñ matôt-ña asê têtj lau akêñ gameñ nom-ña hoñ.

¹⁹Iñ oc sôm yom tac ñandê-ña me mbwêc ñañga dom. Ma lau dañ oc sêñgô iñ whasuñ yêc malac lôm dom.

²⁰Gakoc timdec iñ oc pôn dulu dom, ma ya ñawê nañ tisaun, nañ iñ oc yu ndu dom.^e Ma iñ oc kôm bocdinañ e nditôm iñ ndê yom gitêñ matôt-ña nem nom sambuc ahuc.

²¹Ma lau akêñ gameñ nom-ña hoñ oc sêkêñ bata bu Anötö nem ñac si tu iñ ndê ñaê-ña. *[Ais 42:1-4]*

Yisu ndê ñaclai ñahu
(*Mak 3:23-27; Luk 11:14-22*)

²²Têtj têtj dinañ lau sêwê ñgac dañ nañ ñalau sac kôm iñ tandô t ipec ma awha mba, nañ sêtêñ Yisu sêmeñ. Yisu soc ñalau sac dinañ su, goc kôm ñgac dau ñayham sa, ma iñ gêlic gameñ ma sôm yom asê. ²³Lau hoñ sêhêdaê tu Yisu-ña, ma sêsôm, “Mboe †Dawid ndê Atu iñ ñgac dau dec, me?” ²⁴Tigeñ lau Palêsai sêñgô ñawaê, dec sêpu Yisu ma sêsôm, “Iñ kôc

^e **12:20** Yom pi gakoc timdec ma ya ñawê nañ mbac, nañ hêganôn lau nañ sêkêñ whiñ ñañga dom.

ñaclai yêc ñalau sac si ñadau †Belsebal, dec iñ soc ñalau sac su.”²⁵ Yisu kêyalê ñac si gauc, ma sôm, “Lau gameñ dañ, me malac dañ, me gôlôwac dañ, bu sêwhê dau kôc, dec ñac oc sêlhac ñañga dom, ma ñac si ñacyo oc sêku ñac dulu.²⁶ Ma Sadañ boc-dinañ. Iñ bu soc dau ndê ñalau sac su, dec iñ kêñ kisa dau, ma iñ ndê ñaclai oc niñga.

²⁷“Mac asôm bu aô gakôc ñaclai yêc Belsebal, dec gasoc ñalau sac su. Ma bocke? Mac nem sêñomi nañ sêsoc ñalau sac sêwhiñ, nañ mac angôlin yom dau pi ñac whiñ, a? Ñac oc sêlic mac nem yom bu so ma sêmatôc mac!²⁸ Tigeñ aô gasoc ñalau sac ña Ñalau Dabuñ ndê ñaclai, dec anyalê bu Anötö ndê ñaclai bu nem gôlin gêñ hoñ, nañ hóc asê mac su.

²⁹“Ñgac dañ oc sôc ñgac ti licwalô atu dañ ndê andu ma êñgaho iñ ndê wapa su ñalêñ bocke? Gêñ ñamata-ñga iñ sô ñgac dau dôn, goc kôc iñ ndê wapa su. Ma Sadañ iñ gitôm ñgac ti licwalô atu.

³⁰“Asa nañ kalhac whiñ aô dom, nañ ti aneñ ñacyo. Ma asa nañ gic lau sa sêtêñ aô sêmeñ dom, nañ soc ñac su yêc aô.³¹ Tu dinañ-ñga aô wasôm têñ mac bu ñamalac nañ kac ndê ñalôm kwi ma hu ndê sac siñ, nañ Anötö oc suc iñ ndê sac ti yom sac-sac hoñ kwi. Tigeñ yom sac nañ ñamalac dañ bu sôm pi Ñalau Dabuñ, nañ Anötö oc suc kwi dom.^f ³²Asa nañ bu sôm yom sac pi Ñamalac ndê Atu, tigeñ tiñambu kac ndê ñalôm kwi, nañ Anötö oc suc iñ ndê sac kwi. Magoc asa nañ bu sôm yom sac pi Ñalau Dabuñ, nañ Anötö oc suc iñ ndê sac kwi têñ têm dindéc-ñga dom, ma têñ têm ñambu-ñga dom bocdinañ.”

Lau si mêtê whê ñac sa bu ñayham me sac

(Luk 6:43-45)

³³Ma Yisu sôm, “A ñayham sem ñandô ñayham. Ma a sac sem ñandô sac. Dalic a ñandô, dec tañyalê a bu ñayham me sac.³⁴ Mac lau sac atôm mboc ñatui! Mac atôm bu asôm yom ñayham dañ dom! Bu lau sêsôm yom kêkuc gauc ti mêtê nañ hóc ñac si ñalôm ahuc.³⁵ Gauc ti mêtê ñayham hóc lau ñayham si ñalôm ahuc, dec sêsôm yom ñayham. Ma gauc ti mêtê sac hóc lau sac si ñalôm ahuc, dec sêsôm yom sac.³⁶ Aô wasôm yom ñandô têñ mac. Tiñambu Anötö oc êmatôc lau pi yom sac ti yom ñambwa hoñ nañ ñac sêsôm.³⁷ Lau nañ si yom ñayham, nañ iñ oc sam ñac bu lau gitêñ, magoc ñac nañ si yom sac, nañ oc sêtap iñ ndê matôc sa.”

Lau sêndac Yisu bu kôm gêñ dalô

(Luk 11:29-32)

³⁸Goc lau Palêsai ti kêdôhôn-waga yomsu-ñga ñatô sêsôm têñ Yisu, “Kêdôhôn-waga, yac bu alic am kôm gêñ dalô atu bu whê nem ñahu sa.”³⁹Ma

^f 12:31 Lau Palêsai sêsôm bu Yisu kôc ñaclai yêc Sadañ ndê ma soc ñalau sac su, ma Yisu tôc asê bu yom dau gitôm yom sac sambuc nañ sêsôm pi Ñalau Dabuñ.

Yisu sôm, “Mac lau tēm dindec-nga, mac lau sac naŋ apuc dômwêm Anötö, ma asa nem lêtj bambaliŋ gitôm lau mockaiŋ-nga. Mac andac bu alic gêtj dalô, magoc Anötö oc kêtj gêtj dalô tigerj têtj mac alic, tôm gêtj dalô naŋ iŋ kôm pi propet Jona. ⁴⁰Jona mbo i atu ŋalôm gitôm acsalô tö ti ôbwêc tö. Ma bocdinaŋ ŋamalac ndê Atu oc yêc nom ŋalôm nditôm acsalô tö ti ôbwêc tö. ⁴¹Têtj ndoc Jona gêm mêtê lau Ninewa, naŋ sêkac si ŋalôm kwi. Ma ŋgac naŋ hóc gêlêc Jona su dec mbo, tigerj mac am daôm kwi dom. Tu dinaŋ-nga têtj bêc matôc-nga, lau Ninewa oc sêtisa akêtj lau batê sêwhiŋ mac lau tēm dindec-nga, ma ŋac oc sêhoc mac nem sac asê. ⁴²Muŋnga, Kwin Siba-nga[§] kêsêlêtj seŋ baliŋ bu ŋgô Kiŋ Solomon ndê yom ti gauc atu. Ma kwahic dec ŋgac naŋ hóc gêlêc Solomon su, naŋ mbo dec. Magoc mac akêtj daŋam iŋ dom. Tu dinaŋ-nga, têtj bêc matôc-nga, Kwin dau oc tisa whiŋ mac lau tēm dindec-nga, ma hoc mac nem sac asê.”

ŋalau sac sêŋsalê mala naŋ yêc ŋambwa

(Luk 11:24-26)

⁴³“Têtj ndoc ŋalau sac daŋ sa yêc ŋamalac daŋ, naŋ gitôm iŋ kêtjihi mbo gameŋ sawa ma kêsâlê mala êŋwhaŋ dau-nga. Tigerj têtj ndoc iŋ tap sa dom, ⁴⁴naŋ iŋ oc sôm têtj dau, ‘Aô wambu wandi wasôc andu naŋ aô gahu siŋ su.’ Ma iŋ oc mbu ndi ma tap sa bu ŋamalac dau ndê ŋalôm yêc ŋambwa, gitôm andu naŋ sêmasaŋ ŋawasi sa. ⁴⁵Dec iŋ oc sa ndi, wê ŋ alau 7 naŋ sac sambuc sêhóc gêlêc iŋ su, naŋ sêmeŋ, ma hoŋ sêsôc ŋamalac dau ndê ŋalôm sêndi, ma sêmboc dinaŋ. Bocdinaŋ ŋawapac naŋ tap ŋamalac dau sa, naŋ hóc gêlêc ŋawapac ŋamata-nga-nga su. Ma ŋalêtj tigerj mac lau sac tēm dindec-nga, oc atap ŋawapac atu sa têtj tēm ŋambu-nga.”

Yisu dinda ti asii

(Mak 3:31-35; Luk 8:19-21)

⁴⁶Lau daêsam sêmboc andu daŋ sêwhiŋ Yisu têtj ndoc iŋ sôm yom dinaŋ mbo, ma iŋ dinda ti asii sêmeŋ sêlhac awê, ma bu sêsôm yom têtj iŋ. ⁴⁷Goc ŋamalac daŋ kêtj ŋawaê têtj iŋ ma sôm, “Am dinam ti asimi sêlhac awê ma bu sêsôm yom têtj am.” ⁴⁸Magoc Yisu ô yom ma sôm, “Aneŋ dinaŋ asa, ma asiŋi ŋac lau asa?” ⁴⁹Goc iŋ tôle amba têtj ndê ŋgacsêŋomi, ma sôm, “Aô dinaŋ ti asiŋi dau dindec. ⁵⁰Bu lau naŋ daŋga wambu Damaŋ undambê-nga ndê yom, naŋ ŋac aô asiŋi ti lhuŋwêi ma dinaŋi.”

Yom gôliŋ pi ŋgac kêbalip wit ŋawhê

(Mak 4:1-9; Luk 8:4-8)

13 ¹Têtj bêc dinaŋ Yisu hu andu siŋ ma sa gi ndöc Bugictoŋ Galili-nga ŋamakê. ²Ma lau daêsam sêkac sa sêŋgihi iŋ ahuc e ŋasawa

[§] 12:38 Matyu to yom pi Kwin akêtj gameŋ ŋapu-nga (South). Yom dau hêganônŋ Kwin Siba-nga, naŋ ndê miŋ sêto yêc 1 Kiŋ 10:1-13. Kwahic dec dasam gameŋ Siba-nga bu ‘Arabia.’

mbasi. Tu dinaŋ-ŋga dec iŋ pi gi ndöc waŋ daŋ naŋ poc kêpiŋ baö. Ma lau hoŋ dinaŋ sêlhac baö. ³Goc Yisu sôm yom göliŋ daêsam têtŋ ŋac. Iŋ sôm yom göliŋ daŋ bocdec bu, “Ŋgac daŋ sa gi bu êmbalip wit ŋawhê yêc iŋ ndê öm. ⁴Ma têtŋ ndoc iŋ kêbalip gêtŋ dau, naŋ ŋatö sêpeŋ sêsip seŋ, dec mbac sêmeŋ ma seŋ su. ⁵Ma ŋawhê ŋatö sêpeŋ sêsip gameŋ hoc-hoc, naŋ nom ŋagec sac hoc ŋahö ŋambwa. Ŋawhê dau sêsip nom ŋalôm gacgeŋ si dom, dec sêpo sêpi sêmeŋ ŋagahö. ⁶Magoc tiŋambu ac pec ŋagatôm ma gêm bôliŋ. Ŋahu bu nom ŋayham mba tu ŋawakac sip ndi-ŋga. ⁷Ma wit ŋawhê ŋatö sêpeŋ sêsip kwan ti ŋakwa ŋalôm, magoc têtŋ ndoc sêpo sêpi sêmeŋ, naŋ kwan pi whiŋ e yaŋ ndu. ⁸Ma ŋatö sêpeŋ sêsip nom ŋayham ma sêpo sêpi ŋayham e sem ŋandö. Ŋatö sem ŋandö 30, ma ŋatö sem 60 ma ŋatö sem ŋandö 100. ⁹Asa bu daŋgasuŋ yêc, naŋ ŋgö aneŋ yom.”

Yom göliŋ ŋahu
(*Mak 4:10-12; Luk 8:9-10*)

¹⁰Tiŋambu Yisu ndê ŋgac-sêŋomi sêtigasuc iŋ ma sêndac, “Tu sake-ŋga am sôm yom têtŋ lau ŋa yom göliŋ?” ¹¹Ma iŋ ö yom ma sôm, “Anötö ndê göliŋ ŋalêtŋ ŋahu sip ŋalôm gi. Iŋ kêyalij mac sa bu aŋyalê ŋahu dau, magoc lau naŋ sêkêtŋ whiŋ aö dom, naŋ oc tôm dom bu sêŋyalê. ¹²Asa naŋ kôc Anötö ndê yom sa sip ndê ŋalôm e tidônŋ, naŋ Anötö oc kêtŋ gauc têtŋ iŋ êŋlêc, e iŋ êŋyalê yom dau timala eŋ. Magoc asa naŋ yom dau tidônŋ iŋ dom, naŋ Anötö oc kôc gêtŋ hoŋ su yêc iŋ. ¹³Tu dinaŋ-ŋga aö wasôm yom têtŋ lau ŋa yom göliŋ. Ŋac sêlic gêtŋ ŋapaŋ, tigeŋ ŋac si gauc sa dom, ma ŋac sêŋgö yom ŋapaŋ, tigeŋ ŋac sêŋyalê ŋahu dom. ¹⁴Yom naŋ propet Aisaya hoc asê muŋ su, naŋ dec ŋandö sa. Yom dau yêc bocdec bu:

Ŋac sêŋgö aneŋ yom ŋapaŋ, magoc sêŋyalê ŋahu dom. Ma sêlic gêtŋ naŋ aö gakôm naŋ ŋapaŋ, tigeŋ ŋac si gauc sa dom.

¹⁵Lau dau si ŋalôm ŋadandi. Ŋac si daŋgasuŋ hóc ahuc, ma ŋac sêpóc si tandö ahuc. Bu bocdinaŋ dom, dec oc tôm bu tandö sêlic ma daŋgasuŋ sêŋgö, ma sêŋyalê aö tidônŋ yêc ŋac si ŋalôm e sênem dau kwi, ma aö wakôm ŋac ŋayham sa.” *[Ais 6:9-10]*

¹⁶Ma Yisu sôm têtŋ ŋgacsêŋomi, “Aö wampiŋ mac nem tanôm ti daŋamsuŋ, bu mac alic gêtŋ atu-tu naŋ aö gakôm, ti aŋgö aneŋ yom. ¹⁷Aö wasôm yom ŋandö têtŋ mac bu propet ti lau gitêtŋ daêsam naŋ sêmbo muŋ su, naŋ sêkêtŋ bata bu sêlic gêtŋ naŋ mac alic su, magoc sêlic dom. Ma sêkêtŋ bata bu sêŋgö yom naŋ mac aŋgö su, tigeŋ sêŋgö dom.”

Yisu whê yom göliŋ wit ŋawhê-ŋga ŋahu sa
(*Mak 4:13-20; Luk 8:11-15*)

¹⁸Ma Yisu sôm, “Dec akêtŋ daŋam ma wawhê yom göliŋ ŋgac kêbalip wit ŋawhê-ŋga sa. ¹⁹Yom pi ŋawhê naŋ sêpeŋ sêsip seŋ, naŋ hêganônŋ lau

naŋ sêŋgô yom pi Anötö ndê gôliŋ, magoc sêŋyalê ŋahu dom. Bocdinaŋ Sadaŋ dau meŋ kêgaho yom dau su yêc ŋac si ŋalôm. ²⁰Ma yom pi ŋawhê naŋ sêpeŋ sêsip gameŋ hoc-hoc, naŋ hêganônŋ lau naŋ sêŋgô Anötö ndê yom, ma sêkôc sa ŋagahô ma ti atac ŋayham. ²¹Magoc tôm ŋawhê dinaŋ ŋawakac sip gi dom, naŋ yom dau tidônŋ yêc lau dinaŋ si ŋalôm dom. Sêlhac ŋasawa sauŋ, tigeŋ têŋ ndoc sêtap ŋawapac sa me lau sêkêŋ kisa ŋac tu Anötö ndê yom-ŋga, naŋ sêhu si sêkêŋ whiŋ siŋ ŋagahô eŋ. ²²Ma yom pi ŋawhê naŋ sêpeŋ sêsip kwanŋ ti ŋakwa ŋalôm, naŋ hêganônŋ lau naŋ sêŋgô Anötö ndê yom, magoc yom dau gêm ŋandô yêc ŋac si ŋalôm dom. Ŋahu bu ŋac sêhêgo dau pi gêŋ nom-ŋga ŋapaŋ, ma sêsa lêŋ atac whiŋ mone-ŋga e gêŋ kaiŋ dinaŋ kôm Anötö ndê yom ahuc. ²³Ma yom pi ŋawhê naŋ sêpeŋ sêsip nom ŋayham ma sem ŋandô 30, me 60, me 100, naŋ hêganônŋ lau naŋ sêŋgô yom ma sêŋyalê ŋahu, ma sem ŋandô daêsam.”

Yom gôliŋ pi wahô

²⁴Yisu sôm yom gôliŋ daŋ tiyham bocdec bu, “Aö bu wawhê Anötö ndê gôliŋ sa ŋalêŋ bocdec. Ŋgac daŋ kêbalip wit ŋawhê ŋayham sip ndê ôm. ²⁵Magoc têŋ ndoc lau sêyêc bêc, naŋ iŋ ndê ŋacyo meŋ, ma kêbalip wahô ŋawhê sip ôm dau whiŋ wit ŋawhê ŋayham, goc kôlhô gi. ²⁶Tiŋambu wit ŋawhê po pi meŋ, ma têŋ ndoc ŋandô sa, naŋ lau sêlic bu wahô pi meŋ whiŋ. ²⁷Goc ôm ŋadau ndê lau akiŋ sêtêŋ iŋ si ma sêsôm, ‘Ŋadau, yac alic bu am kêbalip ŋawhê ŋayham sip nem ôm. Magoc wahô dec meŋ akêŋ nde?’ ²⁸Ma iŋ ô yom ma sôm, ‘Ŋacyo daŋ kôm gêŋ dau.’ Ma sêndac iŋ, ‘Am tac whiŋ bu yac asa andi ayê wahô dau sa, me?’ ²⁹Ma iŋ sôm, ‘Mba! Bu mboe mac ayê wahô ma apuc wit sa whiŋ. ³⁰Atec lu-lu sêlhac sêwhiŋ dau ma sêtiatu e ndoc sêndic gêŋ ŋandô sa-ŋga. Têŋ dinaŋ aö oc wasôm têŋ lau sêndic gêŋ ŋandô sa-ŋga bu sêndic wahô sa muŋ, goc sêkic dôŋ ma sêkêŋ pi ya ndi. Ma tiŋambu sêndic wit ŋandô sa pi aneŋ andu gêŋ ŋandô-ŋga.’ ”

Yom gôliŋ pi gêŋ ŋawhê sauŋ

(Mak 4:31-32; Luk 13:18-19)

³¹Ma iŋ sôm yom gôliŋ daŋ têŋ ŋac bocdec, “Anötö ndê gôliŋ gitôm a soc ŋawhê, naŋ ŋgac daŋ sô sip iŋ ndê ôm. ³²Ŋawhê dau iŋ gêŋ sauŋ-têc, tigeŋ tiŋambu oc po pi meŋ e ti a atu hôc gêlêc gêŋ ôm-ŋga hoŋ, ma mbac lôlôc-ŋga oc sêmeŋ sêhê si ŋaic yêc ŋasaŋgac.”

Yom gôliŋ pi yist

(Luk 13:20-21)

³³Ma iŋ sôm yom gôliŋ daŋ tiyham bocdec, “Anötö ndê gôliŋ gitôm yist, naŋ awhê daŋ kêŋ sip plawa lôŋ atu daŋ ma kêgaluŋ e kôm plawa hoŋ suŋ.”

Yisu sôm yom gôliŋ daêsam

(Mak 4:33-34)

³⁴Yom hoŋ naŋ Yisu sôm têt lau toŋ atu dinaŋ, naŋ iŋ sôm ŋa yom gôliŋ ŋambwa. Ma iŋ sôm yom ŋalêt daŋ dom. ³⁵Ma boc-dinaŋ propet ndê yom bocdec ŋandô sa:

Aô wasôm aneŋ yom ŋa yom gôliŋ, ma gêt naŋ yêc siŋ dau têt têt Anötö kêt undambê ti nom e meŋ, naŋ kwahic dec wasôm asê.

[BW 78:2]

Yom gôliŋ wahô-ŋga ŋahu

³⁶Goc Yisu hu lau hoŋ siŋ ma sôc andu gi. Ma iŋ ndê ŋgacsêŋomi sêtêt iŋ si ma sêndac, “Gitôm bu am whê yom gôliŋ wahô-ŋga ŋahu sa têt yac?” ³⁷Ma Yisu sôm, “Ŋgac naŋ kêbalip ŋawhê ŋayham, naŋ Ŋamalac ndê Atu. ³⁸Ma iŋ ndê ôm, naŋ nom sambuc lec. Yom pi ŋawhê ŋayham hêganôŋ lau naŋ sêmbo Anötö ndê gôliŋ ŋapu, ma wahô hêganôŋ ŋalau sac si ŋadau ndê lau. ³⁹Ma ŋacyo naŋ kêbalip wahô ŋawhê, naŋ Sadaŋ dau. Ndoc sêndic gêt ŋandô sa-ŋga, naŋ tôm bêc ŋambu-ŋga, ma lau sêndic gêt ŋandô sa-ŋga, naŋ Anötö ndê aŋela. ⁴⁰Têt bêc ŋambu-ŋga, lau sac oc sêsip ya atu ŋalôm sêndi, ŋalêt tigeŋ tôm wahô naŋ lau sic sa ma sêkêt pi ya gi. ⁴¹Ŋamalac ndê Atu oc êŋkiŋ ndê aŋela, ma ŋac oc sêkôc gêt lêtôm-ŋga ti lau hoŋ naŋ sêkôm sac, naŋ su yêc Anötö ndê lau. ⁴²Ma ŋac oc sêmbaliŋ ŋac sêsip ya atu ŋalôm sêndi, ma ŋac oc sêtaŋ atu ti lhô êŋsiŋ pi dau. ⁴³Têt dinaŋ lau gitêt si ŋawasi ti ŋawê oc pô gameŋ gitôm ac, yêc ŋac si Damba ndê gameŋ undambê-ŋga. Mac bu daŋamsuŋ yêc, naŋ aŋgô aneŋ yom.”

Yom gôliŋ lu pi Anötö ndê gôliŋ

⁴⁴“Anötö ndê gôliŋ ŋamwasinŋ gitôm awa ŋayham andô daŋ naŋ yêc siŋ dau yêc nom daŋ ŋalôm. Ŋamalac naŋ tap awa dau sa, naŋ oc siŋ kwi tiyham, ma lhô ndi ti atac ŋayham atu ma kêt ndê gêt hoŋ têt lau sênemlhi, goc nemlhi nom dinaŋ bu kôc awa dau sa.

⁴⁵⁻⁴⁶“Ma Anötö ndê gôliŋ ŋamwasinŋ gitôm yac ŋapa ŋaôli atu. Ŋgac tidulu gêt-ŋga naŋ kêsalê yac ŋapa ŋayham tu êmasaŋ gôlôŋ-ŋga, naŋ bu tap yac ŋapa ŋayham andô dau sa, dec iŋ oc lhô ndi ma kêt ndê gêt hoŋ têt lau sênemlhi, goc nemlhi yac ŋayham dau.”

Yom gôliŋ pi wasaŋ

⁴⁷⁻⁴⁸“M a yom gôliŋ daŋ tiyham. Ŋalêt naŋ Anötö kêgalêm lau sa bu s êmbo iŋ ndê gôliŋ ŋapu, naŋ gitôm wasaŋ naŋ lau sêkêt sip gwêc, ma i tidau-tidau sêsip wasaŋ dau si e meŋhu. Goc lau sêhê sa pi baô gi. Ma sêndôc sic ma sêŋyaliŋ i ŋayham-ŋayham sa sip dalu, ma i sac-sac, naŋ

sêmbaliŋ siŋga. ⁴⁹Ma ŋalêŋ tigerŋ têtŋ bêc ŋambu-ŋga, aŋela oc sêmen ma sêwhê lau sac ti lau gitêŋ kôc. ⁵⁰Ŋac oc sêmbaliŋ lau sac sêsip ya atu ŋalôm sêndi, ma ŋac oc sêtaŋ ti lhô êŋsiŋ pi dau.”

Awa akwa ma awa wakuc

⁵¹Yisu gic bata yom dinaŋ, goc ndac iŋ ndê ŋgacsêŋomi, “Mac aŋyalê aneŋ yom hoŋ dindec ŋahu, me mba?” Ma sêlôc, “Aêc.” ⁵²Goc iŋ sôm têtŋ ŋac, “Kêdôhônŋwaga yomsu-ŋga naŋ sêŋyalê Anötô ndê gôliŋ ŋahu tidôn whiŋ, naŋ sêtôm bu sêwhê yom akwa sa têtŋ lau, ma yom wakuc whiŋ. Ma bocdinaŋ ŋac sêtôm andu ŋadau daŋ naŋ gic awa daêsam sa, dec tôte awa akwa ti awa wakuc asê têtŋ lau.”

Yisu ndê lau sêkôc iŋ sa dom

(Mak 6:1-6; Luk 4:16-30)

⁵³Yisu sôm yom gôliŋ hoŋ dinaŋ pacndê, goc hu gameŋ dinaŋ siŋ. ⁵⁴Ŋ mbu têtŋ iŋ ndê malachu gi, ma kêdôhônŋ lau mbo ŋac si lôm wê-ŋga. Dec ŋac sêhêdaê ma sêndac dandi, “Ei! Gauc ŋayham ti ŋaclai bu kôm gêŋ dalô atu-tu, naŋ ŋgac dec tap sa yêc nde? ⁵⁵Ŋ k apenta ndê atu! Ŋ dinda iŋ Maria, ma iŋ asi Jems, Josep, Saimon, ma Judas. ⁵⁶Ma iŋ ndê lhuwêi sêmbô sêwhiŋ yac. Bocdinaŋ gêŋ hoŋ dindec iŋ kôc sa yêc nde?” ⁵⁷Ma ŋac atac lu-lu tu iŋ-ŋga. Magoc Yisu sôm têtŋ ŋac, “Lau hoŋ sêtoc propet daŋ sa, tigerŋ yêc propet dau ndê malachu, iŋ dau ndê lau sêtoc iŋ sa dom.” ⁵⁸Ma tu ŋac sêkêŋ whiŋ iŋ dom-ŋga, dec iŋ kôm gêŋ dalô atu-tu daêsam yêc ŋac si gameŋ dom.

Herod Antipas ŋgô ŋawaê pi Yisu

(Mak 6:14-16; Luk 9:7-9)

14 ¹Têtŋ ndoc dinaŋ †Herod, naŋ gêm gôliŋ gameŋ Galili-ŋga, naŋ ŋgô ŋawaê pi Yisu. ²Ma iŋ sôm têtŋ iŋ ndê lau akiŋ bu, “Ŋgac dê mboe Jon, Ŋgac Kêku Lau-ŋga naŋ tisa akêŋ lau batê-ŋga. Ma tu dinaŋ-ŋga iŋ kôc ŋaclai bu kôm gêŋ dalô atu-tu dinaŋ.”

Herod gic Jon, Ŋgac Kêku Lau-ŋga ndu ŋamiŋ

(Mak 6:17-29)

³⁻⁴Muŋ-ŋga, Herod gêm iŋ ndê asi Pilip ndê awhê Herodias ti ndê awhê, dec Jon sôm têtŋ iŋ, “Am kôm gêŋ so sambuc.” Tu dinaŋ-ŋga Herod kêkiŋ ndê lau bu sêkôc Jon dônŋ ma sêkêŋ iŋ ndöc gapocwalô. ⁵Herod tac whiŋ bu ndic Jon ndu, tigerŋ iŋ töc lau daêsam naŋ sêlic Jon bu propet daŋ. ⁶Têtŋ ndoc daŋ sêndê mwasiŋ tu Herod ndê bêc dinda kôc iŋ-ŋga, ma Herodias atuwê tê wê yêc mwasiŋ dau ŋalôm. Herod gêlic ma tac ŋayham atu, ⁷dec iŋ kêmatiŋ yom têtŋ iŋ ma sôm, “Yomandô aö wasôm têtŋ am. Gêŋ bocke am bu tac whiŋ naŋ sôm, ma aö oc wakêŋ têtŋ am.”

⁸Goc bawhê dau sa gi gêlic dinda Herodias. Inj dinda tec Jon, dec sôm têtj bawhê bu ndac Herod bocdec bu, “Aö tac whij bu am tim Jon, Ijgac Kêku Lau-nga ndê kachu kic, ma kêj inj ndê ñagôlôn sip pele danj ma kêj têtj aö, bu walic pi tanôn bu inj mbac ndu ñandô.” ⁹Têtj ndoc Herod ngô yom dinañ, inj ndê ñalôm ñawapac atu. Tigeñ tu inj kêmatij yom yêc lau hoñ anğô-nga, dec inj sôm têtj inj ndê lau siñ-nga bu sêkôm tôm bawhê dau teñ. ¹⁰Inj kêkiñ ñac sêsôc gapoc-walô si, ma sêtim Jon ndê kachu kic. ¹¹Ma sêkêtj ñagôlôn sip pele danj, ma sêkôc sêmeñ ma sêkêtj têtj bawhê. Goc bawhê dau kôc sa gi kêj têtj dinda gêlic. ¹²Tiñambu Jon ndê sêñomi sêmeñ sêkôc inj ñamlan sa ma si sêñsuhuj. Goc sêtêtj Yisu si ma sic miñ têtj inj.

Yisu gôlôm lau 5,000

(Mak 6:32-44; Luk 9:10-17; Jon 6:1-15)

¹³Têtj ndoc Yisu ngô ñawaê pi Jon, nanj inj pi wañ danj gi bu pi bugicton ñadanga, ma lhô têtj gameñ sawa danj ndi ma mbo tawasê. Magoc lau malac-nga sêngô ñawaê bu inj pi wañ dau gi, ma daêsam sêwê sêmbo baö ma sêñkuc inj. ¹⁴Têtj ndoc Yisu sôc baö gi, nanj gêlic lau daêsam dinañ ma tawalô ñac. Ma inj kôm ñac si gêmbac ñayham sa.

¹⁵Têtj telha, kêpiñ bu ac ndi sip, goc ñgacsêñomi sêtêtj inj sêmeñ ma sêsôm, “Gameñ dec gameñ sawa, ma ac gi su. Kêj lau sêlhô sêtêtj malac sêndi bu sêneñli si gêtj sêneñ-nga.” ¹⁶Magoc Yisu sôm, “Mba! Oc tôm bu sêneñ gêtj yêc dec. Mac daôm akêtj gêtj têtj ñac sêneñ.” ¹⁷Ma sêsôm, “Yac oc akôm ñalêtj nde, bu yac mba bolom amañdanj ma i lu solop dec yêc.” ¹⁸Goc inj sôm, “Akôc gêtj dau sa amej.” ¹⁹Ma inj sôm têtj lau bu sêndôc sic sêndôc kwañ. Inj kôc bolom amañdanj ma i lu, tatic undambê goc gêm mbec ma pô bolom kôc-kôc. Ma inj kêj têtj ñgacsêñomi, ma sic sam têtj lau. ²⁰Iñac hoñ señ gitôm, ma ñgac-sêñomi sic gêtj ñadêlê sa sip gatop 12 e meñhu. ²¹Lau nanj señ gêtj dau, nanj si laungac ñanamba gitôm 5,000. Ma lauwhê ti balêkoc daêsam sêmbo sêwhij.

Yisu kêsêlêtj mbo bu ñahô

(Mak 6:45-52; Jon 6:16-21)

²²Dinañ su, goc Yisu kêkiñ ndê ñgacsêñomi sêpi wañ bu sêmuñ inj sêmbu sêpi bugicton ñadanga sêndi. Ma inj dau gacgeñ mbo, bu kêj lau sêlhô sêndi. ²³Sêlhô si su, goc inj pi lôc tawasê gi bu teñ mbec. Iñasec sa, ma inj tawasê mbo. ²⁴Magoc wañ dau sa awê tibaliñ gi su, ma mbu ñadinda gêli bu sa e gic sip wañ.

²⁵Têtj ôbwêc lôm, Yisu kêsêlêtj mbo bu ñahô têtj ñac gi. ²⁶Magoc têtj ndoc ñgacsêñomi sêlic inj kêsêlêtj mbo bu ñahô, nanj sêtôc dau ti sêmbwêc, ma sêsôm, “Êê! Iñalau danj!” ²⁷Goc Yisu sôm têtj ñac, “Atôc daôm dom! Iñalôm pêñ dôñ, bu aö dauñ dec.” ²⁸Goc Pita sôm, “Pômdu,

bu am daôm dinaŋ, naŋ goc sôm aô waŋsêlêŋ wambo bu ŋahô watêŋ am waloc.”²⁹ Ma Yisu sôm, “Mweŋ!” Goc Pita sip yêc waŋ, ma kêsêlêŋ mbo bu ŋahô têtŋ iŋ gi.³⁰ Magoc mbu ŋadinda kôm iŋ töt dau atu ma iŋ kwê bu soloŋ tigeŋ. Goc iŋ mbwêc, “Pômdau, nem aô sa!”³¹ Ŋagahô Yisu kêmâtôc amba gi, hê iŋ sa ma sôm, “O am ŋgac kêtŋ whiŋ babalê-ŋga. Bocke ma am atac lu-lu tu aneŋ ŋaclai-ŋga?”³² Goc iŋlu sêpi waŋ si, ma mbu timalô.³³ Ma ŋgacsêŋomi naŋ sêndôc waŋ sêpônŋ haduc ma sêmpinŋ iŋ ma sêsôm, “Yomandô, am Anötö ndê Atu!”

Yisu gêm lau gêmbac sa yêc malac Genesaret

(Mak 6:53-56; Jon 6:22-25)

³⁴Sêlac waŋ si e sêsôc baô yêc malac Genesaret.³⁵ Ma têtŋ ndoc lau malac-ŋga sêlic bu Yisu meŋ, naŋ sêkêtŋ ŋawaê têtŋ gameŋ ŋamakê-ŋga hoŋ, ma lau sêkôc si lau gêmbac hoŋ sa sêtêtŋ iŋ sêmeŋ.³⁶ Ŋac sêteŋ bu sêmasec iŋ ndê ŋakwê ŋadali ŋambwa, ma lau hoŋ naŋ sêmasec iŋ, naŋ ŋayham sa.

Gêŋ naŋ kôm ŋamalac ŋadômbwi sa yêc Anötö aŋgô-ŋga

(Mak 7:1-23)

15 ¹Têtŋ dinaŋ lau Palêsai ti kêdôhônŋwaga yomsu-ŋga ŋatô sêmeŋ akêtŋ Jerusalem sêtêtŋ Yisu si, ma sêndac iŋ, ²“Tu sake-ŋga am nem ŋgacsêŋomi sêkôm ŋagôlinŋ naŋ lau andô sic dulu têtŋ yac, naŋ popoc? Têtŋ ndoc sêneŋ gêŋ, naŋ sêŋgwasinŋ amba muŋ su dom.”³ Ma Yisu ô ŋac si yom bocdec bu, “Ma bocke? Tu sake-ŋga mac atoc lau andô si ŋagôlinŋ sa ma akôm Anötö ndê yomsu popoc? ⁴Anötö dau sôm, ‘*Toc damam lu dinam sa,*’ ma iŋ sôm tiyham bu, ‘*Asa naŋ sôm yom sac pi iŋ damba me dinda, naŋ oc sêndic iŋ ndu.*’ ⁵Tigeŋ mac aŋkuc yomsu dau dom. Ŋgac daŋ ndê awa me gêŋ bu yêc bu nem damba lu dinda sa, magoc iŋ sôm têtŋ iŋlu, ‘Oc tôm dom bu wanem amlu sa, bu gêŋ dindac aô wakêtŋ ti da têtŋ Anötö,’ ⁶goc mac alic ŋayham bu iŋ toc damba sa dom. Bocdinaŋ mac aseŋ Anötö ndê yom naŋ sôm bu atoc damam lu dinam sa, naŋ popoc, tu bu aŋkuc lau andô si ŋagôlinŋ. ⁷Mac lau atim yom lau-ŋga! Yom naŋ propet Aisaya hoc asê muŋ su, naŋ hêganônŋ mac solop. Iŋ sôm bu, ⁸‘*Lau dindac sêtoc aô sa ŋa whasuŋ ŋambwa, tigeŋ ŋac si ŋalôm yêc daŋ dau-ŋga.* ⁹Ŋac sem akiŋ aô ŋandô dom, ma yom naŋ sêndôhônŋ têtŋ lau, naŋ ŋamalac si yomsu ŋambwa.’”

¹⁰Goc Yisu ta lau hoŋ ma sôm, “Aŋgô ma aŋyalê ŋapep. ¹¹Gêŋ daneŋ-ŋga naŋ sip ŋamalac whasuŋ, naŋ kôm ŋac ŋadômbwi sa yêc Anötö aŋgô-ŋga dom. Tigeŋ yom naŋ sa akêtŋ ŋamalac whasuŋ, naŋ kôm ŋac ŋadômbwi sa.” ¹²Têtŋ dinaŋ Yisu ndê ŋgacsêŋomi sêtigasuc iŋ ma sêsôm têtŋ iŋ, “Lau Palêsai sêŋgô am nem yom dinaŋ, dec kôm ŋac sêlic sac. Am kêyalê, me mba?” ¹³⁻¹⁴Goc iŋ sôm têtŋ ŋac, “Ahêgo daôm tu ŋac-ŋga dom!

Atec ñac. Lau hoñ nanj ðanğa wambu Damanj undambê-ñga ndê yom dom, nanj sêtom wahô nanj inj oc puc sa ti ñawakac. Ñac bu sêtoç señ têtñ lau ñatô, magoc ñac tandô pec. Ma ñgac tapeç ðanğ bu wê tapeç ðanğ, injlu lulu oc sêpeñ sêsip sê.”

¹⁵Dec Pita sôm, “Gitôm bu am whê yom gôlinj ðinanğ ñahu sa têtñ yac?”
¹⁶Goc Yisu ndac, “Ma bocke? Têtñ nde mac oc anyalê? ¹⁷Alic! Gêtñ nanj sip ñamalac whasunğ, nanj sip inj ñatac ñalôm gi, ma tiñambu sa meñ tiyham.
¹⁸Tigeñ yom sac nanj sa ñamalac whasunğ, nanj sa akêtñ inj ndê ñalôm, ma sac nanj yêc ñamalac ñalôm, dec kôm inj ñadômbwi sa yêc Anötö anğô-ñga. ¹⁹Gauc sac, mêtê sêndic ñamalac ndu-ñga, mêtê mockaiñ-ñga nanj lau nanj sem dau sa su, ma lau nanj sem dau sa su dom, nanj sêkôm, mêtê sênem kanğ gêtñ-ñga, yom tasanğ, ma yom sêpu lau-ñga, ²⁰nanj yêc ñamalac ñalôm, nanj kôm ñac ñadômbwi sa. Tigeñ yac bu tanğwasinğ amanğ dom ma danenğ gêtñ, dec oc kôm yac ñadômbwi sa yêc Anötö anğô-ñga dom.”

Awhê Kanan-ñga kêtñ whiñ ñanğa

(Mak 7:24-30)

²¹Yisu hu malac ðinanğ sinğ, ma inj ti ndê ñgacsêñomi sêtêtñ malac Taya ma Saidon ñagameñ ñamakê-ñga si. ²²Ma awhê Kanan-ñga ðanğ, nanj ndôç gameñ ðinanğ, nanj têtñ inj meñ ma mbwêc, “O Pômdau, †Dawid ndê Atu, tamwalô aô. Ñalau sac kêtñ ñawapac atu têtñ aô atuñwê, ma kôm inj tisac.” ²³Yisu gêm ðoñ ma ô yom ðanğ dom, goc ñgacsêñomi sêtigasuc inj ma sêsôm, “Kêtñ inj lhô ndi, bu inj kêkuc yac ma mbwêc yom ñapanğ.” ²⁴Ma inj sôm, “Awhê dau inj awhê Israel-ñga dom. Anötö kêkinğ aô bu wanem lau Israel-ñga sa, bu ñac sêtom domba nanj sinğa su.”

²⁵Têtñ ðinanğ awhê dau meñ pônğ haduc têtñ inj ma ndac tiyham, “Pômdau, nem aô sa.” ²⁶Ma Yisu sôm, “Solop dom bu dakôç balêkoc si gêtñ danenğ-ñga su ma tambalinğ têtñ giam sêneñ.” ²⁷Magoc awhê dau ô yom ma sôm, “Aêc Pômdau, tigeñ giam nanj sêndôç ñadau ndê tebo ñapu, nanj señ gêtñ ñapopoc nanj peñ yêc tebo.” ²⁸Yisu ñgô yom ðinanğ ma sôm, “O awhê, am kêtñ whiñ ñanğa. Aô oc wakôm tôm am ndac.” Ma têtñ acgatu ñasawa dau ðinanğ, awhê dau ndê atuwê ñayham sa.

Yisu gôlôm lau 4,000

(Mak 8:1-10)

²⁹Yisu kôlhô gi ma kêsêlêtñ whiñ ndê ñgacsêñomi mbo Bugictonğ Galili-ñga ñamakê. Goc inj pi lôç ðanğ gi ma ndôç sic. ³⁰Ma lau ðaêsam sêwê sêtêtñ inj sêmeñ. Ñac sêkôç lau gahi sac, lau tapeç, l au bôlinğ, awha mba, ti lau gêmbac ðaêsam, ma sêkêtñ ñac sêyêc Yisu anğô-ñga. Ma inj kôm ñac hoñ ñayham sa. ³¹Têtñ ndoc lau sêlic awha mba sêsôm yom asê, ma lau gahi sac ti lau bôlinğ sêñsêlêtñ tiyham, ma tapeç si tandô ñawa sa, nanj sêhêðae ñandô. Ma sêmpinğ Anötö Israel-ñga.

³²Yisu ta in ndê ngacsênomi sêmen, goc sôm têtj nac, “Aö tañwalô lau dindec, bu sêmbu sêwhiñ aö gitôm bêc tö su. Iñac si gêtj danetj-nga pacndê, ma aö gatec bu wakêtj nac sêlhö sêndi ti gêtj yô nac, mbo nac tagôlô yêc señ.” ³³Magoc ngac-sênomi sêsôm, “Bocke? Gameñ dec gameñ sawa, ma danemlhi bolom yêc nde, bu dakêtj têtj nac sêneñ?” ³⁴Ma Yisu ndac, “Mac nem bolom hiñga ndöc?” Ma sêsôm, “Bolom 7 ma i mwambwa ñatô.” ³⁵Goc Yisu sôm têtj lau bu sêndöc sic. ³⁶Dec in k ôc bolom 7 ma i sa ma gêm danje, p ô kôc-kôc, ma kêtj têtj ngacsênomi, ma nac sic sam têtj lau. ³⁷Iñac hoñ señ e gitôm, ma tiñambu ngac-sênomi sic gêtj ñadêlê sa sip gatop 7 e meñhu. ³⁸Lau daêsam señ gêtj dinañ e gitôm. Iñac si laungac ñanamba gitôm 4,000, ma lauwhê ti balêkoc sêmbu sêwhiñ.

³⁹Tiñambu Yisu kêtj lau hoñ sêlhö si, goc in ti ndê ngacsênomi sêpi wañ dan ma sêtêtj malac Magadan ñagameñ si.

Lau Palêsai sêndac gêtj dalô

(Mak 8:11-13)

16 ¹Lau Palêsai ti lau Sadiusi ñatô sêtêtj Yisu sêmen bu sêñsahê in. Iñac sêndac in bu kôm gêtj dalô bu töc asê bu in kôc ñaclai yêc Anötö ndê. ²Dec in sôm, “Mac bu alic umboñ tikoc, goc mac asôm bu ‘Ac oc pi ñayham.’ ³Ma mac bu alic umboñ tiyec, goc mac asôm, ‘U oc ndic.’ Mac alic gêtj dalô umboñ-nga dinañ, ma añyalê ñahu. Ma bocke dec mac añyalê gêtj dalô daêsam nañ aö gakôm têtj ñasawa dindec, nañ ñahu dom? ⁴Mac lau sac nañ apuc dômwêm Anötö, ma asa nem lêtj bambalin gitôm lau mockaiñ-nga. Mac añsalê gêtj dalô, tigeñ Anötö oc kêtj gêtj dalô tigeñ têtj mac alic, gitôm gêtj dalô nañ in kôm pi Jona.” Yisu sôm yom dinañ su, goc hu nac siñ ma kölhö gi.

Yisu puc lau Palêsai ti lau Sadiusi si giso asê

(Mak 8:14-21)

⁵Têtj ndoc Yisu ti ngacsênomi sêmbu akêtj bugicton ñadanga sêmen, nañ ngacsênomi sêkôc bolom dom, sêñlhiñ dau siñ. ⁶Ma Yisu sôm têtj nac, “Ayob daôm ñapep tu lau Palêsai ti lau Sadiusi si yist.” ⁷Goc nac sem yomgalôm sêwhiñ dandi ma sêsôm, “Iñ sôm yom dinañ ñahu bu yac dakôc bolom dom.” ⁸Magoc Yisu kêyalê nac si yom dau, dec sôm, “O mac lau nañ akêtj whiñ gwalec! Tu sake-nga mac am yomgalôm awhiñ daôm, ma gauc gêm bu aö gasôm yom pi yist, ñahu bu mac nem bolom mba? ⁹Bocke mac nem gauc sa pi gêtj hoñ nañ aö gakôm, nañ dom? Gauc nem bolom amanñdan nañ gakêtj têtj lau 5,000 señ. Tiñambu mac ahoñ ñadêlê sa sip gatop hiñga? ¹⁰Ma têtj ndoc lau 4,000 señ bolom amanñdan ñandôlu, nañ ñadêlê sip gatop hiñga? ¹¹Aö gasôm yom pi bolom kaiñ dinañ dom, ma bocke dec mac añyalê aneñ yom ñahu dom? Ayob daôm ñapep pi lau Sadiusi ti lau Palêsai si yist.” ¹²Têtj

dinaŋ ɲac si gauc sa. Ma sêɲyalê bu iŋ ndê yom hêganôŋ yist bolom-ɲga dom. Sêɲyalê bu iŋ kên puc ɲac bu sêyob dau pi yom naŋ lau Sadiusi ti lau Palêsai sêndôhôn têt lau.

Pita hoc Yisu ɲahu asê
(*Mak 8:27-30; Luk 9:18-21*)

¹³Yisu ti ndê ɲgacsêɲjomi sêhóc asê gameŋ naŋ sêsam bu Sisaria Pilipai, ma iŋ ndac ɲac, “Lau sêsôm sake pi ɲamalac ndê Atu? Sêsôm bu iŋ asa?” ¹⁴Ma sêsôm, “Lau ɲatô sêsôm bu am Jon, ɲgac Kêku Lau-ɲga, ma ɲatô sêsôm bu am Elaija, ma ɲatô sêsôm bu am Jeremaya me propet akwa-kwa si daŋ.”

¹⁵Goc Yisu ndac ɲac, “Ma mac daôm, mac asôm bu aô asa?” ¹⁶Ma Saimon Pita ô yom ma sôm, “Am Mesaya, Anötö Tali ɲadau ndê Atu am.” ¹⁷Dec Yisu sôm, “O Saimon, Jona ndê atu, aô awhaŋ hóc am, bu ɲamalac daŋ hoc yom dau asê têt am dom. Damaŋ undambê-ɲga kên gauc dinaŋ têt am. ¹⁸Aô wasôm têt am, bu am Pita, ma aô wandic aneŋ gôlôwac dabuŋ sa sêlhac hoc dau ɲahô.^h Ma ɲaclai lambwam-ɲga gitôm dom bu ku ɲac dulu. ¹⁹Ma aô wakêt ki têt am bu yob gatam lau sêsóc Anötö ndê gôliŋ ɲapu-ɲga. Ma gêt bocke naŋ am bu êmbwala su yêc nom, naŋ wambwala su yêc undambê. Ma gêt bocke naŋ am bu sô dôŋ yêc nom, naŋ wasô dôŋ yêc undambê bocdinaŋ.” ²⁰Yisu sôm yom dinaŋ su, goc gic yao iŋ ndê ɲgacsêɲjomi ti ɲaŋga, bu sêsôm asê têt lau bu iŋ Mesaya dau dom.

Yisu sôm gwanaj bu iŋ oc hóc ɲandê
(*Mak 8:31-33; Luk 9:22*)

²¹Têt têt dinaŋ Yisu gic hu sôm yom têt ndê ɲgacsêɲjomi, pi gêt naŋ oc hóc asê iŋ. Iŋ whê sa bu iŋ gic waê bu têt Jerusalem ndi, ma lau bata Israel-ɲga ti dabuŋsiga atu-tu, ma kêdôhônɲwaga yomsu-ɲga oc sêkêt ɲawapac daêsam têt iŋ e lau sêndic iŋ ndu. Ma têt bêc titö-ɲga Anötö oc uŋ iŋ sa mbo tali tiyham. ²²Goc Pita kóc iŋ sa ɲasawa sauŋ gi, ma sôm iŋ bocdec bu, “Pômdau, mba! Tu Anötö-ɲga, oc mba! Gêt dinaŋ oc tap am sa dom andô!” ²³Yisu kac dau kwi ma sôm têt Pita, “Sadaŋ, kóc daôm sa lhö su! Am gauc gêm bu lhac aô ahuc, a? Am kêyalê Anötö ndê lêt dom, am bu êmkuc ɲamalac si gauc ɲambwa.”

Lau naŋ sêɲkuc Yisu oc sêhóc ɲawapac
(*Mak 8:34–9:1; Luk 9:23-27*)

²⁴Goc iŋ sôm têt iŋ ndê ɲgac-sêɲjomi, “Asa naŋ tac whiŋ bu êɲkuc aô, naŋ êɲgwiniŋ dau ma hóc ndê a gicso dau sa, ma êɲkuc aô. ²⁵Bu asa naŋ tac whiŋ

^h **16:18** Yêc Yom Grik Pita ndê ɲaê sêsam bu ‘Petros,’ ma hoc sêsam bu ‘petra.’ Lau ɲatô gauc gêm bu Yisu ndê yom pi hoc naŋ iŋ ndê gôlôwac dabuŋ oc sêlhac ɲahô, naŋ hêganôŋ yom naŋ Pita hoc asê pi Yisu. Bu Pita hoc yom asê ma sôm bu Yisu iŋ Mesaya, Anötö Atu, ma yom dau ti gôlôwac dabuŋ hoŋ si yom sêkêt whiŋ-ɲga ɲahu.

bu sap gêñ nom-nga dôñ ñapañ tu mbo tali-nga, nañ oc ñinga. Magoc asa nañ bu hu gêñ nom-nga siñ tu êñkuc aö-nga, nañ oc ñinga dom. ²⁶Ñamalac dañ bu po gêñ nom-nga hoñ sa, magoc iñ dau gatu bu ñinga, dec gêñ nom-nga hoñ dinañ oc tôñ dom bu nem iñ sa. Gêñ ñayham bocke yêc, nañ gitôm bu dakêñ têtñ Anötö ô yac neñ gatuñ? ²⁷Tiñambu Ñamalac ndê Atu oc mbu meñ ti Damba ndê ñaclai ti ñawasi undambê-nga, ma whiñ añela hoñ. Têtñ dinañ iñ oc kên ñagêyô têtñ ñamalac hoñ tôñ ndi, êñkuc mêtê nañ ñac sêkôm. ²⁸Aö wasôm yom ñandô têtñ mac! Lau ñatô nañ sêlhac dec, nañ oc gacgeñ sêmbo tali e sêlic Ñamalac ndê Atu meñ ti ndê ñaclai nem gôlin-nga.”

Pita, Jems ma Jon sêlic Yisu ndê ñawasi

(Mak 9:2-13; Luk 9:28-36)

17 ¹Bêc 6 giñga su, goc Yisu kôc Pita, ma Jems lu asi Jon sêwhiñ iñ, ma ñac tawasê sêpi lôc baliñ dañ si. ²Yêc dindê sêlic Yisu ndê ñamlic kaiñ dañ sa. Iñ añgô andô ñawê sa gitôm ac pô gameñ, ma iñ ndê ñakwê ñawasi sêp sambuc. ³Ma sêlic Moses lu Elaija sêhoc dau asê ma iñlu sem yomgalôm sêwhiñ Yisu. ⁴Goc Pita sôm têtñ Yisu, “Pômdau, ñayham kêlêc bu dambo dec. Am bu tac whiñ, goc aö wakwê bac tö bu mac ambo-nga, am nem bac dañ, Moses ndê dañ, ma Elaija ndê bac dañ.” ⁵Iñ sôm yom dau mbo, ma dao ti ñawê atu dañ sip meñ ma kêgatôc ñac ahuc. Ma awha dañ sa yêc dao ñalôm, nañ sôm, “Aö neñ atungac dau dindêc. Aö gatisambuc iñ, ma atac whiñ iñ ndu andô. Añgô iñ ndê yom mañ!” ⁶Têtñ ndoc ñgac-sêñomi tö sêñgô awha dinañ, nañ sêtôc dau ñalêñ sac, ma sêhu dau añgô andô sip nom. ⁷Magoc Yisu têtñ ñac gi, kêmasêc ñac ma sôm, “Atisa ma atôc daôm dom.” ⁸Ma sêhóc tandô sa ma sêlic bu Yisu tawasê mbo.

Gêndac pi Elaija

(Mak 9:11-13)

⁹Tiñambu ñac sêsip akêñ lôc dau sêmey, ma Yisu kên yao ñac bocdec bu, “Andic miñ pi gêñ nañ mac alic nañ dom, e Ñamalac ndê Atu tisa akêñ lau batê-nga.” ¹⁰Ma ñgacsêñomi tö dinañ sêndac iñ bocdec bu, “Lau †Skraib nañ sêndôhôn yomsu, nañ sêsôm bu Elaija oc meñ hôc asê muñ, ma tiñambu Mesaya oc meñ. Yom dau ñahu bocke?” ¹¹Goc Yisu ô yom ma sôm, “Elaija gic waê bu meñ ma êmasañ gêñ hoñ tisolop. ¹²Ma aö wasôm têtñ mac, bu Elaija meñ su, tigeñ lau sêñyalê iñ dom. Ma sêkôm mêtê sac têtñ iñ tôñ ñac atac whiñ. Ma ñalêñ tigeñ Ñamalac ndê Atu oc sip ñac si amba, ma sêkêñ ñandê atu têtñ iñ.” ¹³Têtñ dinañ ñac si gauc sa bu Yisu ndê yom pi Elaija hêganôn Jon, Ñgac Kêku Lau-nga.

Yisu soc ñalau sac su yêc balê dañ

(Mak 9:14-29; Luk 9:37-43)

¹⁴Têtñ têm ñac sêmbo sêmey, nañ sêtap lau toñ atu sa, ma ñgac dañ têtñ Yisu gi ma pôn haduc. ¹⁵Ma iñ sôm, “Pômdau, tamwalô aney balê ma

nem iŋ sa. Iŋ hōc ŋawapac atu daŋ, ma ndoc daēsam kōm iŋ titoŋ e peŋ sip ya me bu. ¹⁶Aō gakōc iŋ gatêŋ nem ŋgac-sêŋomi ga, magoc ŋac sêtōm dom bu sêkōm iŋ ŋayham sa.” ¹⁷Ma Yisu sōm, “O mac lau sac! Aō gambo gawhiŋ mac ŋasawa hic baliŋ su, ma bocke mac atōm dom bu akōm gêŋ daŋ? Aō wambo wawhiŋ mac tu wanem mac sa-ŋga ŋapaŋ dom! Mac nem akêŋ whiŋ mbasi. Akōc balê dau sa amen.” ¹⁸Goc Yisu hec yom ŋalau sac naŋ mbo balê dau ŋalōm, ma soc iŋ sa awê gi, ma ŋagahō eŋ balê dau ŋayham sa.

¹⁹Tiŋambu ŋgacsêŋomi sêtêŋ Yisu si, ma sêndac iŋ gelec, “Tu sake-ŋga yac atōm dom bu aseŋ ŋalau sac dinaŋ su?” ²⁰Ma iŋ ô yom ma sōm, “Mac atōm dom, bu mac akêŋ whiŋ Anötō ndê ŋaclai gitōm dom. Yomandō aō wasōm têŋ mac, bu mac nem akêŋ whiŋ bu nditōm gêŋ sauŋ andō daŋ, tōm soc ŋamatu sauŋ, dec oc tōm bu mac asōm têŋ lôc daŋ bu puc dau sa ma têŋ gameŋ wakuc ndi, goc lôc dau oc ndi. Akêŋ whiŋ, ma mac oc atōm bu akōm gêŋ hoŋ. [²¹Yac bu dasoc ŋalau sac kaiŋ dinaŋ su, goc gêŋ ŋamata-ŋga dahu gêŋ daneŋ-ŋga siŋ tu gauc nem Anötō-ŋga, ma dateŋ mbec ŋaŋga.]”

Yisu sōm tiyham bu iŋ oc mbac ndu ma tisa tiyham
(*Mak 9:30-32; Luk 9:43-45*)

²²Tiŋambu Yisu ndê ŋgac-sêŋomi sêkac dau sa yêc gameŋ Galili-ŋga, ma iŋ sōm têŋ ŋac, “Tiŋambu oc sêkêŋ ŋamalac ndê Atu sip lau ŋatō amba. ²³Ŋac oc sêndic iŋ ndu, magoc têŋ bêc titō-ŋga Anötō oc uŋ iŋ sa mbo tali tiyham.” Yisu ndê yom dinaŋ kōm ŋgacsêŋomi si ŋalōm ŋawapac ŋandō.

Takis Lôm Dabuŋ-ŋga

²⁴Tiŋambu Yisu ti ndê ŋgac-sêŋomi sêhōc asê malac Kapenaom, ma lau naŋ sêkōc takis lôm dabuŋ-ŋga,ⁱ naŋ sêtêŋ Pita si ma sêndac iŋ bocdec bu, “Bocke? Mac nem kêdôhōŋwaga oc kêŋ mone nemlhi takis lôm dabuŋ-ŋga, me mba?” ²⁵Ma Pita sōm, “Hecêŋ, iŋ oc nemlhi.”

Têŋ ndoc Pita sōc andu gi, naŋ iŋ gic miŋ yom dau têŋ Yisu dom, magoc Yisu dau ndac iŋ, “Saimon, am gauc gêm sake? Kiŋ nom-ŋga sêkōc takis yêc lau asa? Sêkōc yêc ŋac dau si atui, me sêkōc yêc lau ŋatō?” ²⁶Goc Pita ô yom ma sōm, “Ŋac sêkōc takis yêc lau ŋatō.” Ma Yisu sōm, “Bocdinaŋ yomsu takis-ŋga hêganōŋ Kiŋ ndê atui dom. ²⁷Tigeŋ yham dom bu ŋac sêlic yac sac. Bocdinaŋ sa ndi ma kêŋ gam yêc bugictoŋ. Ma i ŋamata-ŋga naŋ am hê sa, naŋ kac i dau whasuŋ sa, ma am oc tap mone

ⁱ 17:24 Tōm yala tigeŋ-tigeŋ lauŋgac Israel-ŋga hoŋ naŋ si yala hōc gêlêc 20, naŋ semlhi takis lôm dabuŋ-ŋga. Takis dau gitōm lau Grik si mone drakma lu, gitōm ŋaōli naŋ sêkōc tu gwelêŋ bêc lu-ŋga. Alic Eks 30:13 ma 38:26.

sa gitôm bu nemlhi hêclu neŋ takis lôm dabuŋ-ŋga. Kôc sa, ma kêŋ têtŋ ŋac.”

Asa ti ŋamalac ŋamata-ŋga?

(Mak 9:33-37; Luk 9:46-48)

18 ¹Têtŋ ndoc dinaŋ ŋgac-sêŋomi sêtêtŋ Yisu si, ma sêndac iŋ bocdec bu, “Lau naŋ sêmbo Anötö ndê gôliŋ ŋapu, naŋ si asa ti ŋamalac ŋamata-ŋga?” ²Goc Yisu ta balêkoc sauŋ daŋ meŋ, ma kêŋ iŋ kalhac ŋac ŋalhu. ³Ma iŋ sôm, “Anem daôm kwi ma aŋgwiniŋ daôm e atôm balêkoc sauŋ. Bu mba, naŋ wasôm yom ŋandô têtŋ mac bu mac atôm dom bu asôc Anötö ndê gôliŋ ŋapu. ⁴Asa naŋ bu êŋgwiniŋ dau nditôm balêkoc dindec, naŋ ti ŋamalac ŋamata-ŋga yêc Anötö ndê gôliŋ ŋapu. ⁵Ma asa naŋ kôc balêkoc sauŋ daŋ gitôm iŋ dindec, naŋ sa tu aneŋ ŋaê-ŋga, naŋ gitôm iŋ kôc aô dauŋ sa.”

Puc pi lêtôm

(Mak 9:42-48; Luk 17:1-2)

⁶Ma Yisu sôm, “Ŋamalac daŋ bu tim balêkoc sauŋ dindec si daŋ naŋ kêŋ whiŋ aô bu kôm mêtê sac, naŋ kôm giso atu. Oc ŋayham bu dasô hoc atu daŋ pi iŋ kachu, ma tambaliŋ iŋ sip gwêc tim ndi, ma gwêc kô iŋ mbac ndu. Ma boc-dinaŋ oc tôm dom bu iŋ tim balêkoc dau, ma tiŋambu tap Anötö ndê matôc sa.

⁷“Aô wasôm têtŋ mac, bu gêtŋ lêtôm-ŋga oc sêmeŋ, ma sêkêtŋ ŋawapac têtŋ lau nom-ŋga. Tigeŋ asa naŋ bu kôc gêtŋ lêtôm-ŋga daŋ meŋ, naŋ oc tap Anötö ndê matôc sa. Oyaê! ⁸Bocdinaŋ am amam me gahim daŋ bu wê am bu kôm sac, goc tim kic. Oc ŋayham bu am sôc undambê ma ndôc tamli ti amam gatuc me gahim gatuc, hóc gêlêc naŋ am kôm sac ti lic sambuc e Anötö tuc am sip ya naŋ sa ŋapaŋ, naŋ ndi. ⁹Ma am nem tanôm bu wê am bu kôm sac, goc kip sa ma êmbaliŋ niŋga. Am bu mbo tamli ndôc undambê ti tanôm tigeŋ, naŋ hóc gêlêc am mbo ti tanôm lu ma kôm sac, dec tiŋambu Anötö tuc am sip ya lambwam-ŋga ndi.”

Yom gôliŋ pi domba naŋ giŋga

(Luk 15:4-7)

¹⁰“Ma ayob daôm ŋapep bu alic lau sauŋ dindec gitôm gêtŋ ŋambwa dom. Aô wasôm têtŋ mac, bu ŋac si aŋela naŋ sêmbo undambê, naŋ sêlhac Damaŋ undambê-ŋga ndê aŋgô andô-ŋga. [¹¹Ŋamalac ndê Atu meŋ bu nem lau naŋ siŋga su, naŋ si.]

¹²“Akôc gauc pi ŋgac daŋ naŋ yob domba 100. Têtŋ ndoc domba daŋ bu êŋsêlêŋ bambaliŋ e ndi niŋga, naŋ iŋ oc kôm sake? Iŋ oc hu 99 siŋ sêmbo, ma sa ndi êŋsalê daŋ naŋ giŋga. ¹³Aô wasôm têtŋ mac bu têtŋ ndoc iŋ tap sa, naŋ iŋ ndê atac ŋayham tu domba tigeŋ dinaŋ-ŋga oc hóc gêlêc

inj ndê atac ñayham pi 99 nañ sêmbô, nañ su. ¹⁴Ma bocdinañ, mac nem Damam undambê-ñga tec bu lau sauñ ñañ sêniñga.”

Lêñ tamatôc asidôwai si yom-ñga

¹⁵“Am nem asidôwa ñañ bu kôm sac têtñ am, goc am tamwasêm têtñ inj ndi, ma sôm inj ndê giso asê têtñ inj. Inj bu ñgô am nem yom ma kac ndê ñalôm kwi, dec amlu apitigeñ tiyham ma ambo ti yom malô. ¹⁶Magoc inj bu ñgô dom, dec kôm tôm yac neñ ñagôliñ, nañ sôm bu yom nañ lau lu me tō sêpuc dôn, nañ dakôc sa ti yom ñandô. Boc-dinañ kôc ñamalac tigeñ me lu sêwhiñ am, tu bu sêpuc am nem yom dôn-ñga, ma atêtñ nem asidôwa dau andi. ¹⁷Ma asidôwa dau bu sôc lau dinañ si yom ñapu dom, nañ sôm yom dau asê têtñ gôlôwac dabuñ hoñ. Ma inj bu tec bu sôc gôlôwac dabuñ si yom ñapu, nañ goc alic inj gitôm ñgac sambuc me ñgac kôc takis-ñga nañ kêyalê Anötô dom.

¹⁸“Aô wasôm yom ñandô têtñ mac. Gêtñ bocke nañ mac ambwala su yêc nom, nañ wambwala su yêc undambê. Ma gêtñ bocke nañ mac asô dôn yêc nom, nañ wasô dôn yêc undambê bocdinañ.

¹⁹“Ma gêtñ ñañ tiyham. Mac nem ñamalac lu me tō bu ñalôm tigeñ bu atetñ gêtñ ñañ têtñ Damañ undambê-ñga, nañ inj oc kêtñ têtñ mac. ²⁰Ñahu bu gameñ bocke nañ mac nem ñamalac lu me tō akac daôm sa tu aneñ ñaê-ñga, nañ aô oc wambo wawhiñ mac.”

Dasuc asidôwai si sac kwi mañ

²¹Pita têtñ Yisu gi, ma ndac inj bocdec bu, “Pômdau, sôm têtñ aô. Aneñ asidôwa ñañ bu kôm sac têtñ aô ñapañ, nañ wasuc inj ndê sac kwi tidim hiñga? Nditôm 7, me tidim hiñga?” ²²Goc Yisu sôm, “Aô wasôm têtñ am, bu tidim 7 dom. Suc inj ndê sac kwi tidim 77 ma hôc gêlêc. Sê sa dom!

²³“Añgô su nañ! Aô bu wawhê sa têtñ mac, lêñ dasuc sac kwi-ñga nañ gic waê lau nañ sêmbô Anötô ndê gôliñ ñapu. Kiñ ñañ mbo, ma inj tac whiñ bu êmasañ yom whiñ inj ndê lau akiñ nañ si tōp yêc inj. ²⁴Inj gic hu gweleñ dau, ma sêkêtñ ñgac ñañ kalhac inj añgô-ñga, nañ ndê tōp atu andô, gitôm mone talent 10,000.^j ²⁵Ñgac dinañ gitôm dom bu ô ndê tōp, goc Kiñ dau sôm bu sêkêtñ inj ti inj ndê awhê ma balêkoc ma inj ndê gêtñ hoñ bu lau sênemlhi ô tōp dau. ²⁶Dec ñgac akiñ dau hu dau sip gi pôn haduc têtñ Kiñ, ma teñ inj bocdec bu, ‘Kêtñ ñasawa têtñ aô, ma waô gêtñ hoñ!’ ²⁷Goc Kiñ tawalô inj, ma hu yom tōp-ñga siñ, ma kêtñ inj sa gi.

²⁸“Tigeñ tiñambu ñgac dau tap ñgac akiñ ñañ sa, nañ ndê tōp sauñ yêc inj, gitôm mone ðdenarii 100.^k Inj gôlô ñgac dau dôn, hôc inj sip kachu, ma

^j 18:24 Lau Grik si mone nañ sêsam bu talent, nañ ñaôli atu andô - talent tigeñ gitôm K5-6,000. Bocdinañ ñgac dau ndê tōp hôc gêlêc 5 milien kina. ^k 18:28 Ñgac dau ndê tōp gitôm K5-600.

sôm, ‘Am ndic nem tôp têtj aö!’ ²⁹Ma ngac dau hu dau sip gi pôn haduc ma tej ij bocdec bu, ‘Kêtj ñasawa têtj aö ma wað neñ tôp.’ ³⁰Tigeñ ij tec, ma kêtj ngac dau ndöc gapocwalö e ij ô tôp honj pacndê. ³¹Lau akiñ ñatö sêlic gêtj dinañ, dec ñalôm ñawapac ñandö, ma sêtêtj Kiñ si ma sic miñ gêtj honj têtj ij. ³²Goc ij ta ngac akiñ dau ma sôm têtj ij, ‘Am ngac sac! Am tej aö bu tañwalö am, dec aö gahu am nem yom tôp-ñga siñ. ³³Tu sake-ñga am tamwalö ngac dinañ dom, gitôm aö tañwalö am?’ ³⁴Goc ij tac ñandê atu, ma kêtj ngac akiñ dau têtj lau gapocwalö-ñga, bu sêndic ij ñamlic ñandê ma ndöc gapocwalö e ij ndic ndê tôp sambuc su.”

³⁵Yisu gic bata yom göliñ dau, goc sôm, “Mac bocdinañ, asuc nem asidöwai si sac kwi ma gauc nem tiyham dom. Bu mba, dec aneñ Damañ undambê-ñga oc kôm têtj mac gitôm Kiñ dinañ kôm têtj ndê ngac akiñ.”

Anötö tec bu awhê lu ngac sêhu dau siñ

(Mak 10:1-12)

19 ¹Yisu sôm yom dau su, goc hu gameñ Galili-ñga siñ, ma têtj gameñ Judia-ñga nañ yêc Bu Jordan ñadañga têtj ac pi-ñga, nañ gi. ²Lau daêsam sêñkuc ij, ma yêc gameñ dinañ ij kôm ñac si gêmbac ñayham sa.

³Ma lau Palêsai ñatö sêtêtj ij si bu sêtim ij, dec sêndac ij bocdec bu, “Yom dañ yêc, nañ tôm bu ngac dañ hu ndê awhê siñ, me mba? Ij oc êñgili yomsu, me mba?” ⁴Goc ij sôm, “Mac añyalê Anötö ndê yom nañ sêto yêc, me mba? Yom dau sôm bu, ‘Têtj têtj ñamata-ñga Anötö kêmasañ ñamalac awhê ma ngac.’ ⁵Ma yom dañ tiyham sôm, ‘Tu dinañ-ñga ngac dañ oc hu damba lu dinda siñ, ma sap ij ndê awhê döñ. Ma iñlu sêti gêtj tigeñ.’ ⁶Yom dau whê sa bu iñlu sêmbo sêtôm ñamalac lu dom, iñlu sêti gêtj tigeñ yêc Anötö añgö-ñga. Bocdinañ yham dom andö bu ñamalac sêkac gêtj nañ Anötö dau kêtj pitigeñ, nañ su.”

⁷Goc sêndac ij, “Bocdinañ dec tu sake-ñga Moses to yomsu dañ, nañ sôm bu ngac dañ gitôm bu to bapia hu nawhê siñ-ñga, goc hu ij siñ?” ⁸Ma Yisu ô yom bocdec bu, “Moses kêyalê bu mac nem ñalôm ñadandi, dec sôm bu ngac dañ gitôm bu hu ndê awhê siñ. Tigeñ têtj têtj ñamata-ñga Anötö kêmasañ ñamalac awhê ma ngac tu bu sêhu dau siñ-ñga dom. ⁹Aö wasôm têtj mac, bu yom tigeñ yêc bu ngac dañ hu ndê awhê siñ, nañ awhê dau kôm mêtê mockaiñ-ñga whiñ ngac dañ. Ma ngac dañ bu hu ndê awhê siñ tu gêtj dau-ñga dañ-ñga, ma nem awhê wakuc, nañ kôm mêtê mockaiñ-ñga yêc Anötö añgö-ñga.”

¹⁰Têtj dinañ Yisu ndê ngac-sêñjomi sêsôm têtj ij, “Bu bocdinañ, dec mboe oc ñayham bu lau sênem dau dom, a? Oc ñawapac atu bu awhê lu ngac sêsöc yom dau ñapu.” ¹¹Magoc ij sôm, “Mba! Anötö kêmasañ awhê lu ngac bu sênem dau. Magoc lau tigeñ-tigeñ ij kêmasañ ñac bu sênem awhê me ngac dom. ¹²Lañgac ñatö dindai sêkôc ñac, nañ sêtôm dom bu

sênem awhê. Ma laungac ñatô nañ sêsê ñac bu sênem awhê dom. Ma ñatô sêkên dau sambuc tu gwelenj ñawaê ñayham-ñga tu bu sêpo Anötö ndê gôlij sa, ma tu dinañ-ñga dec sem awhê dom. Am asa nañ gitôm bu kôc yom dindec sa ma sôc ñapu, nañ kôc sa.”

Yisu gêm mbec balêkoc

(Mak 10:13-16; Luk 18:15-17)

¹³Lau ñatô sêkôc si balêkoc sêtên Yisu si. Ñac tac whinj bu inj kên amba sac ñac, ma tej mbec pi ñac. Tigerj ñgacsênjomi sêsôm dinda ti dambai. ¹⁴Goc Yisu sôm, “Atec balêkoc sêtên aô sêmenj. Alhac ñac ahuc dom, bu Anötö ndê gôlij gic lau nañ sêtôm balêkoc sauñ dindec, nañ ñawaê.” ¹⁵Ma inj kên amba sac ñac hoñ ma gêm mbec ñac, goc tisa ma kölhô gi.

Ñgac ti lêlôm

(Mak 10:17-22; Luk 18:18-23)

¹⁶Ma ñgac dañ têtj Yisu gi, ma ndac inj bocdec bu, “Kêdôhônjwaga, aô wakôm gênj ñayham bocke, dec tiñambu Anötö oc kôc aô sa wandôc tarñli yêc undambê?” ¹⁷Yisu ô yom ma sôm, “Tu sake-ñga am ndac aô bu gênj sake inj gênj ñayham? Anötö tawasê inj ñayham. Am bu ndôc tamli yêc undambê, nañ dañam wambu yomsu nañ Anötö kênj têtj Moses.” ¹⁸Goc ñgac dau ndac, “Yomsu hoñ, me yomsu bocke?” Ma Yisu sôm, “Yomsu bocdec bu, *‘Ndic ñamalac ndu dom. Kôm gênj mockainj-ñga dom. Nem kanj gênj dom. Sôm yom tasanj pi lau dom.* ¹⁹Toc damam lu dinam sa,’ ma *‘Tac whinj lau ñatô gitôm am tac whinj daôm.’*” ²⁰Goc inj sôm, “Yomsu hoñ dinañ aô kakuc gambo. Ma gênj sake yêc tu wakôm-ñga?” ²¹Ma Yisu sôm, “Am bu ti ñgac gitênj, nañ sa ndi ma kênj nem gênj hoñ têtj lau sênemlhi, ma kênj ña-awa têtj lau ñalôm sawa. Ma bocdinañ dec êmyalê bu am nem awa ñandô yêc undambê. Ma tiñambu mwej ma êmkuc aô.” ²²Ñgac dau inj ndê yala daêsam dom, ma têtj ndoc inj ñgô Yisu ndê yom dinañ, goc inj kölhô ti ñalôm ñawapac gi. Ñahu bu inj ñgac ti lêlôm.

Puc pi awa ti wapa

(Mak 10:23-31; Luk 18:24-30)

²³Goc Yisu sôm têtj ndê ñgac-s êñjomi, “Yomandô wasôm têtj mac, b u lau ti lêlôm oc tôm dom bu sêsôc Anötö ndê gôlij ñapu ñagahô, ñahu bu ñac si awa ti wapa hê ñac kwi. ²⁴Añgô! Bôc atu dañ gitôm kamel, oc tôm bu sôc so ñalasê ñagahô hôc gêlêc ñgac ti lêlôm dañ, nañ bu sôc Anötö ndê gôlij ñapu.” ²⁵Têtj ndoc ñgacsênjomi sêñgô yom dinañ dec sêhêdaê ñandô, ma sêndac Yisu, “Bu bocdinañ dec asa oc tôm bu tap Anötö ndê mwasiñ nem lau si-ñga sa? Oc ñawapac atu!” ²⁶Magoc Yisu tahê ñac ma sôm, “Gênj nañ ñamalac sêtôm dom bu sêkôm, nañ Anötö gitôm bu kôm.”

²⁷Ma Pita ô yom ma sôm, “Yac ahu gênj hoñ siñ tu añkuc am-ñga. Bocdinañ yac oc atap mwasiñ bocke sa?” ²⁸Dec Yisu sôm têtj ñac

hoj, “Yomandô wasôm têt mac, bu têt ndoc nambu-nga nañ gêt hoj sêtiwakuc, nañ Îamalac ndê Atu oc ndöc inj ndê pôn Kir-nga ti ñaclai ma ñawasi atu. Ma mac lau nañ añkuc aö, nañ oc andöc pôn 12, ma anem göliñ lau Israel-nga si toñ 12. ²⁹Ma lau hoj nañ sêhu andu me damba lu dinda, me asidôwai ma balêkoc, me nom siñ tu aö-nga, nañ Anötö oc kêt gêt kaiñ dinañ daêsam têt ñac ô. Ma tiñambu inj oc kêt ñac sêwêkain gameñ sêndöc tali ñapañ-nga.

³⁰“Magoc lau daêsam nañ sêti lau ñamata-nga têt têt kwahic dec-nga, nañ oc sêti lau nambu-nga, ma lau nambu-nga oc sêti lau ñamata-nga.”

Yom göliñ pi lau nañ sem gweleñ yêc ôm wain-nga.

20 ¹Goc Yisu sôm, “Añgô yom göliñ dindec pi Anötö ndê göliñ, oc whê aneñ yom dinañ sa. Îgac dañ mbo, nañ wêkain ôm wain-nga atu dañ. In tisa têt bêbêc ganduc ma sôc malac lôm gi, ma kêsalê lau tu sênem gweleñ yêc inj ndê ôm-nga. ²In tap lau ñatô sa, ma sôm bu inj oc nemlhi ñac ña mone gitôm ñdenarias tigeñ tu gweleñ bêc tigeñ-nga. Goc inj kêkin ñac sêsôc inj ndê ôm si. ³Ma têt acgatu gitôm 9 kilok, inj sa gi gêlic lau ñatô sêlhac ñambwa sêlhac malac lôm. ⁴Ma inj sôm têt ñac, ‘Andi akôm gweleñ yêc aneñ ôm wain-nga, ma aö oc wakêt ñaöli solop têt mac ô nem gweleñ.’ ⁵Goc sêsôc ôm si ma sem gweleñ. Ma inj kôm bocdinañ têt ac kalhac lhu ma têt 3 kilok telha-nga. In gi tap lau sa, ma kêkin ñac si sêkôm gweleñ. ⁶Ma têt 5 kilok telha-nga inj sa gi tap lau ñatô sa, nañ sêlhac ñambwa. Ma inj sôm têt ñac, ‘Tu sake-nga mac ambo ñambwa têt acsalô sambuc dindec?’ ⁷Ma sêsôm, ‘Lau dañ sêmeñ sêkêt gweleñ têt yac tu akôm-nga dom.’ Goc inj sôm, ‘Mac andi anem gweleñ yêc aneñ ôm.’

⁸“Têt ac gi sip, goc ôm ñadau sôm têt inj ndê ñgac ñamata-nga, ‘M bwêc lau nañ sem gweleñ sêmbo, nañ sêmeñ, ma kêt ñac si ñaöli têt ñac. Nemlhi lau nañ sêmeñ têt 5 kilok telha-nga nañ muñ, goc tiñambu nemlhi lau nañ sêmeñ têt bêbêc.’ ⁹Ma lau nañ ñadau kôc ñac sa têt 5 kilok, nañ sêkôc denarias tigeñ-tigeñ ti ñac si ñaöli tôm gi. ¹⁰Tu dinañ-nga dec lau nañ sic hu gweleñ têt bêbêc, sêkêt bata bu oc sêkôc ñaöli hôc gêlêc denarias tigeñ su. Magoc ñac hoj sêkôc denarias tigeñ. ¹¹Têt dinañ ñac sic hu sêtucdiñ ñadau, ¹²ma sêsôm, ‘Lau nañ sêmeñ tiñambu, nañ sem gweleñ gitôm ñasawa apê, ma yac am gweleñ atu ma ac pec yac acsalô sambuc dindec. Magoc yac hoj akôc ñaöli kaiñ tigeñ.’ ¹³Magoc ñadau sôm têt ñac si dañ, ‘O aneñ silip! Bocke dec am sôm bu aö gakôm gêt so têt am? Bêbêc lec am gölôc bu kôc denarias tigeñ ti am nem ñaöli gweleñ-nga. ¹⁴Boc-dinañ kôc nem ñaöli sa, ma lhö ndi. Aö tac whiñ bu wakêt ñaöli têt lau nambu-nga gitôm aö gakêt têt am. ¹⁵Mone dindec aneñ gêt, ma wakôm tôm aö atac whiñ. Bocke dec am gêlic sac bu aö ñgac wamwasinñ lau-nga.’ ”

¹⁶Goc Yisu sôm têtj ndê ngac-sêjomi, “Bocdinaŋ, lau ŋambu-ŋga oc sêti lau ŋamata-ŋga, ma lau ŋ amata-ŋga oc sêti lau ŋambu-ŋga.”

Yisu sôm tiyham bu iŋ oc mbac ndu

(Mak 10:32-34; Luk 18:31-33)

¹⁷Tiŋambu Yisu ma lau naŋ sêŋkuc iŋ, sêŋsêlêŋ sêmbo seŋ bu sêpi malac Jerusalem sêndi. Ma Yisu wê ngacsêjomi 12 sêsa si sêmbo dau-ŋga, ma sôm têtj ŋac, ¹⁸“Kwahic dec yac oc dapi malac Jerusalem dandi, ma ngac daŋ oc kêtj ŋamalac ndê Atu sip dabuŋ-siga atu-tu ti kêdôhônwaga yomsu-ŋga amba. ŋac oc sêkic yom bu sêndic iŋ ndu, ¹⁹ma sêkêtj iŋ sip lau Rom-ŋga amba. Ma lau Rom-ŋga oc sêsu iŋ susu, ma sêndic iŋ ŋamlic ŋandê atu, goc sêndic iŋ ndu pi a gicso dau. Ma têtj bêc titô-ŋga, Anötö oc uŋ iŋ sa mbo tali tiyham.”

Jems lu Jon bu sêhôt gêlêc ngac-sêjomi ŋatô

(Mak 10:35-45)

²⁰Têtj ndoc dinaŋ Jems lu Jon dinda bu teŋ gêtj daŋ têtj Yisu nem iŋlu awha, goc kôt Sebedi ndê atu lu dinaŋ sa sêtêtj Yisu si, ma pôtj haduc yêc iŋ aŋgô-ŋga. ²¹Ma Yisu ndac, “Am tac whiŋ sake?” Goc awhê dau sôm, “Aö tac whiŋ bu am toc aneŋ atuŋ lu dindec sa, ma sôm bu iŋlu sêndöt sêwhiŋ am têtj ndoc am ndöt nem pôtj kiŋ-ŋga ma nem gôliŋ lau. Kêtj daŋ ndöt amam andô-ŋga, ma daŋ ndöt gasê-ŋga.” ²²Dec Yisu sôm têtj iŋlu, “Amlu aŋyalê gêtj naŋ amlu andac, naŋ dom. Amlu atôm bu anôm gêtj sip laclhu ŋawapac-ŋga naŋ aö wanôm, a?” Ma iŋlu sêsôm, “Aêc, alu atôm.” ²³Ma Yisu sôm, “Yomandô, amlu oc ahôt ŋawapac gitôm aö wahôt. Magoc aö dec oc waŋyaliŋ lau sa bu sêndöt aö amaŋ andô-ŋga me gasê-ŋga, naŋ dom. Aneŋ Damaŋ ti ŋadau bu êŋyaliŋ lau sa bu sêndöt dinaŋ.”

²⁴Têtj ndoc ngacsêjomi amaŋlu sêŋgô yom dau ŋawaê, dec kôm ŋac atac ŋandê têtj Jems lu Jon. ²⁵Goc Yisu mbwêc ŋac sêtêtj iŋ si, ma sôm, “Mac aŋyalê bu lau sambuc si gôliŋwaga sêtoc dau sa têtj ŋac si lau, ma ŋac si lau bata sêŋgwiniŋ lau naŋ sêmbo ŋac ŋapu. ²⁶Tigeŋ mac aŋkuc ŋac si mêtê dau dom. Mba! Mac nem asa naŋ tac whiŋ bu ti ŋamalac tiwaê yêc Anötö aŋgô-ŋga, naŋ nem akiŋ mac. ²⁷Aêc! Asa naŋ bu ti mac nem ŋamalac ŋamata-ŋga, naŋ êŋgwiniŋ dau ma ti mac nem ngac akiŋ ŋambwa. ²⁸ŋalêŋ tigeŋ ŋamalac ndê Atu meŋ bu lau sênem akiŋ iŋ dom. Iŋ meŋ bu nem akiŋ lau, ma bu kêtj dau ti da bu nemlhi lau daêsam si sac ŋatôp.”

Yisu kôm ngac tapec lu ŋayham sa

(Mak 10:46-52; Luk 18:35-43)

²⁹Têtj ndoc Yisu ti iŋ ndê ngac-sêjomi sêhu malac Jeriko siŋ, naŋ lau daêsam sêŋkuc iŋ. ³⁰ŋgac tapec lu sêndöt seŋ ŋamakê, ma sêŋgô ŋawaê

bu Yisu kêsêlêṅ meṅ, goc sêmbwêc, “Pômdau, Dawid ndê Atu, tamwalô alu.”³¹ Goc lau sêsôm iṅlu bu sênem dau dônṅ. Magoc iṅlu sêmbwêc ti ṅaṅga, “Pômdau, Dawid ndê Atu, tamwalô alu.”³² Yisu kwê dônṅ kalhac ma ta iṅlu sêmeṅ. Ma iṅ ndac, “Amlu atac whiṅ bu wakôm sake têtṅ amlu?”³³ Ma sêd yom ma sêsôm, “Pômdau, alu atac whiṅ bu tanônṅ ṅayham sa.”³⁴ Dec Yisu tawalô iṅlu, ma kêmasec iṅlu tandô. Ma ṅagahô iṅlu tandô ṅayham sa, ma sêṅkuc iṅ.

Yisu hôc asê Jerusalem

(Mak 11:1-10; Luk 19:29-38; Jon 12:12-15)

21 ¹Ṇac sêsuy sa Jerusalem ma sêhôc asê malac Betpagi yêc Lôc Olib. Ma Yisu kêkiṅ ndê ṅgacsêṅomi si ṅgac lu, ²ma sôm têtṅ iṅlu, “Amlu asôc malac dindê andi, ma amlu oc atap doṅki dinda daṅ sa, naṅ sêsô dônṅ kalhac, whiṅ doṅki dau ṅatu. Aṅgapwêc su, ma akôc sa atêtṅ aô amêṅ. ³Ma ṅamalac daṅ bu ndac amlu pi gêtṅ dau, naṅ asôm têtṅ iṅ bu, ‘Pômdau tac whiṅ bu doṅki lu dindêc sênem iṅ sa,’ ma ṅagahô iṅ oc kêṅ doṅki lu dau têtṅ amlu.”

⁴Ṇalêṅ dinaṅ dec yom naṅ propet akwa daṅ sôm, naṅ ṅandô sa. Yom dau sêto yêc bocdec:

⁵Asôm têtṅ lau †Sayon-ṅga bu, “Alic su naṅ! Mac nem Kiṅ têtṅ mac meṅ. Iṅ ṅgac malô, ma iṅ meṅ ndôc doṅki ṅatu daṅ ṅahô.” [Sek 9:9; Ais 62:11]

⁶Ṇgacsêṅom lu dinaṅ sêsôc malac si, ma sêkôm tôm Yisu sôm. ⁷Sêwê doṅki dinda lu ṅatu sêtêtṅ Yisu si, ma sêkêṅ ṅac si ṅakwê awê-ṅga sac doṅki, ma Yisu pi gi ndôc ṅahô. ⁸Ma lau daêsam sêhê si ṅakwê yêc seṅ, ma sêhêako a ṅalauṅ ma sêkêṅ yêc seṅ. ⁹Ma lau toṅ atu naṅ sêṅsêlêṅ sêmuṅ Yisu, ti lau naṅ sêṅkuc iṅ, naṅ sêmbwêc, “Hosana têtṅ Dawid ndê Atu. Anötô nem mbec iṅ naṅ meṅ gêm Pômdau aṅgô. Hosana têtṅ Anötô lôlôc-ṅga.”

¹⁰Têtṅ ndoc Yisu sôc malac Jerusalem gi, naṅ lau malac-ṅga hoṅ gauc gêm yom daêsam ma sêndac, “Iṅ asa dê?” ¹¹Ma lau daêsam sêṅgô ṅac si yom ma sêsôm, “Iṅ Yisu, propet atu naṅ meṅ akêṅ malac Nasaret yêc gameṅ Galili-ṅga.”

Yisu soc lau su yêc lôm dabuṅ

(Mak 11:15-18; Luk 19:45-46)

¹²Yisu sôc lôm dabuṅ ṅabatêm-ndô gi, ma soc lau naṅ sic dulu gêtṅ ti semlhi gêtṅ, naṅ su. Ma iṅ tac lau naṅ sêd mone,¹ naṅ si tebo sa, ma lau naṅ sêkêṅ balusi^m tu lau sênemlhi-ṅga, naṅ iṅ kêbalip ṅac si gêtṅ hoṅ giṅga. ¹³Ma iṅ

¹ **21:12** Lau sêmeṅ akêṅ gameṅ baliṅ bu sêlic om atu-atu yêc malac Jerusalem, ma bu sêkêṅ da ya ti sêtoc Anötô sa yêc lôm dabuṅ. Ṇac gitôm dom bu sênemlhi gêtṅ bu sêkêṅ ti da, me sênemlhi takis lôm dabuṅ-ṅga ṅa mone akêṅ ṅac si gameṅ, ma bocdinaṅ lau ṅatô sêkôm gwelêṅ yêc lôm dabuṅ ma sêd ṅac si mone ṅa mone naṅ gitôm bu sênemlhi gêtṅ-ṅga.

^m **21:12** Lau ṅalôm sawa naṅ gitôm dom bu sênemlhi domba bu sêkêṅ ti da, naṅ semlhi balusi bu sêkêṅ ti da. (Alic Lev 5:7, 12:6, 14:22 ma Luk 2:22-24).

sôm, “Sêto Anötö ndê yom yêc, naŋ sôm, ‘*Aneŋ andu gic waê bu lau sêteŋ mbec sêmbo-ŋga.*’ Tigeŋ mac akôm Anötö ndê andu ti lau kaŋ si gameŋ.”

¹⁴Lau bôliŋ ti lau tapec sêtêŋ Yisu si yêc lôm dabuŋ ŋamakê, ma iŋ kôm ŋac ŋayham sa. ¹⁵Ma balêkoc naŋ sêmbo gameŋ dinaŋ, n aŋ sêmbwêc yom bocdec, “Hosana têŋ Dawid ndê Atu!” Magoc têŋ ndoc dabuŋsiga atu-tu ma kêdôhônŋwaga yomsu-ŋga sêlic gêŋ dalô naŋ Yisu kôm, ma sêŋgô balêkoc dau si yom, dec kôm ŋac atac ŋandê atu. ¹⁶Ma sêndac iŋ, “Am ŋgô balêkoc dindêc sêmbwêc yom so, me?” Ma iŋ sôm, “Mba! Sêto yom yêc bocdec bu, ‘*Anötö kêyalîŋ balêkoc ti lau sauŋ sa, tu bu sêhoc iŋ ndê waê asê-ŋga.*’”

¹⁷Tiŋambu Yisu hu ŋac siŋ ma sa yêc malac Jerusalem gi, ma têŋ ôbwêc dinaŋ iŋ yêc malac Betani.

Yisu pucbo a kiŋ daŋ
(*Mak 11:12-14, 20-24*)

¹⁸Têŋ bêbêc ganduc Yisu kêsêlêŋ bu mbu têŋ Jerusalem ndi, ma gêŋ yô iŋ. ¹⁹Ma iŋ gêlic a kiŋ daŋ kalhac seŋ ŋamakê, goc têŋ a dau gi ma kêsâlê a ŋandô. Tigeŋ a dau ŋandô mba, iŋ tap ŋalaŋŋ ŋambwa sa. Dec iŋ pucbo a dau ma sôm, “Am oc nem ŋandô tiyham dom!” Ma ŋagahô a dau mbac. ²⁰Têŋ ndoc ŋgacsêŋomi sêlic gêŋ dau, dec sêhêdaê ma sêndac dandi, “Bocke dec a dindê mbac ŋagahô?” ²¹Ma Yisu ô yom ma sôm, “Aô wasôm yom ŋandô têŋ mac. Akêŋ whiŋ, ma atac lu-lu pi Anötö ndê ŋaclai dom. Ma mac oc atôm bu akôm tôm naŋ aô gakôm têŋ a dindê. Ma mac oc atôm bu akôm gêŋ dalô atu-tu ŋatô whiŋ. Oc nditôm mac asôm têŋ lôc dindê bu, ‘Puc daôm sa, ma sip gwêc ŋalôm ndi,’ ma gêŋ dau oc ŋandô sa. ²²Mac bu akêŋ whiŋ, goc gêŋ naŋ mac aŋeŋ têŋ Anötö, naŋ iŋ oc kêŋ têŋ mac.”

Gêndac pi Yisu ndê ŋaclai ŋahu
(*Mak 11:27-33; Luk 20:1-8*)

²³Yisu têŋ lôm dabuŋ gi, ma kêdôhônŋ lau mbo lôm ŋamakê, ma dabuŋsiga atu-tu ti lau bata Israel-ŋga sêtêŋ iŋ si. Ma sêndac iŋ, “Am kôc ŋaclai yêc nde, bu kôm gêŋ hoŋ naŋ am kôm? Asa kêŋ têŋ am?” ²⁴Ma iŋ sôm, “Gêŋ ŋamata-ŋga aô wakêŋ gêndac daŋ têŋ mac. Mac aô aneŋ yom muŋ, goc wasôm aneŋ ŋaclai ŋahu asê têŋ mac. ²⁵Mac asôm têŋ aô, asa kêŋ ŋaclai têŋ Jon, dec iŋ kêku lau? Anötö kêŋ ŋaclai têŋ iŋ, me mba?”

Goc ŋac sem yomgalôm pi Yisu ndê gêndac, ma sêsôm têŋ dandi, “Yac bu dasôm bu Anötö kêŋ ŋaclai têŋ Jon, goc iŋ oc ndac yac, ‘Tu sake-ŋga mac akêŋ whiŋ Jon dom?’ ²⁶Magoc yac bu dasôm bu Jon kêku lau kêkuc ŋamalac nom-ŋga si gauc ŋambwa, dec lau oc sêkôm yac ŋayom, ŋahu bu sêlic Jon bu Anötö ndê propet daŋ.” ²⁷Bocdinaŋ sêsôm têŋ Yisu, “Yac aŋyalê dom.” Ma iŋ sôm têŋ ŋac, “Ma bocdinaŋ aô wasôm aneŋ ŋaclai ŋahu asê têŋ mac dom.”

Yom gôliŋ pi balê lu

²⁸Goc Yisu sôm têtŋ ŋac, “Akôc gauc pi yom dindec. Iŋgac daŋ ti iŋ ndê atu lu sêmbo. Têtŋ bêc daŋ iŋ ndac balê daŋ bocdec bu, ‘Aneŋ balê, kwahic dec aô bu wandac am bu sôc ôm wain-ŋga ndi ma nem gwelen.’
²⁹Ma balê dau sôm, ‘Mba, aô gatec!’ Tigeŋ tiŋambu iŋ kac ndê ŋalôm kwi, ma sôc ôm gi ma gêm gwelen.
³⁰Ma damba gi tap balê tilu-ŋga sa, ma ndac iŋ bu nem gwelen ôm-ŋga. Ma iŋ sôm, ‘Aêc, oc wandi.’ Tigeŋ tiŋambu iŋ tec ma gi dom.”

³¹Dec Yisu ndac ŋac, “Mac gauc gêm sake? Balê lu si asa kôm tôm damba tac whiŋ?” Ma sêsôm, “Balê ŋamata-ŋga.” Goc iŋ sôm têtŋ ŋac, “Yomandô aô wasôm têtŋ mac. Lau naŋ sêkôc takis ma lauwê seŋ-ŋga sêsôc Anôtô ndê gôliŋ ŋapu, sêhôt gêlêc mac lau dabuŋsiga ti lau bata su.
³²Bu Jon hôc asê mac bu tôc lêŋ gitêtŋ têtŋ mac, tigeŋ mac akêtŋ whiŋ iŋ dom. Lau naŋ sêkôc takis ma lauwê seŋ-ŋga sêkêtŋ whiŋ iŋ ndê yom ma sem dau kwi. Ma têtŋ têtŋ mac alic gêtŋ naŋ lau dau sêkôm, naŋ mac am daôm kwi dom, ma akêtŋ whiŋ dom.”

Yom gôliŋ pi lau sêyob ôm wain-ŋga (Mak 12:1-12; Luk 20:9-19)

³³Ma Yisu sôm, “Aŋgô yom gôliŋ daŋ tiyham. Iŋgac daŋ sô ôm wain-ŋga daŋ, sô tuŋ kêgihi, kêmasaŋ gameŋ sêmasaŋ wain ŋakwi-ŋga, ma kwê andu baliŋ daŋ, bu lau sêlhac ma sêtŋp lau kaŋ. Goc iŋ kêtŋ ôm dau têtŋ lau ŋatô sêyob, ma kôlhô gi mbo gameŋ daŋ.
³⁴Têtŋ ndoc sêhoŋ ôm dau ŋandô sa-ŋga, naŋ iŋ kêkiŋ lau akiŋ ŋatô sêtêtŋ lau sêyob ôm-ŋga si, bu sêkêtŋ wain ŋandô ŋatô têtŋ ŋac.
³⁵Magoc ŋac sêlô lau akiŋ dau dôŋ. Sic ŋgac akiŋ daŋ ŋamlŋc ŋandê, sic daŋ ndu, ma sêtuc daŋ ŋa hoc.
³⁶Ma tiŋambu ôm ŋadau kêkiŋ lau akiŋ toŋ hic atu tiyham, magoc lau naŋ sêyob iŋ ndê ôm, naŋ sêkôm mêtê kaiŋ tigeŋ têtŋ ŋac.
³⁷Tiŋambu iŋ kêkiŋ iŋ ndê atuŋgac têtŋ ŋac gi, bu iŋ gauc gêm bu ŋac oc sêtoc iŋ ndê atu dau sa.
³⁸Tigeŋ têtŋ têtŋ lau sêyob ôm-ŋga sêlic ŋadau ndê atu dau kêsêlêŋ meŋ, naŋ sêsôm têtŋ dandi, ‘Balê kêlê oc wêkaiŋ ôm dindec ti ndê gêtŋ lêtŋsêm. Bocdinaŋ dandŋc iŋ ndu, ma dakôc ôm dindec su ti yac neŋ.’
³⁹Goc sêlô iŋ dôŋ ma sêhê iŋ sa awê gi, ma sic iŋ ndu.”

⁴⁰Yisu gic bata yom gôliŋ dau, ma ndac, “Têtŋ ndoc ôm ŋadau mbu meŋ, naŋ iŋ oc kôm sake?”
⁴¹Ma sêsôm têtŋ iŋ, “Ôm ŋadau oc ndic lau sac dinaŋ ndu, ma kêtŋ ndê ôm têtŋ lau ŋatô sêyob. Ma ŋac oc sêkêtŋ ôm ŋandô têtŋ iŋ têtŋ ndoc sêhoŋ ŋandô sa-ŋga.”
⁴²Goc Yisu sôm têtŋ ŋac, “Gauc nem yom naŋ sêto yêc bocdec bu, ‘Hoc naŋ lau sêkwê andu-ŋga sêtec, naŋ kwahic dec ti hoc ŋamata-ŋga yêc andu dau. Pômdau kôm gêtŋ dau, ma yac alic ŋayham.’ Mac asam yom dau su, me mba?
⁴³⁻⁴⁴ [Asa naŋ peŋ tu hoc dinaŋ-ŋga, naŋ oc niŋga, ma hoc dau bu peŋ pi ŋamalac, dec oc sec iŋ

popoc.] Bocdinaŋ aö wasôm têtŋ mac, bu Anötö oc seŋ mac su bu ayob lau naŋ sêmbo iŋ ndê gôliŋ ŋapu, naŋ tiyham dom. Ma iŋ oc êŋyaliŋ lau ŋatô sa bu sêyob iŋ ndê lau, naŋ oc sêkôm gwelenŋ ŋapep ma sênem ŋandô ŋayham.”

⁴⁵Dabuŋsiga atu-tu ti lau Palêsai sêŋgô Yisu ndê yom gôliŋ dinaŋ, ma sêŋyalê bu yom dau hêganônŋ ŋac. ⁴⁶Dec sêŋsalê lêtŋ bu sêkôc iŋ dôŋ, magoc sêtôc lau, bu lau hoŋ sêlic iŋ bu propet daŋ.

Yom gôliŋ pi mwasinŋ atu

(Luk 14:16-24)

22 ¹Ma Yisu sôm yom gôliŋ daŋ tiyham têtŋ ŋac bocdec bu, ²“Ŋalêŋ naŋ Anötö kêgalêm lau sa bu sêmbo iŋ ndê gôliŋ ŋapu, naŋ bocdec. Kiŋ daŋ kêmasaŋ mwasinŋ atu daŋ tu iŋ ndê atungac naŋ bu nem awê-ŋga. ³Ma iŋ kêkiŋ iŋ ndê lau akiŋ bu sêkêŋ aheŋ lau naŋ sic waê bu sêneŋ mwasinŋ dau. Magoc ŋac hoŋ sêtec bu sêmeŋ. ⁴Goc iŋ kêkiŋ lau akiŋ ŋatô ma sôm, ‘Mac asa andi asôm têtŋ lau naŋ aö kagalêm ŋac sa su, bu aö kamaŋ gêtŋ hoŋ pacndê su. Aneŋ lau sic makao tôp ŋayham ndu su, bocdinaŋ dec amêŋ aneŋ mwasinŋ dau.’ ⁵Tigeŋ lau hoŋ sêtec iŋ ndê yom dau, ma sêmbo si gêtŋ. Ŋatô sêsôc ôm si, ma ŋatô sem si gwelenŋ awa-ŋga. ⁶Ma ŋatô sêlô Kiŋ ndê lau akiŋ dôŋ, sêkôm ŋatô ŋayom, ma sic ŋatô ndu. ⁷Goc Kiŋ dau tac ŋandê atu. Ma iŋ kêkiŋ iŋ ndê lau siŋ-ŋga ma ŋac sic lau sac dinaŋ ndu. Ma sêkêŋ ya gêtŋ ŋac si malac hoŋ su.

⁸“Goc iŋ sôm têtŋ ndê lau akiŋ, ‘Aö kamaŋ gêtŋ hoŋ su. Magoc aö galic lau naŋ aö kagalêm ŋac sa, naŋ gitôm dom bu sêneŋ mwasinŋ dau. ⁹Bocdinaŋ asa seŋ malac-ŋga andi, ma aŋgalêm lau bocke naŋ mac bu atap sa, naŋ sa sêmeŋ ma sêneŋ mwasinŋ dau.’ ¹⁰Goc ŋac sêsa seŋ si ma sêŋsalê lau, ma sêhoŋ lau daêsam sa, lau ŋayham ma lau sac sêwhiŋ sêmeŋ, e andu ŋalôm atu sêneŋ mwasinŋ-ŋga meŋhu.

¹¹“Têtŋ ndoc Kiŋ meŋ bu lic iŋ ndê ŋacleŋ dinaŋ, dec iŋ gêlic ŋgac daŋ naŋ sôc ŋakwê mwasinŋ-ŋga dom. ¹²Ma iŋ ndac, ‘Bocke dec am sôc mweŋ, magoc am sôc ŋakwê mwasinŋ-ŋga dom?’ Ma ŋgac dau ndê yom mba. ¹³Goc Kiŋ sôm têtŋ iŋ ndê lau akiŋ, ‘Mac asô iŋ ndê amba ti gahi dôŋ, ma atuc iŋ sa awê ndi mbo gameŋ ŋasec-ŋga. Yêc dê lau oc sêtaŋ atu ti lhô êŋsiŋ pi dau.’ ”

¹⁴Goc Yisu gic bata yom dau ma sôm, “Anötö kêgalêm lau daêsam sa, magoc iŋ oc kôc ŋac hoŋ sa dom.”

Lau bu sêtîm Yisu pi yom takis-ŋga

(Mak 12:13-17; Luk 20:20-26)

¹⁵Têtŋ dinaŋ lau Palêsai sêsa si, ma sêmasaŋ yom bu sêtîm Yisu bu sôm yom so daŋ. ¹⁶Goc sêŋkiŋ ŋac si lau ŋatô sêwhiŋ lau Israel-ŋga ŋatô naŋ sêpuc Herod ma lau Rom-ŋga si gôliŋ dôŋ, naŋ sêtêŋ iŋ si, ma sêsôm têtŋ

ij, “Kêdôhônwaga, yac aŋyalê bu am ŋgac sôm yom ŋandô-ŋga, ma bu am whê Anötö ndê lêŋ sa ti yom ŋandô. Ma am gauc gêm lau si waê dom, magoc toc ŋac hoŋ sa ŋalêŋ tigeŋ. ¹⁷Boc-dinaŋ sôm asê têŋ yac. Solop bu dakêŋ takis têŋ †Sisa, me mba?”

¹⁸Yisu kêyalê su bu ŋac bu sêtim ij, dec sôm, “Mac lau daêtîm-ŋga! Tu sake-ŋga mac bu atîm aô? ¹⁹Atôc mone anemlhi takis-ŋga daŋ têŋ aô.” Goc sêkêŋ denarias tigeŋ têŋ ij. ²⁰Ma ij ndac ŋac, “Asa ndê ŋagatu ti ŋaê yêc mone dindec?” ²¹Ma sêsôm, “Sisa ndê.” Goc ij sôm, “Bocdinaŋ atoc Sisa sa ŋa gêŋ naŋ gic ij ŋawaê, ma atoc Anötö sa ŋa gêŋ naŋ gic ij ŋawaê.” ²²Têŋ ndoc sêŋgô Yisu ndê yom dinaŋ, naŋ sêhêdaê tu ij ndê gauc-ŋga, ma sêhu ij siŋ ma sêlhô si.

Lau Sadiusi bu sêtim Yisu pi yom datisa akêŋ lau batê-ŋga
(*Mak 12:18-27; Luk 20:27-40*)

²³Têŋ bêc dinaŋ lau ŋatô akêŋ Sadiusi si toŋ sêtêŋ Yisu si bu sêkêŋ gêndac têŋ ij. Lau dau sêkêŋ whiŋ bu dom lau batê oc sêtisa tiyham. ²⁴Ma sêsôm têŋ ij, “Kêdôhônwaga, Moses to yom pi ŋgac naŋ gêm awhê sa su magoc mbac ndu ma ij ndê balêkoc mba. Moses ndê yom sôm têŋ yac bu ŋgac dau ndê asi nem awhê sawa dau, ma kwê balêkoc asê tu dôwa-ŋga. ²⁵Têŋ ndoc daŋ, asidôwa 7 sêmbo sêwhiŋ yac. Ŋgac ŋamata-ŋga gêm awhê sa magoc ij mbac ndu ma balêkoc mba. Ma ŋgac tilu-ŋga gêm dôwa ndê awhê sawa. ²⁶Magoc ij mbac ndu, ma ŋalêŋ tigeŋ ŋgac titô-ŋga sip e gi têŋ ŋgac ŋambu-ŋga ŋac sem awhê sawa, magoc sêmbac ndu ma balêkoc mba. ²⁷Ma tiŋambu awhê dau mbac ndu. ²⁸Kwahic dec yac bu andac am bocdec bu. Lau batê bu sêtisa tiyham tôm lau ŋatô sêsôm, goc awhê dau oc ti asidôwa 7 dinaŋ si asa nawhê? Bu ŋac hoŋ sem ij su têŋ ndoc sêmbo tali.”

²⁹Goc Yisu ô yom ma sôm, “Mac akôc gauc so, bu mac aŋyalê Anötö ndê yom ti ij ndê ŋaclai dom. ³⁰Têŋ têm ŋambu-ŋga naŋ lau batê sêtisa, naŋ lau oc sênem dau dom. Ŋac oc sêmbo sêtôm aŋela undambê-ŋga. ³¹Ma yom daŋ tiyham tôc asê bu lau batê oc sêtisa. Gauc nem Anötö dau ndê yom, naŋ mac asam su. ³²Iŋ sam dau bu Abraham, ma Aisak, ma Jakob si Anötö. Lau batê bu sêtisa dom, dec tu sake-ŋga Anötö sam dau bu lau tó dinaŋ si Anötö? Iŋ lau batê si Anötö dom, ij lau tali si Anötö.” ³³Ŋalêŋ dinaŋ Yisu kêdôhôn lau, ma lau hoŋ naŋ sêŋgô ij ndê yom dinaŋ sêhêdaê.

Yomsu ŋamata-ŋga
(*Mak 12:28-34; Luk 10:25-28*)

³⁴Lau Sadiusi sêŋgô Yisu ndê yom dinaŋ ma ŋac si yom mba. Ma lau Palêsai sêŋgô gêŋ dau ŋawaê, goc ŋac si lau ŋatô sêtêŋ Yisu si. ³⁵Ŋac si daŋ ij gwalam akwa yomsu-ŋga ma ij bu êŋsahê Yisu dec ndac ij

bocdec bu, ³⁶“Kêdôhôn-waga, yêc Moses ndê buku, yomsu bocke ti yomsu ñamata-nga?” ³⁷Ma Yisu ô yom ma sôm, “Yomsu nañ sôm, ‘Am atac whiñ Pômdau am nem Anötö, ti nem ñalôm sambuc, ma ti gatôm sambuc, ma ti nem gauc sambuc.’” ³⁸Yomsu dinañ tiñamata ma hôc gëlêc yomsu ñatô hoñ su. ³⁹Ma yomsu tilu-nga nañ gitôm ñamata-nga, nañ sôm, ‘Atac whiñ nem asidôwai gitôm am atac whiñ daôm.’” ⁴⁰Yomsu lu dinañ sêpiñ yom hoñ nañ Moses ti lau propet sêto, nañ dôñ sêpitigeñ.”

Yisu kêsahê lau si gauc pi Mesaya

(Mak 12:35-37; Luk 20:41-44)

⁴¹Lau ñatô akêñ Palêsai si toñ sêlhac dinañ, dec Yisu ndac ñac, ⁴²“Mac asôm sake pi Mesaya? Iñ asa ndê atungac?” Ma sêsôm têtñ iñ bu, “Mesaya iñ Dawid ndê Atu.” ⁴³Goc Yisu sôm, “Ma bocke Dawid dau sam Mesaya bu iñ dau ndê Pômdau? Ñjalau Dabuñ puc Dawid dôñ, dec iñ to yom yêc bocdec bu, ⁴⁴‘Anötö sôm têtñ aneñ Pômdau, ‘Am ndöc aö aman andô-nga e nditôm aö wakêtñ nem ñacyo sêsôc am gahim ñapu.’” ⁴⁵Bocdinañ Dawid dau sam Mesaya bu Pômdau, ma bocke mac asam Mesaya bu Dawid ndê Atu?” ⁴⁶Ma ñac si dañ gitôm dom bu ô iñ ndê yom. Ma tiñambu lau hoñ sêtöc dau bu sêkêñ gëndac têtñ iñ tiyham.

Yisu pu lau bata Israel-nga

(Mak 12:38-39; Luk 13:34-35; 20:45-46)

23 ¹Goc Yisu sôm têtñ lau daêsam nañ sêkac dau sa sêmbo, ma têtñ iñ ndê ñgacsêñomi bu, ²“Lau Palêsai ti lau †Skraib sêndôhôn Anötö ndê yomsu têtñ lau, tôm Moses kôm têtñ têm ñamata-nga. ³Bocdinañ asôc ñac ñapu, ma aṅgô ñac si yom. Magoc aṅkuc ñac si mêtê dom, bu ñac lau sêtim yom lau-nga. Sêsôm yom ñayham-ñayham, magoc ñac dau sêñkuc si yom dau dom. ⁴Ma yomsu daêsam nañ sêkêñ têtñ lau, nañ kêtñ ñawapac atu têtñ ñac, magoc ñac dau sêkôm gêtñ dañ tu sênem lau dau sa-nga dom.

⁵“Ma gêtñ hoñ nañ ñac sêkôm, nañ sêkôm yêc lau si aṅgô-nga tu sêtoc dau sa-nga. Yomsu ti apañ nañ sêkic pi dau, nañ sêmasañ atu-tu tu lau sêlic-nga, ma sêsôc ñakwê ti ñabala baliñ.” ⁶Ñac atac whiñ bu sêndöc lau tiwaê si pôn yêc lau si mwasiñ ñalôm, ma yêc lôm wê-nga. ⁷Ñac tac whiñ bu lau sêhê mwalêc ñac yêc malac lôm, ma bu lau hoñ sêtoc ñac sa ma sêsam ñac bu ‘Kêdôhôn-waga.’

ⁿ **23:5** Lau Palêsai sêto yomsu ñatô sip bapia ma sêkêñ sip apañ sañ, goc sêkic pi si sêcbala ti amba têtñ ndoc sêteñ mbec. Ñac gauc gêm bu Anötö gic yomsu ñac bu sêkôm bocdinañ - alic Eks 13:9, 16, Diut 6:4-9 ma 11:13-21. Ma sêsôc ñakwê ti ñabala bu sêtöc asê bu ñac lau sem akiñ Anötö-nga - alic Namba 15:37-41. Magoc lau Palêsai ti lau Skraib sêmasañ apañ atu, ma ñakwê ti ñabala baliñ, tu bu sêtoc dau sa ma sêhêc gëlêc lau ñatô su-nga.

⁸“Magoc aṅkuc ṅac si mêtê dom. Mac hoṅ ambo nom atôm asidôwai, ma mac nem kêdôhôn-waga tigerṅ mbo. Tu dinaṅ-ṅga solop dom bu lau sêsam mac bu ‘Kêdôhônwaga.’ ⁹Ma asam lau nom-ṅga bu mac nem damami dom, bu mac nem Damam tigerṅ mbo undambê. ¹⁰Ma mac nem ṅadau tigerṅ mbo, naṅ Mesaya, dec solop dom bu lau sêsam mac bu ṅac si ṅadau. ¹¹Asa naṅ gêm akiṅ mac, naṅ ti ṅamalac ṅamata-ṅga yêc Anötö aṅgô-ṅga. ¹²Bu asa naṅ toc dau sa, naṅ Anötö oc êṅgwiniṅ iṅ, ma asa naṅ kêgwiniṅ dau, naṅ Anötö oc toc iṅ sa.

¹³“Oyaê mac lau Skraib ti Palêsai! Mac lau atim yom lau-ṅga! Mac nem lêṅ kalhac lau ahuc bu sêsôc Anötö ndê gôliṅ ṅapu dom. Mac daôm asôc iṅ ṅapu dom, ma lau naṅ tac whiṅ bu sêsôc iṅ ṅapu, naṅ mac alhac ṅac ahuc. [¹⁴Oyaê mac lau Skraib ti lau Palêsai, mac lau atim yom lau-ṅga. Mac ateq mbec baliṅ bu atoc daôm sa yêc lau si aṅgô-ṅga, magoc têtṅ ndoc lau sêlic mac dom, naṅ mac aṅsau lauwhê sawa bu aṅgaho ṅac si andu su. Tu dinaṅ-ṅga Anötö oc kêṅ ṅagêyô sac sambuc têtṅ mac.]

¹⁵“Oyaê mac lau Skraib ti Palêsai! Mac lau atim yom lau-ṅga! Mac aṅsêlêṅ seṅ baliṅ yêc b aô ma yêc gwêc, bu atap sêṅom daṅ sa tu êṅkuc mac-ṅga. Mac Sadaṅ ndê lau mac! Ma têtṅ ndoc mac ahê sêṅom daṅ kêkuc mac, naṅ mac akôm iṅ ti Sadaṅ ndê balêkoc daṅ, hóc gêlêc mac daôm su.

¹⁶“Oyaê! Mac bu atôc seṅ têtṅ lau ṅatô, magoc mac daôm tampec. Têtṅ ndoc lau sêsôm yom pi lôm dabuṅ tu bu sêpuc si yom dôn-ṅga, naṅ mac asôm bu ṅac si yom iṅ yom ṅambwa. Magoc têtṅ ndoc sêsôm yom pi gôlôn gol naṅ yêc lôm dabuṅ tu bu sêpuc si yom dôn-ṅga, naṅ mac asôm bu yom dau tidôn su, ma gitôm dom bu sêseṅ su. ¹⁷Mac lau tampec, gauc mbasi. Gêṅ sake hóc gêlêc su? Gol, me lôm dabuṅ naṅ kôm gol dau ti gêtṅ dabuṅ? ¹⁸Ma lau bu sêsôm yom pi alta naṅ kalhac lôm dabuṅ tu bu sêpuc si yom dôn-ṅga, naṅ mac asôm bu ṅac si yom iṅ yom ṅambwa. Magoc ṅac bu sêsôm yom pi da naṅ kalhac alta ṅahô, naṅ mac asôm bu yom dau tidôn. ¹⁹Mac lau tampec! Gêṅ sake ti gêtṅ ṅamata-ṅga? Da, me alta naṅ kôm da dau ti dabuṅ? ²⁰Asa naṅ sôm yom pi alta, naṅ sôm pi alta ma pi gêtṅ hoṅ naṅ kalhac alta ṅahô whiṅ. ²¹Ma asa naṅ sôm yom pi lôm dabuṅ, naṅ sôm pi lôm dau, ma pi Anötö naṅ ti lôm dabuṅ ṅadau, naṅ whiṅ. ²²Ma asa naṅ sôm yom pi undambê, naṅ sôm pi Anötö ndê pôn atu, ma pi Anötö naṅ ndôc pôn ṅahô, naṅ whiṅ.

²³“Oyaê mac lau Skraib ti Palêsai. Mac lau atim yom lau-ṅga! Mac awhê gêtṅ sauṅ-sauṅ ôm-ṅga hoṅ kôc gi toṅ amanṅlu, ma akêtṅ toṅ daṅ ti da. Magoc mac ahu mêtê ṅandô yomsu-ṅga siṅ. Mêtê atu hêganônṅ mac tamwalô lau, ma amatôc lau si yom ṅalêṅ gitêtṅ, ma akôm nem yom ṅandô sa. Mêtê hoṅ dinaṅ iṅ gêtṅ atu! Solop bu mac akôm gêtṅ sauṅ-sauṅ tôm yomsu sôm, magoc akôm gêtṅ atu-tu whiṅ.

²⁴“Mac lau tampec naṅ akôm bu atôc seṅ têtṅ lau ṅatô. Mac atôm lau naṅ sêhêgo dau bu sêṅgati gêtṅ golop atêc naṅ poc bu ṅahô, naṅ sa, magoc gêtṅ ṅadômbwi atu naṅ poc bu dau ṅalôm, naṅ sêlic apu.

²⁵“Oyaê mac lau Skraib ti Palêσαι, mac lau atim yom lau-nga! Mêtê tamgatu gêṅ ti aneṅ gêṅ ṅawahô-nga hóc mac nem ṅalôm ahuc. Bocdinaṅ mac atôm laclhu ti pele naṅ sêṅgwasinṅ ṅadômbwê-nga ṅambwa ṅawasi sa. ²⁶O lau Palêσαι, mac lau tampec! Gêṅ ṅamata-nga aṅgwasinṅ laclhu ti pele ṅalôm ṅawasi sa, goc gêṅ awê-nga oc ṅawasi sa bocdinaṅ.

²⁷“Oyaê mac lau Skraib ti Palêσαι, mac lau atim yom lau-nga! Mac atôm sêhō naṅ sêsê pen pi gi e ṅawasi sêp sambuc ma lau sêlic ṅayham. Magoc yêc sêhō dau ṅalôm lau batê si ṅakwa ti gêṅ mbôp meṅhu. ²⁸Ma mac lau daôm bocdinaṅ. Lau sêlic gêṅ awê-nga naṅ mac akôm, dec gauc gêm bu mac lau gitêṅ. Magoc yêc mac nem ṅalôm, mêtê tasanṅ ma mêtê aṅgili yomsu-nga hóc mac ahuc.

²⁹“Oyaê mac lau Skraib ti Palêσαι, mac lau atim yom-nga! Mac amasanṅ sêhō ti gôlônṅ atu, tu bu atoc lau propet ti lau gitêṅ naṅ mac apami sic ndu muṅ su, naṅ sa. ³⁰Ma mac asôm bu mac bu ambo têṅ apami si têm, dec mac oc aṅkuc ṅac si lêṅ sêkêc propet dau si dac sinṅ-nga dom. ³¹Mac nem yom dinaṅ tōc asê bu mac asa akêṅ lau Israel-nga naṅ sic lau propet ndu. ³²Bocdinaṅ dec mac akôm mêtê sac tôm apami sêkôm. ³³Mac mboc, ma mboc ṅatui mac! Gitôm dom bu mac awê Anötö ndê matôc sa. Iṅ oc êṅkiṅ mac asip lambwam andi.

³⁴“Aṅgô! Aô waṅkiṅ lau propet ma lau tiguauc, ma lau ṅatô bu sêndôhônṅ mac. Magoc mac oc andic ṅac lic ṅandê yêc mac nem lôm wê-nga, ma ambulu ṅac alom-alom malac. Ma ṅac si lau ṅatô mac oc andic ndu, ma andic ṅatô pi a gicso dau sêndi. ³⁵Bocdinaṅ mac oc atap ṅagêyô sa tu lau gitêṅ hoṅ si dac, naṅ apami sêkêc sinṅ-nga. Abel iṅ ṅgac ṅamata-nga, ma Berekaya ndê atu Sekaria iṅ ṅgac ṅambu-nga.° Sekaria iṅ ṅgac naṅ sic ndu yêc lôm dabuṅ ma alta naṅ kalhac lôm dau ṅasactô, naṅ ṅalhu. ³⁶Yomandô wasôm têṅ mac. Mac lau têm dindec-nga oc atap matôc sa pi lau hoṅ dinaṅ si dac.

³⁷“O Jerusalem, Jerusalem. Mac ac Anötö ndê lau propet ndu, ma lau gitêṅ naṅ iṅ kêkiṅ têṅ mac, naṅ mac atuc ṅa hoc ndu. Ndoc daêsam aô tac whiṅ bu wandic mac sa asôc Anötö ndê gôliṅ ṅapu tiyham, gitôm mbac dalec dinda gic ṅatu sa sêsôc ṅamakê ṅapu. Tigeṅ mac atec. ³⁸Bocdinaṅ Anötö oc hu mac ti mac nem andu sinṅ. ³⁹Aô wasôm têṅ mac, bu mac oc alic aô tiyham dom e mac asôm, “Tampiṅ Mesaya naṅ meṅ gêm Pômdau aṅgô.”

Yisu sôm yom pi lôm dabuṅ Jerusalem-nga

(Mak 13:1-2; Luk 21:5-6)

24 ¹Yisu hu lôm dabuṅ ṅagameṅ sinṅ ma bu êṅsêlêṅ ndi, ma iṅ ndê ṅgacsêṅomi sêtêṅ iṅ si. Ma sêsôm yom pi lôm dabuṅ ma pi gêṅ

° 23:35 Yisu sôm yom dinaṅ hêganônṅ lau gitêṅ hoṅ naṅ lau Israel sic ndu, naṅ sêto ṅaminṅ yêc Yom Lêṅsêm Akwa. Abel iṅ ṅgac ṅamata-nga - alic Gen 4:8, ma Sekaria iṅ ṅgac ṅambu-nga - alic 2 Kr 24:20-22.

ñayham hoj nañ lau sêkwê yêc gamej dinañ. ²Magoc iñ sôm, “Mac alic gêñ hoj dindéc. Aö wasôm yom ñandô têt mac, bu ñacyo oc sêsej hoc hoj dindéc su e hoc dañ ndôc hoc dañ ñahô tiyham dom.”

Gêñ wapac têt ñambu-ñga-ñga
(*Mak 13:3-13; Luk 21:7-19*)

³Tiñambu Yisu ndôc Lôc Olib, ma iñ ndê ñgacsêñyomi tawasê sêtêñ iñ si, ma sêndac, “Sôm têt yac, ñawapac nañ am sôm yom pi, nañ oc hôc asê Jerusalem têt têt bocke? Ma gêñ sake oc kêt puc yac bu am oc mbu mweñ, ma bu bêc ñambu-ñga oc hôc asê?” ⁴Goc iñ sôm, “Ayob daôm ñapep bu lau dañ sêñsau mac dom. ⁵Bu lau daêsam oc sêñsau bu sênem aö añôñ ma sêsôm, ‘Aö Mesaya dauñ dec!’ Ma ñac oc sêñsau lau daêsam. ⁶Ma têt ndoc mac añgô ñawaê bu lau sic siñ têt dau me sêmasañ dau tu sêndic siñ-ñga, nañ asô dom. Bu gêñ hoj dinañ gic waê bu meñ hôc asê, magoc têt ñambu-ñga yêc dôn yêc. ⁷Kiñ nom-ñga oc sêkêt kisa dau, ma lau gamej dañ oc sêndic siñ têt lau gamej dañ. Ma tôbôm ti tiyhô atu oc sêkôm gamej ñatô tisac. ⁸Gêñ hoj dinañ oc ndic hu ñawapac têt ñambu-ñga-ñga gitôm awhê nañ kêsahê balêkoc tuñ iñ ma gêñ dau gic hu ñandê atu nañ iñ oc hôc tu kôc balêkoc-ñga.

⁹“Têt ndoc dinañ lau oc sêkôc mac dôn ma sêkôm mac ñayom, ma sêndic mac nem ñatô ndu. Lau nom-ñga hoj oc atac tec mac tu mac añkuc aö-ñga. ¹⁰Têt têt dinañ lau daêsam oc sêhu si sêkêt whiñ aö siñ, ma ñac oc sêhoc si lau ñatô asê ma sêtec dandi. ¹¹Ma propet tasan daêsam oc sêhoc asê ma sêñsau lau daêsam. ¹²Mêtê sac oc êñsôwec tiatu e lau daêsam oc sêhu mêtê atac whiñ asidôwai-ñga siñ. ¹³Magoc asa nañ bu lhac ñañga ma hu aö siñ dom e ndê têt pacndê, nañ oc tap Anötô ndê mwasiñ nem iñ si-ñga sa. ¹⁴Ma bêc ñambu-ñga oc hôc asê dom, e lau sêhoc ñawaê ñayham pi Anötô ndê gôliñ asê, tôm nom ñagamej sambob, ma lau hoj sêñgô su.”

Ñawapac gamej Judia-ñga
(*Mak 13:14-23; Luk 21:20-24*)

¹⁵Ma Yisu gic têt yom ma sôm, “Propet Daniel hoc yom asê gwanañ su, pi gêñ sac sambuc^p nañ lau oc sêkêt lhac lôm dabuñ, nañ oc kôm gamej tisac.” (Asa nañ sam yom dindéc, nañ kôc gauc pi ñapep, bu ñahu yêc siñ dau.) ¹⁶“Têt ndoc mac alic gêñ sac dinañ, nañ mac lau hoj nañ

^p **24:15** Alic Dan 9:27, 11:31 ma 12:11. Daniel ndê yom hêganôn anötô tasan Seus ndê gwam nañ Antiokus Epipanes kêt kalhac lôm dabuñ têt yala 168BC. Yisu ndê yom tôc asê bu gêñ kaiñ dinañ oc hôc asê tiyham têt têt ñambu-ñga. Lau ñatô gauc gêm bu yom dau hêganôn lau Rom-ñga nañ señ lôm dabuñ popoc têt yala 70AD. Ma lau ñatô gauc gêm bu yom dau hêganôn gêñ nañ sêto yom pi yêc 2 Tes 2:4 ma Rev 13:14-15.

ambo gameŋ Judia-ŋga alhö api gameŋ lôc-ŋga andi. ¹⁷Alhö ŋagahô, ma gauc nem mac nem gêŋ daŋ dom. Lau naŋ sêndöc andu ŋasactô, naŋ sêsöc andu ŋalôm bu sêkôc ŋac si gêŋ daŋ sa dom. ¹⁸Ma ŋac naŋ sêmbo ôm, naŋ bocdinaŋ. Sêkac dau kwi bu sêkôc si gêŋ ŋatô dom. ¹⁹Oyaê. Lauwhê tidaê, ma ŋac naŋ sêkêŋ su têŋ balêkoc, naŋ oc sêtap ŋawapac atu sa têŋ têm dinaŋ. ²⁰Ateŋ mbec bu têm ŋawapac-ŋga dinaŋ tap ma sa têŋ ndoc uhô-ŋga me têŋ bêc Sabat-ŋga daŋ dom. ²¹Bu ŋawapac têm dinaŋ-ŋga oc hôc gêlêc ŋawapac hoŋ su. Têŋ têm ŋamata-ŋga e meŋ têŋ kwahic dec, ŋawapac atu kaiŋ dinaŋ daŋ hôc asê su dom. Ma tiŋambu ŋawapac kaiŋ dinaŋ oc hôc asê tiyham dom. ²²Anötö oc tawalô lau naŋ iŋ kêyaliŋ ŋac sa su, ma tu dinaŋ-ŋga iŋ oc kêŋ têm ŋawapac-ŋga dau tiapê. Bu mba, ma têm d au tibaliŋ, goc lau hoŋ oc sêŋiŋga.

²³“Têŋ têm dinaŋ, lau daŋ bu sêsôm têŋ mac bu, ‘Alic, Mesaya dec meŋ,’ me ‘Mesaya dau dê,’ naŋ akêŋ whiŋ ŋac dom. ²⁴Bu lau naŋ sêŋsau bu ŋac Mesaya, ma propet tasanŋ oc sêhóc asê sêmeŋ, ma sêkôm gêŋ dalô atu-tu bu sêŋsau lau. Ma ŋac oc sêŋsahê bu sêtim lau naŋ Anötö kêyaliŋ ŋac sa, naŋ sêwhiŋ. ²⁵Aŋgô ŋapep, bu aö gasôm gêŋ hoŋ dindéc têŋ mac gwanaŋ. ²⁶Bocdinaŋ, lau bu sêsôm, ‘Mesaya kêlê mbo gameŋ sawa,’ naŋ asa andi dom. Ma bu sêsôm, ‘Mesaya kelec mbo andu daŋ ŋalôm,’ naŋ akêŋ whiŋ dom. ²⁷Ŋamalac ndê Atu oc mbu meŋ ŋagahô eŋ, gitôm sickac naŋ gic hep tigeŋ, ma umboŋ ŋasawa sambuc ŋawê sa. ²⁸Mac bu alic macmponŋ sêŋgihi sêmbo, naŋ aŋyalê bu gêŋ daŋ mbac ndu yêc. Ma bocdinaŋ gêŋ hoŋ dindéc kêŋ puc mac pi ndoc Ŋamalac ndê Atu mbu meŋ-ŋga.”

Ŋamalac ndê Atu ndê bêc mbu meŋ-ŋga

(Mak 13:24-31; Luk 21:25-33)

²⁹“T êŋ ndoc ŋawapac-ŋga dinaŋ pacndê, goc ac oc nem ganduc, ma ayô oc ŋawê sa dom. Gêŋ ti ŋaclai naŋ sêlhac umboŋ oc wiwic sa, ma tata oc sêpeŋ akêŋ umboŋ. ³⁰Têŋ ndoc dinaŋ lau titonŋ-titonŋ nom-ŋga hoŋ oc sêlic gêŋ dalô yêc umboŋ, naŋ kêŋ puc ŋac bu Ŋamalac ndê Atu oc mbu meŋ, ma ŋac hoŋ oc sêtaŋ daŋgibo atu. Ma ŋac oc sêlic Ŋamalac ndê Atu dau meŋ ndöc dao ŋahô ti ŋawasi ma ŋaclai atu. ³¹Goc iŋ oc êŋkiŋ iŋ ndê aŋela sêndic dahuc taŋ atu, ma sêsa sêtêŋ nom ŋabatiŋ ti undambê ŋabatiŋ hoŋ, bu sêndic lau naŋ iŋ kêyaliŋ ŋac sa su, naŋ sa.

³²“Gauc nem a laŋ. Têŋ ndoc mac alic ŋalaŋ wakuc bu lêc, naŋ aŋyalê bu ndoc ac-ŋga meŋ kêpiŋ. ³³Ma bocdinaŋ têŋ ndoc mac alic gêŋ naŋ aö gasôm yom pi, naŋ aŋyalê bu Ŋamalac ndê Atu ndê bêc mbu meŋ-ŋga meŋ kêpiŋ su, gitôm iŋ meŋ kalhac gatam nem andu-ŋga. ³⁴Yomandô! Lau têm dinaŋ-ŋga oc sêmbac ndu dom e gêŋ hoŋ dinaŋ hôc asê. ³⁵Undambê ti nom oc niŋga, magoc aneŋ yom daŋ oc niŋga dom. Gêŋ hoŋ oc ŋandô sa tôm aö gasôm.”

Lau daŋ sênyalê Yisu ndê bêc mbu meŋ-ŋga dom
(Luk 17:26-36)

³⁶Ma Yisu sôm, “Ŋamalac daŋ kêyalê bêc me acgatu naŋ Ŋamalac ndê Atu oc mbu meŋ, naŋ dom. Aŋela undambê-ŋga sênyalê dom, ma Anötö ndê Atu kêyalê dom. Damba tawasê kêyalê. ³⁷Têŋ ndoc Ŋamalac ndê Atu mbu meŋ, naŋ lau oc sêmbo tôm lau sêmbo têŋ Noa ndê têm. ³⁸⁻³⁹Têŋ ndoc dinaŋ, lau sêŋlhiŋ dau siŋ ma seŋ ti sênôm gêŋ, ma sem dandi e Noa sôc waŋ gi, ma bu suŋ meŋ ma seŋ ŋac hoŋ su siŋga. Ma lau nom-ŋga oc sêmbo ŋalêŋ tigeŋ dinaŋ, têŋ Ŋamalac ndê Atu ndê bêc mbu meŋ-ŋga. ⁴⁰Ŋgac lu oc sêkôm gweleŋ sêmbo ôm, ma Anötö oc kôc iŋlu si daŋ sa, ma hu daŋ siŋ. ⁴¹Ma awhê lu oc sêndê gêŋ sêmbo, ma iŋ oc kôc daŋ sa, ma hu daŋ siŋ.

⁴²“Bocdinaŋ amasaŋ daôm ŋapep, bu mac am gauc bêc bocke mac nem Pômdau oc mbu meŋ. ⁴³Gauc nem yom dindec. Andu ŋadau daŋ, bu ênyalê ndoc naŋ ŋgac kaŋ daŋ oc meŋ, naŋ iŋ oc yob iŋ ndê andu bu ŋgac kaŋ dau sôc meŋ dom. ⁴⁴Ma bocdinaŋ, amasaŋ daôm tôm bêc hoŋ, bu Ŋamalac ndê Atu oc mbu meŋ têŋ ndoc naŋ mac akêŋ batam, naŋ dom.”

Yom gôliŋ pi ŋgac akiŋ ŋayham ma sac
(Luk 12:42-46)

⁴⁵Ma Yisu sôm, “Ŋgac akiŋ ŋayham ma ti gauc, iŋ ŋgac kaiŋ bocdec. Iŋ ndê ŋadau bu lhö têŋ gameŋ daŋ ndi, goc iŋ oc kêŋ iŋ yob lau akiŋ ŋatô, ma kêŋ gêŋ daneŋ-ŋga têŋ ŋac tôm ŋandoc. ⁴⁶Ma têŋ ndoc ŋadau mbu meŋ, ma tap iŋ sa kôm iŋ ndê gweleŋ ŋapep mbo, naŋ iŋ oc lic iŋ ŋayham ma kôm ŋayham têŋ iŋ. ⁴⁷Yomandô! Ŋadau oc kêŋ iŋ yob iŋ ndê wapa hoŋ. ⁴⁸Magoc ŋgac akiŋ sac oc sôm têŋ dau, ‘Aneŋ ŋadau oc mbu meŋ ŋagahô dom.’ ⁴⁹Goc iŋ oc ndic lau akiŋ ŋatô, ma sa ndi nôm ti neŋ gêŋ whiŋ lau naŋ sênôm gêŋ êŋiŋ ŋac-ŋga ŋapaŋ. ⁵⁰Ŋadau oc mbu meŋ hôc asê têŋ bêc ti acgatu naŋ ŋgac akiŋ dau kêŋ bata, naŋ dom. ⁵¹Ma iŋ oc kêŋ ŋagêyô sac sambuc têŋ iŋ, ma soc iŋ su ndi mbo whiŋ lau sêtim yom lau-ŋga. Yêc dindê lau oc sêŋsahê ŋandê atu e sêtaŋ ma lhö êŋsiŋ pi dau ŋapaŋ.”

Yom gôliŋ pi lauwê akiŋ amanŋlu

25 ¹Ma Yisu sôm yom gôliŋ daŋ bocdec bu, “Têŋ ndoc Ŋamalac ndê Atu mbu meŋ bu nem gôliŋ gêŋ hoŋ, naŋ lau ŋatô oc sêmasaŋ dau ŋapep, ma lau ŋatô oc mba. Oc tôm lauwê akiŋ amanŋlu naŋ sêkôc si lam ma sêsa si bu sêhôn ŋgac nem awhê-ŋga, naŋ sêkêŋ bata bu oc meŋ. ²Ŋac si amanŋdaŋ ŋac lauwê tigauc, ma amanŋdaŋ ŋac lauwê gauc mbasi. ³Lauwê gauc mbasi dinaŋ sêkôc si lam, magoc sêkôc buya ŋatô

whiŋ dom. ⁴Ma lauwê tigauc sêkôc si lam, ma sêkôc buya ŋatô sip bu akôp tôhôn. ⁵Ŋac sêhôn ŋac nem awhê-ŋga sêmbo, magoc iŋ hôc asê ŋagahô dom e ŋac kwapac sa, ma sêyêc bêc.

⁶“Timaniŋhu goc ŋac aheŋ-ŋga daŋ ta yom bocdec bu, ‘Oê! Ŋgac dau meŋ! Asa andi ma akôc iŋ sa.’ ⁷Goc lauwê akiŋ sêtisa, ma sêmasaŋ ŋac si lam. ⁸Ma amaŋdaŋ gauc mbasi dinaŋ sêndac lauwê tigauc bocdec, ‘Akêŋ buya ŋatô têŋ yac, bu yac mba lam sêmbac.’ ⁹Magoc ŋac sêo yom ma sêsôm, ‘Mba! Mboe buya oc tôm yac hoŋ dom. Magoc mac andi alic lau naŋ sêkêŋ buya tu lau sênemlhi-ŋga, ma anemlhi nem.’ ¹⁰Magoc têŋ ndoc sêlhô si bu sênemlhi buya, goc ŋac nem awhê-ŋga meŋ hôc asê. Ma lauwê akiŋ naŋ sêmasaŋ dau gwanaj, naŋ sêwhiŋ iŋ sêsôc iŋ ndê gameŋ si, bu sêneŋ mwasij awhê-ŋga. Goc iŋ gic gatam ahuc. ¹¹Tiŋambu lauwê akiŋ gauc mbasi dinaŋ sêmbu sêmeŋ ma sêmbwêc, ‘Ŋadau! Ŋadau! Lêc gatam su têŋ yac.’ ¹²Magoc ŋadau sôm, ‘Mba! Aô wasôm yomandô bu kayalê mac dom!’ ” ¹³Yisu gic bata yom gôliŋ dinaŋ ma sôm, “Boc-dinaŋ anem ali ma ayob daôm ŋapep, bu mac aŋyalê bêc ti acgatu naŋ aô oc wambu wameŋ, naŋ dom.”

Yom gôliŋ pi mone gol

(Luk 19:12-27)

¹⁴Ma Yisu sôm yom gôliŋ daŋ tiyham pi têm ŋambu-ŋga bocdec bu, “Ŋgac tiwaê daŋ bu sa têŋ gameŋ baliŋ daŋ ndi. Bocdinaŋ iŋ mbwêc iŋ ndê lau akiŋ, ma kêŋ ndê gêŋ ŋatô têŋ ŋac bu sêyob e iŋ mbu meŋ. ¹⁵Iŋ kêŋ mone gol naŋ sêsam bu talent⁹ têŋ ŋac, kêkuc ŋac si licwalô ti ŋac si gauc. Iŋ kêŋ talent amaŋdaŋ têŋ ŋgac daŋ, ma talent lu têŋ daŋ, ma talent tigeŋ têŋ daŋ. Goc iŋ hu ŋac siŋ ma kôlhô gi. ¹⁶Ma ŋgac akiŋ naŋ kôc mone amaŋdaŋ, naŋ gi kôm gwelen pi mone dau e t ap mone amaŋdaŋ tiyham sa. ¹⁷Ma iŋ naŋ kôc mone lu naŋ kôm boc-dinaŋ, ma tap mone lu tiyham sa. ¹⁸Magoc ŋgac naŋ kôc mone tigeŋ, naŋ sa gi kwê sê daŋ ma siŋ ŋadau ndê mone kwi yêc sê dau ŋalôm.

¹⁹“Ŋasawa hic baliŋ gi su, goc lau akiŋ dinaŋ si ŋadau mbu meŋ, ma bu ŋgô ŋac si yom pi mone dau. ²⁰Ma ŋgac naŋ kôc mone amaŋdaŋ, naŋ kôc amaŋdaŋ naŋ iŋ tap sa, naŋ whiŋ ma sôm, ‘Pômdau, am kêŋ mone amaŋdaŋ têŋ aô gayob, ma lic, aô gakôc amaŋdaŋ tiyham.’ ²¹Goc ŋadau sôm, ‘O aneŋ ŋgac ŋayham, am kôm ŋayham. Am yob gêŋ amaŋdaŋ ŋapep, dec wakêŋ am yob gêŋ daêsam. Mweŋ ma mbo whiŋ aô ti atac ŋayham.’ ²²Ma ŋgac akiŋ naŋ kôc mone lu, naŋ meŋ ma sôm, ‘Pômdau, am kêŋ mone lu têŋ aô gayob, ma aô gakôc mone lu tiyham whiŋ.’ ²³Ma ŋadau sôm, ‘O aneŋ ŋgac akiŋ ŋayham, am kôm ŋayham. Am yob gêŋ lu ŋapep, dec wakêŋ am yob gêŋ daêsam. Mweŋ ma mbo whiŋ aô ti atac ŋayham.’

⁹ 25:15 Alic yom pi talent yêc Mat 18:24.

24“Têj dinaŋ ŋgac naŋ kôc mone tigerj, naŋ meŋ ma sôm, ‘Pômdau, aö kayalê bu am ŋgac lêlê-ŋga dom, ma bu am oc kêŋ batam bu ndic gêŋ ŋandô sa yêc gameŋ naŋ am daôm kêbalip gêŋ ŋawhê me sô gêŋ dom. 25Bocdinaŋ aö gatöc dauŋ ma kasalê lêŋ bu am nem mone niŋga dom, dec gasa ga gasiŋ kwi yêc nom ŋalôm. Lic, gêŋ dau kelec.’ 26Goc ŋadau ô yom ma sôm, ‘Am ŋgac sac solop! Am ŋgac oyom. Am kêyalê su bu aö oc wandic gêŋ ŋandô sa yêc gameŋ naŋ aö gasô gêŋ dom. 27Bocdinaŋ am gitôm bu kêŋ aneŋ mone têŋ lau sêyob mone-ŋga bu sêyob e aö wambu wameŋ, dec oc tôm bu sêkêŋ mone ŋagec sac mone dau ŋahô, ma aö wakôc hoŋ sa.’ 28Goc ŋadau sôm têŋ iŋ ndê lau ŋatô, ‘Akôc mone su yêc iŋ, ma akêŋ têŋ ŋgac naŋ kôc mone amanlu. 29-30Ma atiŋ ŋgac akiŋ sac dindec sa awê ndi bu mbo gameŋ ŋasec-ŋga naŋ lau sêtaŋ, ma ŋalhô êŋsiŋ pi dau. Bu asa naŋ yob gêŋ naŋ gakêŋ sip iŋ amba, naŋ ŋapep, naŋ wakêŋ gêŋ ŋatô tiyham têŋ iŋ whiŋ, ma iŋ ndê gêŋ oc ti daêsam. Magoc asa naŋ yob ndê gêŋ ŋapep dom, naŋ wakôc iŋ ndê gêŋ hoŋ su.’ ”

Pômdau oc whê lau kôc têŋ bêc ŋambu-ŋga

31Goc Yisu sôm, “Têŋ ndoc ŋamalac ndê Atu mbu meŋ whiŋ aŋela hoŋ, naŋ iŋ oc ndöc iŋ ndê pôn kiŋ-ŋga ti iŋ ndê ŋaclai ma ŋawasi atu undambê-ŋga. 32Ŋac oc sêndic ŋamalac hoŋ sa sêlhac iŋ aŋgô-ŋga. Ma iŋ oc whê ŋac kôc gitôm ŋgac yob domba-ŋga, naŋ whê iŋ ndê domba ti naniŋ kôc. 33Iŋ oc kêŋ domba sêlhac iŋ amba andô-ŋga, ma naniŋ sêlhac gasê-ŋga.

34“Dec Kiŋ atu dau oc sôm têŋ lau naŋ sêlhac iŋ amba andô-ŋga, ‘Ameŋ mac lau naŋ Damaŋ gêlic mac ŋayham. Ma andöc mac nem malam yêc gameŋ undambê-ŋga, naŋ Damaŋ kêmasaŋ tu mac-ŋga têŋ ndoc iŋ kêŋ undambê ma nom. Dinaŋ ti mac nem gêŋ lêŋsêm. 35Yom dinaŋ ŋa-ŋandô iŋ bocdec. Têŋ ndoc aö gêŋ yô aö, naŋ mac akêŋ gêŋ aö gaŋ. Ma têŋ ndoc bu yô aö, naŋ mac akêŋ bu têŋ aö ganôm. Aö ŋgac apa, ma mac akôc aö sa ma ayob aö. 36Aneŋ ŋakwê mba, ma mac akêŋ têŋ aö. Aö gêmbac, ma mac am yaom aö. Aö gandöc gapocwalô, ma mac ameŋ ac aö kêsi.’

37“Ma têŋ dinaŋ lau gitêŋ oc sêô yom ma sêndac, ‘Pômdau, bocke? Têŋ nde yac alic am gêŋ yô am me bu yô am, ma yac akêŋ gêŋ daneŋ-ŋga me bu têŋ am? 38Ma têŋ nde yac alic am ŋgac apa, ma akôc am sa, me am pônâ ŋakwê, ma akêŋ têŋ am? 39Ma têŋ nde yac alic am gêmbac me am ndöc gapocwalô, dec yac ameŋ alic am?’ 40Goc Kiŋ atu dau oc ô yom ma sôm, ‘Alic lau sêkêŋ whiŋ-ŋga hoŋ naŋ sêti aneŋ asiŋi ti lhuŋwêi. Yomandô wasôm têŋ mac, bu gêŋ bocke naŋ mac akôm têŋ ŋac si ŋamalac tiwaê me ŋamalac waê-mba daŋ, naŋ gitôm mac akôm têŋ aö dauŋ.’

41“Goc iŋ oc sôm têŋ lau naŋ sêlhac iŋ amba gasê-ŋga, ‘Mac lau atap Anötö ndê atac ŋandê sa-ŋga! Alhö su yêc aö, asip ya naŋ sa ŋapaŋ andi.

Ya dau, Anötö kêmasañ gic Sadañ ti iñ ndê anjela sac ñawaê. ⁴²Yom dinañ ña-ñandô iñ bocdec. Aö gêñ yô aö, magoc mac akêñ gêñ daney-ñga têtñ aö dom. Ma bu yô aö, magoc mac akêñ têtñ aö dom. ⁴³Aö ñgac apa, magoc mac akôc aö sa dom. Aö gapônda ñakwê, ma mac akêñ têtñ aö dom. Aö gêmbac, ma gandöc gapocwalô, magoc mac ameyñ alic aö dom.’

⁴⁴“Ma ñac oc sêndac, ‘Pômdu, bocke? Têtñ nde yac alic am gêñ yô am, bu yô am, am ñgac apa, am pônda ñakwê, gêmbac kôm am, me am ndöc gapocwalô, ma yac am am sa dom?’ ⁴⁵Ma iñ oc sôm, ‘Yomandô wasôm têtñ mac, bu têtñ ndoc mac alic aneyñ lau tiwaê me lau waêmba dañ nañ pônda dau, magoc am iñ sa dom, nañ gitôm mac am aö dauñ sa dom.’

⁴⁶“Têtñ dinañ iñ oc êñkiñ ñac sêtêtñ gameñ sêhóc ñandê-ñga sêndi, bu sêmbo ñapañ. Magoc lau gitêtñ iñ oc kôc ñac sa sêndöc tali ñapañ.”

Lau bata sêkic yom bu sêndic Yisu ndu

(Mak 14:1-2; Luk 22:1-2)

26 ¹Yisu sôm yom hoñ dinañ su, goc sôm têtñ iñ ndê ñgacsêñomi, ²“Bêc lu yêc dôn yêc tu lau Israel-ñga sêlic om atu †Pasowa-ñga. Ma lau oc sêkêñ ñamalac ndê Atu sip lau amba, bu sêndic iñ ndu pi a gicso dau.”

³Têtñ ndoc dinañ dabuñsiga atu-tu ti lau bata Israel-ñga sic dau sa sêmbo †dabuñsiga ñamata-ñga Kayapas ndê andu. ⁴M a ñac sêñsalê lêtñ bu sêkôc Yisu dôn gelec ma sêndic iñ ndu. ⁵Magoc ñac sêsôm, “Dakôm têtñ Mwasij Pasowa-ñga ñandoc dom, mbo lau daêsam nañ sêmbo Jerusalem tu Pasowa-ñga, nañ oc sêlic ma sêli dau sa.”

Awhê dañ gêm oso Yisu

(Mak 14:3, 9; Luk 7:36-50; Jon 12:1-8)

⁶Tiñambu Yisu mbo whiñ ñgac dañ ñaê Saimon yêc malac Betani. Muñ-ñga iñ ñgac ti gêmbac leprasi. ⁷Yisu ndöc tebo, ma awhê dañ meñ kôc bu ñamalu ñayham nañ ñaôli atu sip kac dañ, ma kêc pi iñ ñagôlôn. ⁸Yisu ndê ñgacsêñomi sêlic gêñ dinañ ma tac ñandê. Ma sêsôm têtñ dandi, “Tu sake-ñga iñ kêyaiñ gêñ ñamalu ñayham dinañ? ⁹Gitôm bu dakêñ têtñ lau sênemlhi ña-awa atu, goc dakêñ têtñ lau ñalôm sawa.”

¹⁰Yi su kêyalê bu ñac sêsôm yom dinañ, goc sôm, “Akêñ ñawapac têtñ iñ dom! Iñ kôm gêñ ñayham kêlêc têtñ aö. ¹¹Lau ñalôm sawa oc sêmbo sêwhiñ mac ñapañ. Tigeñ aö oc wambo wawhiñ mac ñapañ dom. ¹²Iñ kêc gêñ ñamalu dec pi aö, tôm iñ kêmasañ aö neñ ñamlic gwanañ tu sêñsuhuj aö-ñga. ¹³Yomandô aö wasôm têtñ mac, bu tiñambu lau oc sêhoc ñawaê ñayham asê yêc gameñ hoñ, ma têtñ dinañ ñac oc sêsôm yom pi gêñ nañ awhê dindéc kôm, ma lau oc gauc nem iñ.”

Judas sôm tidôḡ bu hoc Yisu asê

(Mak 14:10-11; Luk 22:3-6)

¹⁴Têḡ dinaḡ ḡgacsêḡomi 12 si daḡ, ḡgac naḡ sêsam bu Judas Iskeriot, naḡ têtḡ dabuḡsiga atu-tu gi, ¹⁵ma ndac, “Aö bu wahoc Yisu asê têtḡ mac, goc mac oc akêḡ sake têtḡ aö?” Dec sêlic ḡyayham ma semlhi iḡ ḡa mone silba 30. ¹⁶Ma Judas gic hu kêsâlê lêtḡ tu bu hoc Yisu asê-ḡga.

Sêmasaḡ Mwasiḡ Pasowa-ḡga

(Mak 14:12-16; Luk 22:7-13)

¹⁷Têtḡ †Mwasiḡ Bolom Yist Mba-ḡga ḡabêc ḡamata-ḡga, naḡ ḡgacsêḡomi sêtêḡ Yisu si, ma sêndac iḡ bocdec bu, “Am tac whiḡ bu yac amasaḡ gameḡ tu danêḡ Mwasiḡ Pasowa-ḡga yêc nde?” ¹⁸Goc iḡ sôm yom pi ḡgac malac Jerusalem-ḡga daḡ, ma kêkiḡ ḡac sêtêḡ iḡ si ma sôm, “Asôc malac ma atêḡ ḡgac dau andi, ma asôm têtḡ iḡ, ‘Yac mba kêdôhônḡwaga sôm bu iḡ ndê têtḡ meḡ kêpiḡ su. Ma iḡ bu neḡ Mwasiḡ Pasowa-ḡga whiḡ iḡ ndê ḡgacsêḡomi yêc am nem andu.’” ¹⁹Bocdinaḡ ḡgacsêḡomi sêkôm tôm iḡ sôm têtḡ ḡac, ma sêmasaḡ Pasowa.

Yisu sôm bu ḡgac daḡ oc hoc iḡ asê

(Mak 14:17-21; Luk 22:21-23)

²⁰Têtḡ ôbwêc dinaḡ, Yisu ti ndê ḡgacsêḡomi 12 sêtêḡ andu dau si, ma sêndöc sêwhiḡ dau. ²¹ḡac seḡ ḡêḡ sêmbo, ma iḡ sôm, “Yomandô aö wasôm têtḡ mac bu mac nem daḡ oc hoc aö asê.” ²²Yom dau kôm ḡac sêsô ma ḡalôm ḡawapac atu, ma ḡac tigeḡ-tigeḡ sêsôm têtḡ iḡ, “Pômdu, mboe aö, a?” ²³Ma Yisu ô yom ma sôm, “Iḡ ḡgac naḡ alu aḡ ḡêḡ sip pele tigeḡ, naḡ oc hoc aö asê. ²⁴ḡêḡ dau oc ḡandô sa pi ḡamalac ndê Atu, tôm yom naḡ sêto yêc. Tigeḡ ḡgac naḡ bu hoc aö asê, naḡ oc tap ḡawapac atu sa, ma tu dinaḡ-ḡga iḡ dinda bu kôc iḡ dom, dec oc ḡayham.” ²⁵Goc Judas, naḡ oc hoc iḡ asê, naḡ sôm, “Kêdôhônḡ-waga, mboe aö, a?” Ma Yisu sôm, “Tôm naḡ am daôm sôm.”

Yisu gic hu Mwasiḡ Dabuḡ

(Mak 14:22-26; Luk 22:15-20)

²⁶Têtḡ ndoc ḡac seḡ ḡêḡ sêndöc, naḡ Yisu kôc bolom, ḡêm danḡe ma pô kôc-kôc. Goc iḡ kêḡ têtḡ ḡgac-sêḡomi ma sôm, “Akôc loc ma aneḡ. Aö neḡ ḡandô dau dec.” ²⁷Goc iḡ kôc laclhu wain-ḡga daḡ ma ḡêm danḡe, ma kêḡ têtḡ ḡac ma sôm, “Mac hoḡ akôc loc anôm. ²⁸Aneḡ dac wamatiḡ pwac-ḡga dau dec. Wakêc siḡ tu wasuc lau daêsam si sac kwi-ḡga. ²⁹Aö wasôm têtḡ mac bu aö oc wanôm wain tiyham dom e wanôm wawhiḡ mac têtḡ ndoc Damaḡ ndê ḡôliḡ meḡ sa tiawê.”

³⁰Tiḡambu ḡac sem wê daḡ ma sêsa sêtêḡ Lôc Olib si.

Yisu sôm gwanaj bu Pita oc sêc ij ahuc

(Mak 14:27-31; Luk 22:31-34)

³¹Ma Yisu sôm têtj ñac, “Tu gêtj ñaj oc hôc asê aô têtj ôbwêc dindec-ñga, dec mac hoj oc ahu aô siñ, tôm yom ñaj sêto yêc bocdec bu, ‘Aô wandic ñgac yob domba-ñga, ma domba oc sêlhô babalip.’” ³²Magoc tiñambu aô oc watisa tiyham, ma wamuñ mac watêtj gameñ Galili-ñga wandi.” ³³Ma Pita ô yom ma sôm, “Lau hoj bu sêhu am siñ, magoc aô oc wahu am siñ dom.” ³⁴Goc Yisu sôm, “Aô wasôm yom ñandô têtj am, têtj ôbwêc dec am oc sêc aô ahuc tidim tö muñ, ñaj goc dalec oc tañ.” ³⁵Magoc Pita sôm têtj ij, “Mba! Gitôm sêndic aô ndu wawhiñ am, aô oc wasêc am ahuc dom!” Ma ñgacsêñomi hoj sêsôm yom kaiñ tigenj.

Yisu teñ mbec mbo ôm Getsemani

(Mak 14:32-42; Luk 22:39-46)

³⁶Goc Yisu ti ndê ñgacsêñomi sêtêtj gameñ ñaj sêsam bu Getsemani, ñaj si. Ma ij sôm têtj ñac, “Andôc dec ma aô wasa dê wandi ma wateñ mbec.” ³⁷Goc ij kôc Pita, ma Sebedi ndê atu lu sêwhiñ ij si. Têtj ndoc dinañ ij ndê ñalôm ñawapac atu ma kedehe ij. ³⁸Ma ij sôm têtj ñac, “Aô neñ ñalôm kêsahê ñawapac atu, kêpiñ bu oc wambac ndu. Andôc dec ma anem ali awhiñ aô.” ³⁹Goc ij hu ñac siñ ma sa ahic gi, ma hu dau añgô andô têtj nom, ma teñ mbec bocdec bu, “Damañ, aô wandac am bu nditôm, ñaj goc kôc laclhu ñawapac-ñga dindec su yêc aô. Magoc êmkuc aô neñ atac whiñ dom, kôm tôm am daôm nem atac whiñ bu kôm.”

⁴⁰Ij teñ mbec su, goc tisa ma mbu têtj ñgacsêñomi tö dinañ gi, ma gêlic ñac sêyêc bêc sêyêc. Ij uñ ñac sa, ma ndac Pita, “Bocke? Mac atôm dom bu anem ali awhiñ aô gitôm acgatu ñasawa dañ, a?” ⁴¹A nem ali, ma ateq mbec bu lêtôm tap mac sa dom. Mac nem gatôm licbalê, tigenj ñamlic kwapac.” ⁴²Goc ij sa gi ma teñ mbec tiyham ma sôm, “Damañ, am bu kôc ñawapac dindec su yêc aô dom, ñaj aô wahôc, ma wakôm am nem yom ñandô sa.” ⁴³Ij teñ mbec dau pacndê, ma mbu gi tiyham ma gêlic ñac sêyêc bêc sêyêc. ñac tandô hê ñac sa ñandô. ⁴⁴Dec ij hu ñac siñ ma sa gi teñ mbec tidim tö-ñga, ma sôm yom tigenj dinañ tiyham.

⁴⁵Pacndê, ma ij mbu têtj ñgac-sêñomi gi, ma sôm têtj ñac, “Tu sake-ñga mac ayêc bêc ma añwhañ daôm ñapañ? Añgô su ñaj! Sêhoc ñamalac ndê Atu asê su, ma ndoc meñ sa bu sêkêñ ij sip lau sac amba. ⁴⁶Atisa ma dandi, bu ñgac ñaj hoc aô asê dec meñ su.”

Sêkôc Yisu dôñ

(Mak 14:43-50; Luk 22:47-53; Jon 18:1-11)

⁴⁷Yisu sôm yom dinañ mbo, ma Judas, ñgacsêñomi 12 si dañ, meñ hôc asê whiñ lau daêsam ñaj sêkôc bienj baliñ ti siñ. Dabuñsiga atu-tu

ti lau bata Israel-nga sêhkiŋ lau dau sêwhiŋ Judas. ⁴⁸Judas kên puc ŋac gwananŋ su bocdec bu, “Iŋgac nanŋ mac anŋsalê, nanŋ aô wanŋgutô iŋ tu bu watôc iŋ asê, ma mac akôc iŋ dôŋ.” ⁴⁹Bocdinanŋ iŋ têŋ Yisu gi, ma sôm, “Ôbwêc, Kêdôhônŋwaga,” ma ŋgutô iŋ. ⁵⁰Ma Yisu sôm, “Anenŋ silip, gên nanŋ am gauc gêm bu kôm, nanŋ kôm.” Têŋ dinanŋ lau nanŋ sêwhiŋ Judas, nanŋ sêtênŋ Yisu si ma sêkôc iŋ dôŋ. ⁵¹Goc Yisu ndê ŋgacsênŋom danŋ puc iŋ ndê bienŋ sa, ma pa dabuŋ-siga ŋamata-nga ndê ŋgac akiŋ ndê danŋgalaunŋ danŋ su. ⁵²Magoc Yisu sôm têŋ iŋ, “Kên nem bienŋ mbu sip ŋapanŋ tiyham. Asa nanŋ kôc bienŋ sa tu ndic lau-nga, nanŋ oc sêndic iŋ ndu ŋa bienŋ. ⁵³Anŋyalê ŋapep bu oc tôm bu aô watenŋ Damanŋ ma iŋ oc kên anŋela tausen ma tausen sêmenŋ ŋagahô ma sênem aô sa. ⁵⁴Tigenŋ aô bu watenŋ bocdinanŋ, dec gên nanŋ sêto yêc muŋ su, nanŋ oc ŋandô sa ŋalênŋ nde?”

⁵⁵Goc Yisu sôm têŋ lau daêsam dinanŋ, “Bocke dec mac akôc bienŋ ti wapa siŋ-nga, ma asa amenŋ bu akôc aô dôŋ gitôm ŋgac kanŋ danŋ? T ôm bêc hoŋ aô gandôc ti kadôhônŋ lau gambo lôm dabuŋ ŋabatêmndô, magoc mac akôc aô dôŋ dom. ⁵⁶Tigenŋ gên hoŋ dindec hôc asê bu kôm yom nanŋ lau propet sêto pi aô muŋ su, nanŋ ŋandô sa.” Têŋ dinanŋ Yisu ndê ŋgacsênŋomi hoŋ sêhu iŋ siŋ ma sêlhô si.

Lau bata Israel-nga sêmatôc Yisu

(*Mak 14:53-65; Luk 22:54-55, 63-71; Jon 18:12, 13, 19-24*)

⁵⁷Lau nanŋ sêndôhônŋ yomsu ti lau bata Israel-nga sêkac dau sa su ma sêhônŋ sêmbô dabuŋsiga ŋamata-nga Kayapas ndê andu. Ma lau nanŋ sêkôc Yisu dôŋ, nanŋ sêwê iŋ sêtênŋ andu dau si. ⁵⁸Pita kêsêlênŋ kêkuc Yisu mbo ahê e hôc asê dabuŋsiga ŋamata-nga ndê andu. Goc iŋ sôc gi ndôc andu ŋatuŋlôm whiŋ lau siŋ sêyob lôm dabuŋ-nga ŋatô, bu lic gên bocke oc hôc asê Yisu.

⁵⁹Dabuŋsiga atu-tu ma lau bata hoŋ nanŋ sêndôc †Sanedrin si toŋ, nanŋ sênŋsalê yom tu sênŋgôliŋ pi Yisu-nga ma sêkênŋ iŋ sip lau Rom-nga amba bu sêndic iŋ ndu. ⁶⁰Lau tasanŋ daêsam sêtisa ma sêsôm yom tasanŋ pi iŋ, magoc yom ŋandô bu sênŋgôliŋ pi iŋ, nanŋ sêtap danŋ sa dom. Tiŋambu ŋac si lu sêtisa, ⁶¹ma sêsôm, “Iŋ ŋgac dec sôm bu iŋ gitôm bu seŋ Anötô ndê lôm dabuŋ su, ma kwê sa tiyham tôm bêc tö.” ⁶²Goc dabuŋsiga ŋamata-nga tisa ma sôm têŋ Yisu, “Am ŋgô yom dê sênŋgôliŋ pi am, me? Am bu ô yom, me mba?” ⁶³Magoc Yisu gêm dôŋ. Ma dabuŋsiga dau sôm, “Sôm yom ŋandô yêc Anötô Tali anŋô-nga! Sôm asê têŋ yac bu am Mesaya, Anötô ndê Atu, me mba?” ⁶⁴Ma Yisu ô yom ma sôm, “Tôm nanŋ am sôm. Tigenŋ aô wasôm têŋ mac hoŋ, tiŋambu mac oc alic ŋamalac ndê Atu ndôc Anötô ŋaclai ŋadau ndê andô-nga, ma sip meŋ ndôc dao ŋahô.”

⁶⁵Têŋ ndoc dabuŋsiga ŋamata-nga ŋgô yom dinanŋ, nanŋ tac ŋandê atu dec kêc dau ndê ŋakwê kic ma sôm, “Iŋ ndê yom pi dau dê sac sambuc. Mac hoŋ anŋô su. Yac dapônda yom danŋ tu tanŋgôliŋ pi iŋ-nga dom.

⁶⁶Mac gauc gêm sake?” Ma sêô yom ma sêsôm, “Iñ mbac ndu mañ.” ⁶⁷Ma sêhê gasôp p i iñ aṅgô andô, ma sêṅguluj aṅba ma sêpêṅ iñ. Ma lau ṅatô sêtap iñ, ⁶⁸ma sêsôm, “Am Mesaya, a? Am bu propet, dec sôm asê bu asa tap am?”

Pita sêc Yisu ahuc

(Mak 14:66-72; Luk 22:55-62; Jon 18:15-18, 25-27)

⁶⁹Têṅ têtṅ dinaṅ Pita ndôc andu dau ṅamakê, ma awhê akiṅ daṅ têtṅ iñ gi, ma sôm, “Am ṅgac naṅ kêkuc Yisu Galili-ṅga whiṅ.” ⁷⁰Magoc iñ pa dau yêc ṅac hoṅ aṅgô-ṅga ma sôm, “Mba! Aô kayalê am nem yom ṅahu dom.”

⁷¹Goc iñ sa gi kalhac gatam. Ma bawhê daṅ gêlic iñ ma sôm têtṅ lau, “Iñ ṅgac dê, iñ ṅgac daṅ naṅ kêkuc Yisu Nasaret-ṅga.” ⁷²Ma Pita pa dau tiyham ma sôm yom ṅaṅga, “Yom ṅandô! Aô kayalê iñ dom!” ⁷³Iṅasawa sauṅ ma lau naṅ sêlhac dinaṅ, sêtêṅ Pita si ma sêsôm, “Lau naṅ sêṅkuc iñ, naṅ si daṅ am! Yomandô! Am sôm yom ṅa awha naṅ gi tap lau Galili-ṅga dinaṅ si sa.” ⁷⁴Goc iñ sôm, “Mba! A ô bu wasôm yom tasan, naṅ Anötô ndic aô. Aô kayalê iñ dom andô!” Ma ṅagahô dalec taṅ. ⁷⁵Dec Pita gauc gêm Yisu ndê yom bocdec, “Am oc sêc aô ahuc tidim tö, goc dalec oc taṅ.” Goc iñ kölhö sa awê gi, ma taṅ dau ndu.

Sêwê Yisu têtṅ Pailot gi

(Mak 15:1; Luk 23:1-2; Jon 18:28-32)

27 ¹Têtṅ bêbêc ganduc dabuṅ-siga atu-tu ti lau bata Israel-ṅga hoṅ si ṅalôm pitigeṅ bu sêndic Yisu ndu. ²Goc sêsô iñ aṅba dôṅ, ma sêwê iñ gi ma sêkêṅ iñ sip Pailot aṅba. Pailot iñ Rom si gôliṅwaga naṅ gêm gôliṅ gameṅ Judia-ṅga.

Judas kiṅ dau ndu

³Têtṅ ndoc Judas gêlic gêṅ dinaṅ, ma ṅgô bu sêsôm tidôṅ bu sêndic Yisu ndu, naṅ iñ ṅalôm ṅawapac bu iñ hoc iñ asê. Goc iñ kêtṅ mone silba 30 dinaṅ mbu têtṅ dabuṅsiga atu-tu ti lau bata gi. ⁴Ma iñ sôm, “Aô gakôm so, bu aô gahoc ṅgac gitêṅ daṅ asê, ma oc sêkêc iñ ndê dac siṅ.” Ma ṅac sêô iñ awha ma sêsôm, “Tu sake-ṅga am sôm têtṅ yac? Am daôm nem ṅawapac!”

⁵Dec Judas kêbaliṅ mone dau yêc lôm dabuṅ ṅamakê, ma sa gi kiṅ dau ndu. ⁶Ma lau dabuṅsiga dau sêsôm, “Dac hi mone dindéc ahuc, ma yac bu dakêṅ sip apa da-ṅga yêc lôm dabuṅ, dec oc daso yomsu.” ⁷Goc sêsôm yom tidôṅ bu sêkôc mone dau ma sênemlhi ṅgac pec lôṅ-ṅga ndê nom daṅ, ma sêṅyaliṅ nom dau sa ti lau apa si ôṅ sêhê-ṅga. ⁸Tu dinaṅ-ṅga lau têtṅ dindéc-ṅga sêsam gameṅ dau bu ‘Nom ti Dac.’ ⁹Bocdinaṅ yom naṅ propet Jeremaya sôm, naṅ dec ṅandô sa. Sêto yom dau yêc bocdec bu:

Lau Israel-nga sêkôc mone silba 30 naŋ sêŋyaliŋ sa ti iŋ ndê ɲaôli, naŋ sa, ¹⁰ma semlhi ɲgac pec lôŋ-nga ndê nom, tòm Pômdau kên yatu aô. *[Sek 11:12-13]*

Pailot kêsü Yisu

(Mak 15:2-15; Luk 23:2-3, 18-25; Jon 18:29–19:16)

¹¹Sêkêŋ Yisu kalhac gôliŋwaga Pailot aŋgô-nga, ma iŋ ndac Yisu, “Am lau Israel si Kiŋ, a?” Ma Yisu ô yom ma sôm, “Tòm naŋ am daôm sôm.” ¹²Têŋ dinaŋ dabuŋsiga atu-tu ma lau bata Israel-nga sêŋgôliŋ yom pi iŋ, magoc iŋ ô ɲac si yom dom. ¹³Goc Pailot ndac iŋ, “Am ɲgô yom naŋ sêŋgôliŋ pi am, me mba?” ¹⁴Magoc Yisu ô yom naŋ sêŋgôliŋ pi iŋ, naŋ daŋ dom. Ma tu dinaŋ-nga Pailot hêdaê ɲandô.

¹⁵Tòm yala hoŋ, têŋ ndoc lau Israel sêndê Mwasiŋ Pasowa-nga, naŋ Pailot kêkuc lêŋ daŋ bocdec bu. Lau Israel-nga oc sêndac ɲgac gapocwalô-nga daŋ, dec iŋ oc êŋgapwêc iŋ su têŋ ɲac. ¹⁶Têŋ ndoc dinaŋ ɲgac daŋ ndöc gapocwalô. Iŋ ndê ɲaê Barabas, ma lau hoŋ sêŋyalê bu iŋ ɲgac sac sambuc. ¹⁷Goc Pailot ndac lau daêsam dinaŋ bu, “Mac atac whiŋ bu wahu asa siŋ têŋ mac? Barabas, me Yisu naŋ sêsam bu Kilisi?”

¹⁸Pailot kêyalê bu lau dabuŋsiga dau sem lêmuŋ Yisu ɲambwa, ma tu dinaŋ-nga dec sêkêŋ Yisu têŋ iŋ. Bocdinaŋ iŋ gauc gêm bu êŋgapwêc Yisu su. ¹⁹Ma gêŋ daŋ tiyham. Têŋ n doc Pailot ndöc iŋ ndê pôn êmatôc yom-nga, naŋ iŋ ndê awhê kên yom têŋ iŋ bocdec bu, “Kôm gêŋ daŋ têŋ ɲgac gitêŋ dinaŋ dom, bu kwahic dec aô gayêc mbê pi iŋ, naŋ kôm aneŋ ɲalôm ɲawapac ɲandô.”

²⁰Magoc dabuŋsiga atu-tu ti lau bata sêli lau ɲalôm sa, ma sêndac Pailot bu hu Barabas siŋ têŋ ɲac, ma ndic Yisu ndu. ²¹Dec Pailot ndac ɲac tiyham, “Mac atac whiŋ bu wahu ɲgac lu dec si asa siŋ têŋ mac?” Ma sêsôm, “Barabas!” ²²Goc iŋ ndac, “Bocdinaŋ aô wakôm sake têŋ Yisu naŋ sêsam bu Kilisi?” Ma ɲac hoŋ sêsôm bu, “Ndic iŋ pi a gicso dau ndi.” ²³Magoc Pailot ndac, “Tu sake-nga? Iŋ kôm giso bocke?” Tigeŋ ɲac sêmbwêc atu, “Ndic iŋ pi a gicso dau!”

²⁴Pailot kêyalê bu ɲac oc sêsôc iŋ ndê yom ɲapu dom, ma ɲac sêli dau sa ɲandô. Bocdinaŋ iŋ kôc bu, ma kêgwasiŋ amba yêc ɲac hoŋ aŋgô-nga, ma sôm, “Gêŋ dec sip mac amam. Aô wawêkaiŋ ɲgac dindac ndê dac ɲagêyô wawhiŋ mac dom.” ²⁵Ma lau hoŋ sêsôm, “Iŋ ndê dac ɲagêyô meŋ pi yac ti yac mba balêkoc.”

²⁶Goc Pailot kêgapwêc Barabas su têŋ ɲac, ma kên Yisu têŋ iŋ ndê lau siŋ-nga bu sêhi iŋ ɲamlic ɲandê, ma sêndic iŋ ndu pi a gicso dau.

Lau siŋ-nga sêsü Yisu susu

(Mak 15:16-20; Jon 19:2-3)

²⁷Pailot ndê lau siŋ-nga sêwê Yisu sêsa Pailot ndê andu ɲa-malac lôm si, goc sêta lau siŋ-nga hoŋ sêkac sa sêmeŋ, ma sêŋgihi iŋ ahuc. ²⁸Sêkôc

inj ndê ñakwê baliñ su, ma sêkên inj sôc ñakwê kokoc baliñ tôm kiñ sêsôc. ²⁹Ma sêwhê wac kêm ma sêkên inj uñ gitôm sunsun. Ma sêkên a dañ inj gêm kôm yêc amba andô-nga gitôm kiñ si tôte. Goc sêpôn haduc têt inj, ma sêsu inj susu ma sêsôm, “Ei! Datoc lau Israel si kiñ dindéc sa mañ!” ³⁰Sêhê gasôp pi inj, ma sêkôc a dau su yêc inj, ma sic inj pi ñagôlôn tidim daêsam. ³¹Sêsu inj susu pacndê, goc sêkac ñakwê dinañ su, ma sêkên inj sôc dau ndê ñakwê sa tiyham. Goc sêwê inj sêsa malac Jerusalem ñamakê si, bu sêndic inj ndu pi a gicso dau.

Sic Yisu pi a gicso dau

(*Mak 15:21-32; Luk 23:26-43; Jon 19:17-27*)

³²Têt ndoc sêwê Yisu sêsa si, nañ sêtap ñgac apa dañ sa, nañ men akêt malac Sairin. Inj ndê ñaê Saimon. Ma sêkac inj bu êmbalañ Yisu ndê a gicso dau. ³³Ma ñac si e sêhôt asê gameñ nañ sêsam bu Golgota. (Ñaê dau danem kwi bu ‘Gameñ Ñakêcyha-nga.’) ³⁴Lau siñ-nga sêkên bu ñamakic sip laclhu dañ whiñ wain, ma sêkên têt Yisu nôm. Inj kêsahê ma tec. ³⁵Goc ñac sic inj pi a gicso dau. Ma tiñambu sêwhê inj ndê ñakwê kôc, ma sêpuc gapoc bu sêlic asa oc kôc ñakwê bocke. ³⁶Pacndê su, goc sêndôc sic ma tatiñ inj. ³⁷Ma yom nañ lau bata Israel-nga sêñgôliñ pi inj, nañ sêto ma sêkên kalhac a gicso dau ñahô. Yom dau sôm bu, “Ñgac dindéc inj Yisu, lau Israel-nga si Kiñ.”

³⁸Têt bêc dinañ ñac sic ñgac kañ lu sêpi a gicso dau sêwhiñ Yisu, dañ kêgalêt Yisu ndê andô-nga, ma dañ kêgalêt gasê-nga. ³⁹Lau nañ sêñsêlêt si sêmen sêndahiñ ñasu ma sêtañ bôlê Yisu. ⁴⁰Ma sêsôm, “Am ñgac nañ sôm bu señ lôm dabuñ su, ma kwê sa tiyham tôm bêc tô. Am bu Anötô ndê Atu, nañ goc nem daôm si ma sip mweñ!” ⁴¹Ma ñalêt tigen dinañ dabuñsiga atu-tu ti lau nañ sêndôhôn yomsu ma lau bata señgec inj. ⁴²Ma sêsôm têt dau, “Inj gêm lau ñatô sa, magoc gitôm dom bu nem dau sa! Inj lau Israel-nga si Kiñ, a? Inj bu sip men akêt a gicso dau men, dec yac oc dakêt whiñ inj. ⁴³Inj kêt whiñ Anötô ma sam dau bu Anötô ndê Atu. Anötô bu tac whiñ inj, dec oc nem inj si.” ⁴⁴Ma ñgac kañ lu nañ sic inj lu sêpi a gicso, nañ sêsôm yom kaiñ tigen dinañ pi Yisu.

Yisu mbac ndu

(*Mak 15:33-41; Luk 23:44-49; Jon 19:28-30*)

⁴⁵Têt ac kac lhu, ñasec atu gêm gameñ sambuc ahuc e acgatu gitôm 3 kilok telha-nga. ⁴⁶Ma têt 3 kilok Yisu mbwêc awaha atu, “Eloi, Eloi, lama sabaktani?” (Yom dau danem kwi bu ‘Aneñ Anötô, aneñ Anötô, tu sake-nga am hu aô siñ?’) ⁴⁷Lau nañ sêlhac sêmpin, nañ sêngô inj ñapep dom ma sêsôm, “Inj ta Elaija.” ⁴⁸Ma ñgac dañ kêt gi ma kêt sôwam dañ sip wain ñamakic, goc sô dôñ pi a baliñ dañ, ma puc pi Yisu whasuñ bu inj nôm. ⁴⁹Ma lau ñatô sêsôm, “Hu inj siñ ma dalic. Elaija oc men nem inj sa, me mba?”

⁵⁰Têñ dinañ Yisu mbwêc awha atu tiyham, ma mbac ndu. ⁵¹Têñ ndoc dinañ po baliñ nañ kêgalên lôm dabuñ ñalôm, nañ dau kic gi lu, kalhac ñahô-nga e gi têñ ñapu-nga. Ma tiyhô gêm ma hoc atu-tu daêsam popoc. ⁵²Ma sêhò sêhòc kôc, ma lau dabuñ daêsam nañ sêmbac ndu su, nañ sêtisa sêmbo tali tiyham. ⁵³Ñac sêsa akên sêhò sêmen, ma tiñambu têñ ndoc Yisu tisa su, goc sêsôc malac dabuñ Jerusalem si, ma sêhoc dau asê têñ lau daêsam sêlic.

⁵⁴Têñ ndoc ñgac bata siñ-nga ti iñ ndê lau nañ sêyob Yisu sêmbo, nañ sêlic tiyhô ti gên hoñ dinañ, dec sêtôc dau atu, ma sêsôm, “Yomandô! Ñgac dec iñ Anötö Atu!” ⁵⁵Ma lauwhê daêsam sêlhac ahê ma sêlic gên hoñ dinañ. Ñac lauwhê nañ sêñkuc Yisu akên gameñ Galili-nga sêmen, ma sem akiñ iñ. ⁵⁶Maria Magadala, ti Jems lu Joses dinda Maria, ma Sebedi nawhê (Jon lu Jems dinda) sêmbo sêwhiñ lauwhê dinañ.

Josep kên Yisu ndê ñamlañ yêc hoc ñasuj
(*Mak 15:42-47; Luk 23:50-56; Jon 19:38-42*)

⁵⁷Lau nañ sêñkuc Yisu, nañ si dañ iñ ñgac ti lêlôm nañ ndê ñaê Josep, ma iñ meñ akên malac Arimatiya. Têñ telha dinañ, ⁵⁸iñ têñ Pailot gi, ma ndac Yisu ndê ñamlañ. Pailot gôlôc ma kên yom têñ iñ ndê lau siñ-nga bu sêhu Yisu ndê ñamlañ siñ têñ Josep. ⁵⁹Dec Josep sa gi, kôc Yisu ndê ñamlañ ma kêpañ si ña po ñawasi dañ. ⁶⁰Ma iñ kôc sa gi ma kên yêc iñ dau ndê sêhò, nañ sêlên gwanañ su yêc hoc ñalôm. Ma Josep kêpi hoc atu dañ gi ndôc sê awha ahuc, goc kôlhô gi. ⁶¹Têñ ndoc dinañ Maria Magadala lu awê dañ ñaê Maria, sêndôc sêhò ñamakê ma sêlic.

Lau siñ-nga sêyob sêhò

⁶²Sic Yisu pi a gicso dau têñ bêc nañ lau Israel sêmasañ dau tu Sabat-nga, ma têñ ñagalañsê dabuñsiga atu-tu ti lau Palêsai sêtên Pailot si. ⁶³Ma sêsôm, “Ñgac atu. Yac gauc gêm yom dañ nañ ñgac tasan dau sôm têñ ndoc iñ mbo tali. Iñ sôm bu mbac ndu ma tiñambu bêc tö niñga iñ oc tisa tiyham. ⁶⁴Bocdinañ ndic atu lau bu sêyob sêhò e bêc tö niñga su. Mboe iñ ndê ñgacsêñomi oc sêmen ma sênem kañ iñ ndê ñamlañ, ma sêsôm têñ lau bu iñ tisa su. Iñ kêsau lau ma sôm bu iñ Mesaya dau, magoc ñac bu sêkôm tasan dau, oc hóc gêlêc tasan nañ iñ kôm ñamata-nga, nañ su.” ⁶⁵Goc Pailot sôm têñ ñac, “Akôc lau siñ-nga sa andi, ma akên ñac sêyob sêhò ñannga.” ⁶⁶Goc sêsa si ma sêsap hoc nañ ti gatam sêhò-nga, nañ dôñ ñannga ña a ñakwi bu lau dañ sêkac sa dom. Ma sêkên lau siñ-nga sêyob.

Yisu tisa
(*Mak 16:1-13; Luk 24:1-12*)

28 ¹Bêc Sabat-nga meñ gi su, ma têñ wake ñabêc ñamata-nga, Maria Magadala lu awê dañ ñaê Maria sêti têñ bêbêc ganduc ma sêsa

si bu sêlic sêhō dau. ²Têṅ ndoc dinaṅ tihō gêm atu, ma Pômdau ndê aṅela daṅ sip akêṅ undambê meṅ, ma kêpi hoc naṅ ndôc sê awha ahuc, naṅ su, goc pi gi ndôc ṅahô. ³Iṅ ndê ṅawasi pō gameṅ gitôm sickac, ma iṅ ndê ṅakwê sêp sambuc. ⁴Têṅ ndoc lau siṅ-ṅga sêlic iṅ, naṅ sêtôc dau atu ma sêntitec. Ma ṅac tagôlô ma sêhu dau sêyêc gitôm lau batê. ⁵Ma aṅela dau sôm têtṅ awhê lu, “Atôc daôm dom. Aô kayalê bu amlu aṅsalê Yisu naṅ sic iṅ ndu pi a gicso dau. ⁶Iṅ mbo lec dom. Iṅ tisa su tôm iṅ sôm gwananṅ su. Amerṅ alic gameṅ naṅ sêkêṅ iṅ yêc naṅ. ⁷Goc ambu andi ṅagahô, ma asôm têtṅ iṅ ndê ṅgacsêṅomi bu iṅ tisa akêṅ lau batê-ṅga su. Ma iṅ oc muṅ mac ndi mbo gameṅ Galili-ṅga. Yêc dindê mac oc alic iṅ. Kwahic dec aô gahoc yom dindêc asê têtṅ amlu, ma amlu aṅgô su.”

⁸Têṅ ndoc dinaṅ awhê lu dau sêlhô si bu sêkêṅ ṅawaê dau têtṅ Yisu ndê ṅgacsêṅomi. Iṅlu si ti atac ṅayham atu, magoc ṅalôm lu-lu ma sêtôc dau. Sênti sêmbo seṅ, ⁹ma ṅagahô Yisu hoc dau asê têtṅ iṅlu ma hê mwalêc iṅlu. Goc iṅlu sêtigasuc iṅ ma sêhu dau sêyêc nom. Ma sêkôc iṅ sip gahi ma sêmpiṅ iṅ. ¹⁰Goc Yisu sôm têtṅ iṅlu, “Atôc daôm dom. Andi ma asôm têtṅ aneṅ asidôwai hoṅ bu sêtêtṅ Galili sêndi, ma ṅac oc sêlic aô yêc dindê.”

Lau siṅ-ṅga sêsôm Yisu tisa ṅawaê

¹¹Têṅ ndoc naṅ awhê lu dinaṅ sêmbo seṅ, naṅ lau siṅ-ṅga ṅatô naṅ sêyob sêhō dau, naṅ sêmbu sêtêtṅ Jerusalem si. Ma sêkêṅ ṅawaê têtṅ dabuṅsiga atu-tu, pi gêṅ hoṅ naṅ sêlic. ¹²Goc lau dabuṅsiga dau sêkac lau bata sa, ma sêmasanṅ yom pi gêṅ dau. ṅac semlhi lau siṅ-ṅga ṅa mone atu, ¹³ma sêsôm têtṅ ṅac, “Mac asôm têtṅ lau bu, ‘Têṅ ôbwêc yac ayêc bêc ayêc. Ma iṅ ndê ṅgacsêṅomi sêmeṅ, ma sem kaṅ iṅ ndê ṅamlanṅ.’ ¹⁴Ma Pailot bu ṅgô bu mac ayêc bêc, dec yac oc amasanṅ yom awhiṅ iṅ, bu mac atap matôc sa dom.” ¹⁵Bocdinaṅ lau siṅ-ṅga sêkôc mone dau sa, ma sêkôm tôm lau bata Israel-ṅga sêsôm têtṅ ṅac. Ma yom dau tiapa yêc lau Israel-ṅga ṅalôm, ma lau ṅatô sêsôm e meṅ têtṅ kwahic dec.

Yisu hoc dau asê têtṅ ṅgacsêṅomi

¹⁶Têṅ ndoc dinaṅ ṅgacsêṅomi 11 sêsa sêtêtṅ lôc naṅ yêc gameṅ Galili-ṅga si, gitôm Yisu sôm têtṅ ṅac muṅ su. ¹⁷Têṅ ndoc sêlic iṅ, naṅ sêpôn haduc ma sêmpiṅ iṅ. Magoc ṅac si lau ṅatô atac lu-lu. ¹⁸Goc Yisu tigasuc ṅac ma sôm, “Anötô kêṅ ṅaclai têtṅ aô pi gêṅ undambê ti nom-ṅga hoṅ. ¹⁹Bocdinaṅ atêtṅ gameṅ hoṅ andi ma andôhôn lau e sêṅyalê aô ma sêkêṅ whiṅ aô. Aṅku ṅac anem Damba, Atu, ma Iṅalau Dabuṅ aṅgô. ²⁰Ma andôhôn ṅac bu daṅga wambu yom hoṅ naṅ aô gac atu mac. Ma aṅyalê pi ṅandô bu aô oc wambo wawhiṅ mac ṅapanṅ, e nom ṅatêm pacndê.”